

WANTOK

NIUSPEPA BILONG YUMI OL PAPUA NIUGINI STRET!

32 pes

Namba 1,393

Wik stat long Fonde Mas 8, 2001

70t

Lo bilong ol politik eksekutiv
pes 2

Yunion laik kotim Gavman long pei
pes 3

Politiks kros long Morobe
pes 9

Ol stori long ovasis
pes 15-16

Stori bilong ol memba
pes 20

Nupela politikel pati bai kamap

JOE KANEKANE i raitim

...sampela PDM na arapela pati memba bai bruk

WANPELA nupela politikel pati bai kamap na ol memba bilong dispela pati bai i kam aut long ol bikpela pati husat i ronim Gavman tude na ol independen memba. Dispela politikel pati bai redi long Julai taim palamen i kam bek bung.

Ol lain husat bai kamapim dis-

pela pati bai i kam long Pipels Demokretik Muvmen (PDM) husat i go pas long kamapim dispela tingting na ol arapela pati memba tu bai i kam join wantaim.

Dispela em wanpela nupela politikel plen na ol memba bilong palamen i wok long skelim na i luk olsem bai i kisim sapot long ol mun-

i kam. Sampela memba i tokaut pinis long dispela wik olsem ol i kisim toktok pinis long joinim dispela nupela pati long stap insait long Gavman inap long ileksen taim long 2002.

Faipela memba, 4-pela Gavman bekbensa na wanpela Oposisen memba i tokaut pinis

long dispela olsem ol i bin kisim toksave pinis long sampela lain long givim sapot taim palamen i kam bung long Julai.

"Ol i bin askim mi long joinim dispela pati na mi askim wanem as tru long kamapim dispela na husat i go pas long dispela plen. Tasol ol i no tokim mi na mi tingting planti long dispela i tru o ol i laik testim tasol strong bilong mi long pati bilong mi," wanpela sinia Pangu Pati memba i tok.

Em i tok em i save long dispela grup long PDM na em i kirap nogut long ol i kam lukim em long joinim ol taim pati i kamap.

"Mi harim olsem wanpela pati bai kamap. Mi no save olsem dispela bai i kamap long ol PDM grup. Mi no bin askim gut na nogut em tok win tasol," wanpela sinia Oposisen memba i tok.

Dispela memba itok kain tok win olsem i save kamap long dua bilong palamen na sampela taim i save hat tru long skelim gut sapos i gat trupela as insait long dispela kain tok win.

"Yumi save harim dispela olgeta taim. Ol memba bilong palamen i save mekim ol plen long mekim ol kain kain samting. Yumi mas wet na lukim sapos dispela em trupela toktok o nogat," Oposisen memba ya i tok.

Narapela Gavman bekbensa i tokaut olsem em i laik wok na redim em yet long 2002 nesanel ileksen. Em i no laik wari long wanpela nupela politikel pati i kamap.

"Em i no nupela samting. Ol pati i save kamap long taim i gat ol bikpela samting i kamap na mi no

kirap nogut. Mi gat ileksen long wari long en na wok bilong mi i go long dispela tasol," memba ya i tok.

Long Hailans longpela taim PDM man husat i go pas long pati Michael Mel i go bek joinim Nesanel Pati wantaim bikpela tingting long kamapim Hailans Praim Minista.

Olgeta Hailans Gavana wantaim memba bilong Hagen, Paul Pora i stap bihain long dispela muv na em i wok long kisim sapot bihain long Nesanel Gavman i bin rausim pawa bilong Sauten Hailans na Enga Provinsal Gavman.

Mista Pora i tok ol pastaim lida bilong PDM i save gat ol hait tingting long bagarapim na brukim ol politikel pati na bagarapim tu ol bisnisan olsem na nau em taim ol lida bilong dispela rijon i mas bung wantaim na stapim dispela kain pasin.

Planti senis klostu klostu long ol Minista na tu rausim ol biknem PDM memba long kabinet i mekim kamap Praim Minsita Sir Mekere Morauta olsem lida bilong pati.

Wantaim gutpela malolo bilong abrusim vot i nogat bilip egensim Praim Minista, bikpela wok bilong Praim Minista nau em long mekim kamap tru ol bikpela polisi bilong em. Dispela bai soim klia long em bai winim gen sit bilong em long 2002 nesanel ileksen na kamap Praim Minista gen sapos PDM tu i winim bek olgeta sit bilong em.

Tasol sapos papa bilong PDM Paias Wingti i winim ileksen long 2002 na kam bek bai em i lukluk long kamap Praim Minista gen na dispela bai mekim hat long Sir Mekere Morauta long kisim bek sia bilong Praim Minista.



Gavana helpim ol meri. Westen Hailans Gavana, Pater Robert Lak i givim K12,000 long asosiesen bilong ol meri long Dei Distrik. President bilong ol meri, Paula Mek (raithan) i kisim sek. Foto: TIMOTHY AIMS.

Sik AIDS inap bagarapim kantri, Ledi Morauta i tok

VERONICA HATUTASI i raitim

SIK AIDS em wanpela bikpela samting we inap bagarapim developmen bilong PNG. Ledi Roselyn Morauta, meri bilong Praim Minista Sir Mekere Morauta i bin tok long dispela wik Mande long de bilong Intenesenel Wimens wik.

Fonde Mas 8 (tude) em Intenesenel Wimens De.

Ledi Morauta i bin tokim moa long 100 meri husat i bin bung long Hai Komisn opis bilong Australia long Waigani long selebretim de bilong ol meri olsem HIV/AIDS i save kisim moa meri taim yumi skelim wantaim ol man na em i moabeta long ol mama i mas toktok long ol pikinini, moa yet ol pikinini meri bilong

ol long dispela sik na long rot bilong abrusim sik ya.

Mak long ol pipel long PNG husat i pundaun long sik AIDS nau i kamap long 15,000. Em i tok long olgeta yia, mak long sik i save go antap long bikpela mak moa winim narapela yia.

Em i tok namba wan rot we ol manmeri i kisim sik em long slip nabaut wantaim narapela man husat i gat dispela sik.

Na namba tu rot em ol nupela bebi i kisim sik long mama bilong ol. Long dispela rot ya, 30 pesen long ol bebi i kisim sik AIDS long en.

Ledi Morauta i tok sik AIDS i no olsem ol arapela sik we man i inap long stapim, nogat.

Sik AIDS em yumi wanwan i ken stapim sapos yumi gat wanpela patna tasol.

Tasol em i tok i gat planti arapela as we mak bilong ol meri i kisim sik AIDS i bikpela moa na dispela em rot bilong ol meri i kisim sik ya i isi olsem ol sosel na ikonmik hevi, planti i nogat skul na olsem ol i no gat gutpela save long dispela sik na rot bilong abrusim na i nogat gutpela rot long kisim mani long en.

Ledi Morauta i bin tok hevi we dispela sik bai kamapim long Helt sistem long bodi i nogut ya.

"Ol AIDS siklain bai i pasim 70 pesen long ol bet long haus sik, kos bilong helt kea bai go antap, mak long sik TB bai i go antap long 50 pesen mak. Antap long dispela, sik ya bai bagarapim ikonmik bilong kantri sapos planti ol yangpela manmeri i pundaun long dispela sik. Na kantri na ol famili bai painim hat tru bikos ol bai troim bikpela mani long lukautim ol AIDS

siklain long sait bilong baim marasin na ol arapela helpim.

Ledi Roselyn i tok i moabeta long ol meri i autim moa toktok long dispela sik long ol narapela na tu go long ol haus sik o klinik sapos ol i sik bai ol sista na nes i sekim ol long wanem kain sik ol i gat long en.

Ledi Morauta i petron o go pas long wanpela NGO grup ol i kolim long Friends Foundation we i helpim ol manmeri i gat sik AIDS long en. Em i wok tu wantaim narapela NGO na dispela em STOP/AIDS grup we Angliken Sios i go pas long en.

Gavman bilong Australia i luksave long dispela sik i kamapim hevi long PNG na em i givim \$Aus60 milien i go long Helt Dipatmen long traim daunim dispela sik insait long faipela yia i kam.

PLIS RIPOOT

• **POT MOSBI:** Ekting Plis Komisina, Sam Inguba i tok lukaut long ol plis pesenel long rispektim lo bihain long plis i holim wanpela plisman na sasim em long karim ol ponograpik materiel o buk piksa we i soim ol manmeri i as nating na mekim ol kainkain pasin nogut. Plis i bin sekim haus bilong plisman ya long Godens Plis Bareks na kisim wanpela disket we i gat ponograpik piksa i stap long en na sampela plai kad we i soim ol manmeri i as nating stret.

Mista Inguba i tok ol plismanmeri i no stap antap long lo na lo bai kisim ol na mekim save sapos ol i brukim lo.

Plisman ya em konstabel Michael Tibam na em i stap wantaim plis pingaprin seksen long forensik lebatori long Godens na plis i holim em aninit long seksen 25 A(1) bilong Samari Ofenses Ekt Sapta 264.

• **WEWAK:** Plis i kisim bek tenpela kalabus lain insait long wanpela spesel plis operesen we ol i bin karimaut insait long Is Sepik Provins.

Provinsel plis komanda, suprintenden Leo Kabilo i tok ol kalabus lain ya i pat bilong 30 arapela kalabusman husat i bin ronawe long Boram Jel long pinis bilong las yia.

Ol lokol pipel na ol komyuniti lida i bin helpim plis long holim ol dispela kalabus lain. Narapela 11 i stap hait yet.

Mista Kabilo i tok ol i sasim ol lain kalabusman ya long ronawe long loful kastodi na putim ol i go bek long jel long wetim trael bilong ol.

Em i tok plis i holim tu wanpela kaunsel presiden bilong Ambunti lokol gavman kaunsel na sasim em long paulim K30,000.

Dispela presiden i olsem namba tri long ol plis i sasim wantaim wankain rong.

• **POT MOSBI:** Plis prosekiuta, Thomas Eluh bai kisim sampela taim long redim fail bilong em long sasim biknem loya, Greg Sheppard husat i bin sanap long kot we ol i sasim em long giaman bilong em long traim na paulim sampela lenona bilong Wes Sepik Provins long mani we mak bilong en i stap olsem K2.7 milien.

Mista Sheppard i wanpela sinia patna wantaim Maladinas Loya we i bes hia long siti. Nesenel frod na enti korapsen skwad i bin holim em na sasim em. Tasol ol i rausim em long kes beil. Em i sanap long distrik kot na kes bilong em ol i surukim i go long Mas 27 long askim bilong Mista Eluh.

• **POT MOSBI:** Metropolitan Suprintenden Joseph Morehari i tok lukaut long ol motoris o ol draiva long kisim was gut taim ol i draiv raun wantaim ol valuebel o ol samting we prais bilong ol i bikpela long pablik ples.

Mista Morehari i mekim dispela tok lukaut bihain long em i kisim ripot olsem planti stil pasin i save kamap long ol ka long pablik ples. Ol ka we i save pak o stop long ol supamakem na maket i save gat ol winskrin bilong ol i bruk o bagarap na wanem samting i stap insait long ka i save lus.

Plis bos i tok sapos ol draiva i gat ol kain samting wantaim bikpela prais i stap insait long ka, ol i mas kisim wantaim ol taim ol i lusim ka long ol pablik ples.

Ol Bogenvil lida luksave long salens Mama Lo bai bungim

YAKAM KELO i raitim

BOGENVIL long kisim moa pawa na luksave bilong independens bai mekim guria long mama lo bilong Papua Niugini. Na olgeta Bogenvil lida i save long dispela, Minista bilong Nesenel Plening na Bogenvil Afeas Moi Avei i tok.

Mista Avei i mekim dispela tok-tok bihain long em i kam bek long bung bilong em wantaim ol Bogenvil lida long Taunsvil long Australia las wik olsem long namba wan taim tru nau ol Bogenvil lida i luksave long wanem hevi inap kamap long mama lo bilong kantri sapos ol i kisim dispela tupela bikpela samting.

Mista Avei i tok taim Nesenel Gavman i givim moa pawa (atonomi) na independens (referendum) long Bogenvil, bai strong o pos kantri i sanap long en bai guria. Toktok bilong em i sut long bikpela mama lo bilong kantri we olgeta provins i sanap wantaim long kamapim wanpela kantri Papua Niugini. Tasol em i tok i gutpela long ol lida bilong Bogenvil yet i luksave long dispela na skelim.

Wanpela bikpela toktok tu long dispela Taunsvil miting em long ol Bogenvil lida i mas wok strong wantaim olgeta birua o pait lain bilong ol long rausim olgeta samting bilong pait olsem ol sotgan, bom na olgeta birua samting ol i holim yet bihain long pait ol i bin kamapim pinis wantaim Gavman.

Mista Avei i tok ol dispela samting bilong pait i no stap olsem ol samting bilong grup o atoriti. Ol birua samting em i stap long han bilong wanwan man na i olsem samting bilong ol yet. Olsem na ol yet bai givim long laik bilong ol yet na Gavman i laik lukim ol Bogenvil lida i ken wok strong moa i go insait long dispela eria long rausim olgeta samting bilong pait.

Em i tok ol paitman bilong Bogenvil Revoluseneri Ami (BRA) i wanbel long givim ol samting bilong pait i go long han bilong Gavman long Bogenvil ailan.

Mista Avei i tok insait long dispela bung, ol mausman bilong Australia na Nu Silan tu i tokaut olsem ol i wanbel yet long helpim ol wok long Bogenvil. Tupela kantri wantaim i tok long ol bai helpim long dispela wok bilong kisim bek na rausim ol birua samting bilong pait.

Mista Avei i mekim bikpela tok amamas i go long ol lain long Taunsvil long helpim na lukautim dispela miting i kamap na tu em i tok amamas i go long ol lida bilong Bogenvil long kamapim ol gutpela toktok na tingting long dispela bung.

Aitape skul nogat rot bilong kisim ol skul saplai

RAMO komyuniti skul i statim yia bilong em long taim tasol wanpela hevi ol i gat em rot bilong trenspotim ol materiel i go long skul. Ramo i stap samting olsem 50 kilomita wes long Aitape long Sandaun provins.

Lokol Level Gavman memba bilong Ramo, Sylvester Siware i tok dispela rot em i nesenel haiwe i go long Vanimo na em i mas i gat gutpela gravel na silim.

Mista Siware i tok sapos ol minista bilong ol i tok long impruvim ol rot insait long Sandaun orait ol i mas tok tru na noken maus wara nating.

Hetmasta bilong Ramo, Mr Urban Weiten i tok ol i gat ol skul materiel bilong ol i stap long Vanimo tasol ol i nidim we long bringim ol materiel i kam long skul.

Mista Weiten i tok long hairim bot i go long Aitape long kisim materiel i go long skul em i save kostim em olsem K150.

Dioses bilong Aitape Rehabilitesen Komiti i wok long traim long pinisim ol klasrum tasol rot i bagarap na ren i wok long mekim wok bilong ol i go isi.

Dispela klasrum em i las hap wok bilong dispela komiti, komiti ya i bin kirapim ol wok bihain long sunami i bin bagarapim ol lain i stap long Aitape wes kos.

Man husat i go pas long Rehab Komiti, Steve Geri, i tok olsem long dispela wik bai ol i putim ol frem i go antap na long neks wik bai ol putim kapa na ol klasrum bai pinis long Mas tasol em tok olsem sapos i ren wok bai ron isi.

Long ol sumatin na tisa materiel ol i sot ol sampela tasol em i no stopim ol sumatin na ol tisa long skul.

Mista Weiten tu i tok olsem em yet olsem hetmasta i nogat problem long sot long tisa. "Skul bilong mi em tri tisa skul na mitupela narapela tisa i no go long ples long Krismas olsem na mipela i no hat wok long transpot i kam bek long skul, narapela i kam leit liklik tasol em i no leit tumas," Mista Weiten i tok.

Em i tok olsem neks yia bai em traim long kisim narapela tisa. Ramo komyuniti skul i gat olsem 107 sumatin na ol gren wan, tu na foa.

Lo stapim ol politiks lain long stap ausait long pablik sevans

NUPELA Lo i tokaut long olgeta politiks lain husat i wok long ol dipatmen o ol gavman bisnis i mas risain bikos ol i brukim lo.

Dispela nupele lo i kam klia bihain long Konstitusene Developmen Komisin (CDC) i bin kamapim lo bilong Intagriti ov Politikel Pati na Kendidet long palamen las yia.

Siaman bilong CDC Yauwe Riyong i tokaut las wik olsem husat politiks man olsem ol pati eksekutiv i stap wok wantaim ol dipatmen o ol gavman bisnis i mas risain hariap bikos ol i brukim lo. Dispela i sut long ol pati eksekutiv na komiti we pati bilong ol i stap long pawa na putim ol long wok olsem siaman o menesing dairekta wantaim ol gavman dipatmen na ol gavman bisnis olsem Telikom, PNGBC, Elcom na arapela moa.

Jamie Maxtone Graham, Menesing Dairekta bilong Eda Ranu i tokaut olsem em i luksave pinis long dispela lo na em i mekim plen long lusim pati na holim yet wok bilong em wantaim Eda Ranu. Mista Graham em namba tu presiden bilong Pipels Demokretik Muvmen (PDM) husat nau i go pas long Gavman.

Mista Graham i tok em i skelim na kamap wantaim dispela disisen long lusim politiks wok bilong em na holim tasol wok bilong em wantaim dispela kampani nau em i wok long en.

Long olpela Gavman bilong Bill Skate, ol i bin makim presiden bilong pati, Peter O'Niell olsem siaman bilong Finance Pacific Group of companies. Timothy Bonga ekting presiden bilong Nesenel Alaens pati i siaman bilong PNG Habours Board tasol em i stap yet aninit long saspensen.

Jacob Jamugot em sief ov staf bilong Praim Minista na em i siaman bilong Nesenel Geming Bod.

• Narapela lo tu we i kamap nau em long olgeta politikel pati i mas rejista hariap long opis bilong rejista-taim dispela opis i op long neks yia samting.

Mista Riyong i tokaut olsem nupele lo i laikim olgeta politikel pati i mas rejista o nogat bai ol i nogat go long ileksen o makim ol kendidet bilong ol.

Dispela tupela lo i kamap insait long nupele lo bilong Intagriti ov Politikel Pati na ol Kendidet we Gavman i kamapim na pasim pinis long Novemba las yia.

Bos bilong woda i laik klinim CIS

NUPELA Komisina bilong Koreksene Sevis (CIS) Richard Sikani i tokaut olsem dipatmen bilong CIS i liklik tasol i gat ol bikpela trabel na hevi i save kamap. Ol trabel na hevi olsem mani i paul, ol bosman i no yusim stret pawa bilong ol, mekim ol hait wok na pasin na ol stil pasin tu i save kamap.

Mista Sikani i tok CIS i gat ol hevi long wok bilong menesmen wantaim mani. Dipatmen i bin stap insait long hevi bilong pasin jeles insait long wok bilong menesmen na sampela bikpela hevi em ol i no save lukluk long stretim. Dispela pasin i mekim bel na tingting bilong ol woda i pundaun olgeta insait long kantri.

Mista Sikani i tok em i save olsem ol dispela bikpela hevi i stap insait long opis bilong CIS taim em i bin kisim posisen bilong Komisina tupela wik i go pinis. Olsem na em i bin tokaut long ol step na eksen bilong kari-maut long daunim na stapim ol dispela hevi.

Em i tokaut olsem hevi we ol sotgan i bin lus na i nogat rekot long en bai ol plisman i mekim wok painimaut i go insait long dispela hevi. Opis bilong Odita

Jenerel tu bai kari-maut wok bilong sekim ol buk na rekot bilong mani insait long dipatmen. Em i kamapim pinis wok painimaut i go insait long ol hevi we ol kalabus i save ronawe long ol haus kalabus insait long kantri bai sampela eksen i ken kamap.

Em i tok ol wanem kain bikpela trabel na hevi we i bin kamap long ol olpela menesmen bai em i lukluk i go insait long dispela.

Mista Sikani i mekim ol dispela toktok long opisel seremoni we em i kisim opis bilong CIS

Komisina long las wik Fraide long Bomana.

Em i tok CIS bai wok bung na klostu wantaim ol arapela wanwok dipatmen olsem plis fos na difens fos long helpim na karimaut wok bilong daunim lo na oda hevi insait long kantri.

Em i tok CIS wanpela i nogat inap ol samting bilong yusim long hevi bilong lo na oda olsem na CIS bai wok klostu wantaim ol wanwok dipatmen ya long bungim strong na wok wantaim long dispela

wanpela wok bilong lo na oda insait long kantri.

Mista Sikani i tok em i lukluk nau long kamapim sampela gutpela program insait long ol haus kalabus. Olsem na em i bai askim ol praivet kampani na ogenaisesen long kam insait long kamapim prison indastri na program insait long olgeta haus kalabus long kantri. Dispela program bai lukim ol kalabus lain i ken wokim ol samting na lainim na kisim save long mekim ol samting wantaim han na salim na mekim mani. sem taim tu ol i lainim wok olsem faktori, wok-sop, stua, agrikalsa na arapela moa.

Olpela CIS Komisina Ken Serupi i no bin kamap long dispela seremoni we em bai lusim sia bilong CIS Komisina i go long nupele Komisina. Ol bikman olsem Plis Komisina John Wakon wantaim ol arapela sinia plis opisa i bin kamap, ol opisa bilong PNG Difens fos tu i bin kamap wantaim ol mausman bilong Australia Hai Komisina, ol woda na famili bilong ol i bin stap tu long witnessim dispela seremoni bilong nupele CIS Komisina.

WANTOK

All departments. Phone: 325 2500 - Fax: 325 2579
P. O. Box 1982, Boroko, NCD, Papua New Guinea



Publishing Weekly, Thursday, for
Word Publishing Company Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Company Ltd.

General Manager and Group
Editor in Chief:
Anna Solomon.
Advertising Manager:
Mike Kanin.

Papers distributed by air
throughout PNG.
Available by air mail
subscription within
Papua New Guinea
and overseas
Email address:
word@global.net.pg

Advertising deadlines: Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd. and are set out in full on the reverse side of its official display Advertising Bookings form.

Bogenvil bung bai toktok long gavman i gat moa pawa

VERONICA HATUTASI i raitim

OL BOGENVIL toktok bai i kamap gen stat long tude Fonde.

Wantok i no kisim gut ol toktok long ples we bung bai kamap long en tasol i gat bilip olsem em bai kamap long Mosbi long tupela de na bihain ol lida i stap long bung bai go long Alotau insait long Milen Be long skruim gen ol toktok long hap.

Ol join Bogenvil lida we Gavana John Mornis na Bogenvil Pipels Kongres Joseph Kabui i go pas long en bai stap insait long dispela bung.

Long ol ripot we Wantok i kisim, bung ya bai toktok long gavman i gat moa pawa we Bogenvil i laik sanapim.

Ripot i tok narapela bung yet we Pis Proses Konsaltativ Komiti (PPCC) i go pas long en bai i toktok long rot bilong lusim ol

samting bilong pait long en. Yunaitet Nesens mausman long Bogenvil Noel Sinclair i go pas long dispela komiti.

Ripot i tok agrimen long lusim ol samting bilong pait i no bin kamap long Taunvil Australia las wik bikos ples we ol Bogenvil komanda i bin stap long en i hat na i bin gat strongpela tambu long en. Na ol man i no bin pilim fri long wokabaut, sindaun na toktok gut.

Taunsvil militari beis bilong ami em dispela ples we ol BRA na resistens komanda i bin stap long em.

"Dispela eakraf militari beis i gat ol samting bilong ami long en na em i gat strongpela tambu long raun long en. I no bin gat fridom tumas long raun na toktok gut. Na ol lain i no bin pilim olsem ples i gutpela long holim ol toktok we ol i ken skruim na kamap wantaim agrimen long lusim ol samting bilong pait long en.

"Ol komanda i no bin pilim fri bikos olgeta hap ol i laik go long en em ol ami i stap na dispela i mekim ol samting i hat tru," ripot i tok.

Tasol ripot i tok em i no sutim tok long Australia long samting i kamap olsem bikos Australia i bin kisim toktok long sot notis o toksave long dispela i no bin kamap kwiktam long givim ol taim long painim narapela ples long holim bung long en.

Ripot i tok sapos Australia i bin gat moa taim long redim ol dispela samting, ating em inap long painim narapela hap long putim ol komanda na holim bung long en.

Tasol em i tok dispela Taunsvil bung i bin gutpela bikos em i givim sans long ol komanda long toktok na sampela tu i kamapim wanbel pasin. Na nau ol toktok bai i mas go het na namba tri raun bilong em long dispela yia em i stat long tude.

Triti agrimen bilong PNG na Australia bai karamapim ol developmen projek

YAKAM KELO i raitim

PRAIM Minista bilong Australia na Papua Niugini bai sainim wanpela wanbel pepa aninit long triti agrimen liklik taim bihain.

Minista bilong Foren Afeas Bart Philemon i tokaut olsem dispela triti agrimen tupela Praim Minista bai sainim bai karamapim tu ol bikpela program we i sut long kirapim ol bikpela projek insait long kantri na Australia Gavman bai helpim wantaim mani na ol arapela sapat.

Mista Philemon i tok wanpela bikpela eria em long infrastraksa developmen program we bai i kam insait long dispela agrimen. Na ol dispela program bai sut long mekim ol wok insait long ol

provinsal level. Dispela program i sut long ol wok na projek developmen olsem rot, bris, ples balus, bris long nambis na arapela moa.

Mista Philemon i mekim dispela toktok bihain long em i kisim sampela lain Minista i kam bek long las wik Sande long bung bilong namba 13 enuel Ministeriel forum long Australia. Ol Minista husat i stap insait long dispela bung em, Minista bilong Plening na Bogenvil Afeas Moi Avei, Minista bilong Petroleum na Ges Chris Haiveta, Minista bilong Plis Jimson Sauk, Minista bilong Tred na Industri John Tekwie na Minista bilong Envaromen na Konsevesen Herowa Agiwa.

Mista Philemon i tokaut tu olsem dispela laikim bilong PNG Gavman long kisim

helpim bilong Australia long 35 pesen (%) ikwiti insait long dispela bikpela projek bilong PNG Ges Paipain em Australia Gavman i no givim. Tasol Australia Gavman i wanbel long helpim long painim arapela rot em i long kamapim dispela mani bilong helpim PNG Gavman insait long dispela Ges Paipain projek. Mista Philemon i tok Australia Gavman i no tok nogat long helpim PNG. Ol i tok long painim arapela rot bilong mekim kamap dispela askim bilong PNG Gavman. Dispela 35% ikwiti olsem \$US450 milien dola.

Bikpela as Australia Gavman i no inap mekim wanpela tok orait long wanpela mani em bikos dispela PNG Ges Paipain projek em komesel projek.

Yunion tingting long kotim Gavman long Minimam Wejes disisen

PNG Tred Yunion Kongres (TUC) i bin tokaut aste (Trinde) olsem ol i tingting long kisim Gavman i go long kot long toktok bilong Minimam Wejes.

TUC Seketeri, John Paska i tok yusim seksen 42 bilong Industriel Rilesen Ekt long kamap long disisen bilong em. Seksen 42 i toktok long no ken oraitim ol Awod o Minimam Wejes Ditaminesen.

TUC i kwesteni aplikesen bilong seksen 42 na pasin we Gavman i bin kamapim dispela sekseh. Gavman i yusim ol toktok i stap long provisen we i toktok long disallowens o no inap larim disisen bilong Minimam Wejes i go het long sait bilong nesenel intres na pablik polisi.

Mista Paska i tok ol toktok olsem ol employa bai katim daun ol wok i no gat gutpela as. Em i tok long olgeta miting bilong Nesenel Traipatait Konsaltativ Kaunsel (NTCC), toktok bilong ol employa long lusim wok i no stret yet.

PNGTUC bai mekim ol dispela samting long soim olsem ol i no wanbel long pasin bilong Gavman:

• TUC bai givim petisen long Gavman long lukluk gen long disisen bilong em. Bai gat wanpela mas i go long Palamen. Sapos ol i no tok orait long mas bai ol yunion i wokabaut, ran o krol i go long Palamen.

• TUC bai lukluk long ol rot bilong makim ol plantesen sekta wantaim tingting bilong apim pe na kondisen bilong employem long dispela eria.

• TUC i wok long mekim wanpela bikpela

kempen insait long kantri egensim disisen bilong Gavman.

• Ol narapela rot em ol i wok long lukluk yet o painaut yet.

Long wankain taim ol yunion muvmen insait long kantri bai i no inap bau daun long Gavman long toktok bilong Minimam Wejes bikos dispela em i bikpela samting na Gavman i mas tingting long sait bilong ol wokmanmeri insait long kantri.

Nesenel Jenerel Seketeri bilong Amalgametet Jenerel Wokas Yunion, Andrew Kandakasi i mekim dispela toktok na tok Gavman i no inap giamanem ol pipel long liklik pe taim ol yet i wok long kisim bikpela pe i stap.

Long wanpela stetmen pepa, Mista Kandakasi i tok ol yunion i laik bai Praim Minista i mas rausim Pablik Sevis Minista, Philemon Embel long suvim nius i go insait long isiu o toktok bilong Minimam Wejes.

Em i tok Minimam Wejes Bod wantaim Minista bilong Leba na Emploimen i gat rait long toktok long dispela samting.

Em i tok Mista Embel i bin askim ol yunion muvmen long kantri long kisim tasol proposel bilong Gavman long K32 olsem Minimam Wej na dispela i no gutpela long pes bilong ol pipel.

"Mi singautim Praim Minista, Sir Mekere Morauta long rausim em tokim em long stretim pablik sevis mesineri na em i mas putim olgeta tingting bilong em long implimenim Pablik Sevis Menesmen Eksen Plen na Kopret Plen we ol i lonsim i no liklik taim i go pinis," em i tok.

Eluh askim ol arapela dipatmen long helpim Imigresen wok

DAIREKTA bilong Plis Kriminal Investigesen Thomas Eluh i askim ol dispela dipatmen we ol wok bilong Foren Afeas i kam aninit long ol long wok bung wantaim plis long stretim ol hevi i sut long maigresen seksen.

Ol dipatmen em long Foren Afeas, Leba na Imigresen, Odita Jenerel na Fainens.

Mista Eluh i askim ol dispela dipatmen long stretim ol samting i sut long maigresen o rot long ol ausait ovasis lain i go na i kam insait long kantri, klinim ol eria bilong ol pastaim na askim plis long helpim ol.

Em i tok ol plis investigesen long ol hevi i kamap long Imigresen Divisen bilong Dipatmen ov Foren Afeas i bin stat long las yia Oktoba na wok i go het yet.

Em i tok maski dispela wok i go het, ol ausait lain i brukim lo bikos ol i nogat stretpela tok orait pepa i wok long kam insait long kantri yet. Na insait long foapela mun taim wok i kamap, plis i holim pasim na sasim 30 pipel pinis husat i kam insait long PNG wantaim nogat gutpela tok orait pepa.

Plantilong ol dispela pipel em ol i bilong Asia moa yet Fuji long Saina. Liklik lain i bilong Sri Lanka, India na Pakistan.

Mista Eluh i tok las pela grup ya i bin bihainim Irian Jaya na Vanimo bodamak long kam insait long PNG tripela mun i go pinis.

Em i tok tupela wik i go pinis, plis i bin holim pasim faivpela Saina man bilong Fuji provins long Saina long ples balus bikos ol i kam insait wantaim nogat gutpela tokorait pepa.

Em i tok wanpela Saina bisnis man long Gordons eria husat fes nem bilong em i Willy

i bin stretim rot bilong faivpela ya we tupela em ol meri, i kam long kantri.

Plis i bin holim pasim na sasim ol na lusim ol long han bilong Foren Afeas long salim ol i go bek long Saina.

Long narapela, plis i holim pasim na Foren Afeas i salim bek 10-pela long ol Kimbe bot Saina pipel i go bek long ples bilong ol.

Long las yia, klostu 70 Fuji Saina pipel i bin go sua long Kimbe insait long Wes Nu Briten provins, tasol planti bilong ol i bin ronawe na nau ol i stap hait wantaim ol wantok bilong ol long olgeta hap bilong kantri.

Long sampela taim i go pinis, plis i bin holim tupela long dispela grup long kumu fam long 17 Mail. Olgeta ol dispela lain em ol plis i sasim na Foren Afeas i salim ol i go long ples bilong ol.


Mista Eluh i tok planti long ol dispela iligel imigren i yusim PNG olsem isi rot long go long ol arapela kantri olsem Australia.

Em i bilip olsem PNG i nogat strongpela lo long givim mekim save i go long ol ovasis lain i kam insait long kantri wantaim nogat gutpela tok orait pepa.


Em i tok kantri i wok long bihainim Maigresen lo tasol we ol lain i brukim Miagresen Ekt i save peim K200 fain o go long kalabus long siksipela mun.

Bihainim dispela, em i askim ol atoriti long glasim na skelim ol samting long apgretim dispela lo bikos sapos nogat, em i tok ol ovasis lain bai lukim PNG olsem wanpela isi ples na yusim long go long ol arapela kantri long en.





NIUGINI AILAN NIUS



Gavana Tohian i kros long Ailans Nesenea balus kampani

NU AILAN Gavana Paul Tohian i belhat long pasin we Ailans Nesenea i laik wokim long stapim sevis bilong em i go long ol liklik ailan long provins.

Dispela i bihainim wanpela we em i kisim long bos bilong kampani, Vanessa Pelgen.

Mista Tohian i tok pasin we balus kampani i wokim i kamap bikos ol i paul long singaut we em i bin mekim pastaim.

Dispela em bihain long ol pipel long ol liklik ailan i autim komplek

olsem balus i no wok long mekim raun tumas i go long ol ailan. Na Mista Tohian i bin tok gavman bilong em i wari olsem ol pipel i wok long mis aut long ol sevis.

Em i tok gavman i tingting long skruim yet balus sevis i go long ol pipel na olsem em i laik kirapim wanpela tet level balus kampani olsem bisnis han bilong gavman na kolim dispela long NIPAIR.

Gavana Tohian i tok gavman bilong em i no rausim kampani bilong

Misis Pelgen o rausim em long bisnis.

Tasol em i tok kampani (Ailans Nesenea) i wokim bikpela mani long provins na ol pipel na taim em i pinis, em i no lusim wanpela gutpela samting long ol liklik pipel insait long provins.

Mista Tohian i tok ol toktok we Misis Pelgen i wokim long wokim ol tok egens long provin-sel gavman i bin baim tupela sip bilong yusim long provins i no gutpela.

Em i tok gavman i tin-

giting long baim tripela wokbot long helpim ol pipel bilong Tabar, Tanir na Konoagil long karim ol kopra, kakau na ol gaden kaikai bilong salim long maket long en long Namatanai i go long Kavieng.

Long wankain taim tu, singaut i go long Misis Pelgen long kamaut long pablik na tok klia long pablik long Nu Ailan provins wanem gutpela samting Kostel Siping i wokim long helpim ol Nu Ailan pipel long taim kampani i bin wok long provins.

Gavana Pokawin singautim NGI rijen long wok hat na kamapim developmen

FRED RAKA i raitim

OL KAIN kalsa na pasin kastam, Ol kain rot long mekim ol samting na planti naturel risos bilong Niugini Ailans rijen em ol samting bai givim strong long rijen long muv i go het long dispela taim bilong planti senis i wok long kamap insait tu long kantri, Manus Gavana Stephen Pokawin i bin tok taim em i edresim welkam bung long Kandrien insait long Wes Nu Briten long taim ol Niugini Ailans gavana na lida i bin bung long miiting bilong ol las wik.

"Yumi mas yusim gut na bungim wantaim ol naturel risos, ol pipel na ol kalsa we i narakain long bildim strongpela yunaitet NGI rijen na tu PNG," Gavana Pokawin i bin tok.

Long wankain taim tu, ol NGI gavana na lida husat i bin stap long bung em ol i wokim kastom na mekim ol kamap olsem ol sief long Kandrien pasin kastam taim ol bin go kamap long hap long stat bilong bung.

Ol pipel bilong Kandrien i bin redi taim ol bikman i go kamap long hap.

Wan wan singsing grup i bin wokim ol tumbuna singsing na danis na kisim ol bikman i go insait long namel bilong danis eria long wokim seremoni bilong mekim ol i kamp olsem ol Kandrien sief.

Long ol arapela nius long dispela NGI lidas bung, Ekting Gavana Alex Sila i bin go pas long Bogenvil grup long dispela miting.

Long toktok bilong em, Mista Sila i bin givim apdet long ol samting i kamap long



• Ol Kandrian pipel i soim stail bilong pasin tumbuna.

Bogenvil long dispela taim.

Ol gavana bilong foapela NGI provins i bin wokim strongpela toktok long sapatim Bogenvil, moa yet long eria bilong stretim ples, wet na lukim wanem samting bai kamap long ol toktok bilong lusim ol samting bilong pait na tu, kirapim gavman i gat

moa pawa long Bogenvil.

Mista Sila taim em i toktok long ol hevi we ol pipel bilong Bogenvil na tu PNG i bin bungim long dispela pait long ailan, em bin tok tenkyu i go long ol pipel bilong Wes Nu Briten long luksave long hevi we ol Bogenvil pipel i bin stap long en.

NGI rijen i kamapim nupela developmen grup

WANPELA long ol bikpela samting we i bin kamap long Niugini Ailans gavano konpres long Kandrien insait long Wes Nu Briten las wik em long fomim wanpela rijinel grup ol i kolim long Ailans Developmen Biuro (IDB).

Wes Nu Briten Gavana Clement Nakmai long fewel dina las Trinde nait na tu taim bilong lonsim IDB i bin tok em i lukim IDB olsem samting we bai skruim ol sosel, politikel na ikonmik go het bilong NGI rijen.

IDB bai i kisim ples bilong grup we i bin stap pastaim na dispela em long Ailans Rijinel Seketeriet (IRS). Ol i fomim IDB 12-pela mun bihain long rekomendesen bilong IRS komiti we Manus Gavana Stephen Pokawin i bin go pas long en.

Luksave long IDB olsem wanpela institusen i stap pinis bihain long ol i rejistaim wantaim Invesmen Promosen Atoriti. Na ol i senisim nem long Ailans Rijinel Seketeriet i go long Ailans Developmen Biuro.

"Kirap bilong IDB em i stat bilong nupela sapta long ol pipel bilong NGI rijen. Dispela nupela grup bai i

kamap olsem as long wokim kamap ol wok developmen long rijen na inapim ol visen na ol samting we ol Ailans Gavano Kaunsil na ol Grup ov Seventin o G-17 grup i gat long en," Mista Nakmai i tok.

Em i tok IDB nau bai lukluk long rot bilong kirapim strong ol wok fiseris, turisim, bildim menpawa, wok bilong ol meri na ol planti arapela samting moa.

Wok ol i putim long IDB long wokim nau em long kirapim wanpela Ailans Developmen Beng.

Ol wok redi long dispela samting bai i kamap nau na long narapela bung bilong ol NGI gavana long neks mun long Kavieng, ol bai lukluk moa long ol wok go het bilong en.

IDB bai i karimaut ol wok long ol gren mani we ol i save givim i go long ol provins.

Olsem Siaman bilong Ailans Gavano Kaunsil, Mista Nakmai i bin singaut strong long ol brata gavana na G-17 grup na ol NGI memba long palamen long sapatim dispela nupela ogenaisesen (IDB) long sait bilong mani na lojistiks.

Sankamap maus Carlmax bai wok tripela mun wantaim Redio Australia



• Carlmax husat save toktok long Redio Bogenvil i kisim tiket bilong em long AusAID Minista Kaunsila Margaret Renault. Em bai wok wantaim Tok Pisin Sevis bilong Redio Australia we i beis long Melbon.

MAUS bilong Redio Maus bilong Sankamap o Redio Bogenvil anaunsa Carlmax Anavin i lusim kantri las wik bilong wok long Australia insait long tripela mun.

Nek bilong Carlmax i save pairap long Maus Bilong Sankamap bai wok wantaim Tok Pisin Sevis bilong Redio Australia we i beis long Melbon, stat long dispela mun.

Taim em i wok wantaim Redio Bogenvil yet, nek bilong Carlmax i save kamap long Redio Australia long Pasifik Beat program long en.

Program ya i save autim ol ripot long long ol wok bilong painim gutpela sindaun na kalsa bilong Bogenvil na ol pipel long Australia na ol arapela Saut Pasifik kantri i save long ol samting i

kamap long ailan long en.

Long tripela na haf mun Carlmax i stap wantaim Redio Australia, em bai karimaut ol program prodaksen presentesen, wokim rises na raiting, karimaut ol intevyu na raitim ol ripot, tanim nius na wok olsem anaunsa long ol brotkas i go long sautwes Pasifik we i karamapim PNG, Solomon Ailan na Vanuatu.

Taim em i givim balus tiket i go long Carlmax, Minista kaunsel bilong AusAID Margaret Renault i bin tok gavman bilong Australia na pipel i gat wok long helpim Bogenvil na pipel bilong em i kisim bek gutpela sindaun.

"Redio Bogenvil bai go het strong long mekim wok bilong autim ol kliapela na tu-

pela infomesen long ol samting i kamap long Bogenvil. Long las yia gavman bilong Australia i bin tromoim K3 milien long bildim nupela transmista na tu long stretim na aggre-tim brotkasting na ol arapela samting bilong Redio Bogenvil," Misis Renault i tok.

Long skruim sapat long wok bilong painim gutpela sindaun na stretim ples long Bogenvil, AusAID i givim ol print, odio na video metiriel i go long Infomesen Divisen na Bogenvil Interim Provin-sel Gavman long helpim ol wantaim ol wok bilong pis aweanes na media kempain long ailan.

Tu AusAID i baim na givim 22 hai frikwensi redio i go long ol helt senta na distrik opis long Bogenivl.



Biabia BIABIA GO PILAI GOLF... EM TING GOLF EM ISI TRU LONG PILAI...
EM ISI TRU LONG PILAI! MI PAITIM BAL TASOL IGO LONG OL HUL...

PUFF! PUFF! WAK!

BAGIA KARIM BEG NA WOKA-BAUT...

BIABIA... GIVIM BEG IGO LONG OL BOIS I KARIM... WOK BILONG OL!
SSH! NOKEN BISI! MI KEN KARIM BEA BILONG MI!




TAIM OL I KAM LONG NAMBA FOA HOL BIABIA I SOTWIN OLGETA...


TAIM BILONG BIABIA I PILAI TASOL NOGAT... EM SOTWIN OLGETA NA INO INAP HOLIM GUT GOLF STIK...



PLEASE! KOL-WARA! HARIAP!



SEPIK NUIS



Karaite Lupai rot kisim K100,000

MATHEW PAIYAU i raitim

MAK mani inap long K100,000 i stap pinis long treseri long Aitape long wokim Karaite-Lupai rot insait long inlen Aitape eria. Dispela mani i kam aninit long Rural Impruvmen Fan bilong Aitape-Lumi distrik aninit long lukaut bilong Mema bilong Aitape-Lumi, Eddy Saweni.

Rot bai i stat long Karaite na bai konektim Lupai na Yongite arere long maunten Simoro. Dispela rot bihain bai join wantaim rot i kam daun long

Fatima long sait bilong Lumi. Pai Risos kampani, kampani bilong ol papagraun we dispela rot bai i kamap, bai i lukluk long konskratim dispela rot wantaim sapot bilong C.T.H.L. C.T.H.L em i wanpela developa i bin wiim kontrak long developmen oil pam projek long Pai Risos eria taim olpela developa, Damansara, i bin lusim bihainim hevi bilong mani.

Pai Risos kampani i lukluk long yusim fri ol mesin bilong C.T.H.L long konstraktim rot na menjimen bilong Pai Risos

bai i toktok wantaim C.T.H.L. menjimen.

Pai Risos i laik yusim mesin fri bikos dispela rot i bin stap long ergo-forestri developmen plen bilong Damansara insait long Pai Risos eria em C.T.H.L nau i tekova long en.

Tasol distrik administreta, Martin Selmatin, i tok administresen bai i painim narapela kontrekta sapos C.T.H.L i no givim tok orait bilong en hariap. Nau yet Aitape administresen i wetim kwotesen long W & R Parer, C.T.H.L na Dipatmen bilong Woks long Aitape.

Vanimo Green distrik baset i kisim tok orait bilong JDBP komiti

FELIX RAMRAM i raitim

MEMBA bilong Vanimo Green na Vais Minista bilong Tred na Industri i amamas long Join Distrik Baset Praioriti Komiti bilong Vanimo Green. Long luksave long ol hevi i stap longpela taim stat long 1999 i kam inap 2001. We planti long ol projek i slip nating i stap we i nogat wok kamap i kamap long ol, maski ol projek ya i kisim fanding pinis.

Insait long namba wan miting bilong dispela komiti las Fonde, komiti i givim tok orait bilong en long rausim olgeta mani bilong ol dispela projek stat long 1999 i kam na putim olgeta long wanpela plet. Olgeta dispela mani i kamap olsem K3.5 milien, na olgeta dispela mani komiti i tok orait long baim olgeta i go insait long wokim ol rot insait long Vanimo Green distrik. Na dispela i karamapim tu olgeta mani bilong 2001/2002, we i min olsem ol narapela projek bai i no inap kisim fanding.

As bilong dispela i kamap tu i stap long ol bosman bilong provins, ol bosman bilong ol divison na ol distrik menesa. Husat long ol i isi tumas long mekim wok bilong ol tu long lukim ol dispela projek i kirap. Planti long ol projek we i mas kamap pinis insait long distrik i no inap long kamap bikos ol "plen i no stap stret long ples bilong ol, olsem bai ol wok i ken go het", Komiti ya i tokaut.

Ol rot bai i kisim fanding bihainim tok orait bilong Vanimo Green Komiti em Vanimo Green rot bai kisim K1.5 milien; Bewani Schotchiao rot bai kisim K600,000; Vanimo Wutung rot bai kisim



• Bisop Cherobim Dambui long taim em i bin wokim las lotu na bung wantaim ol pipel bilong em long Wewak. Em i sanap wantaim Bisop Michael Marai. Foto: BRADLEY NAVI.

K500,000 na lmonda Waris rot bai kisim K500,000.

Siaman bilong Join Distrik Baset Praioriti Komiti Micah Wes i tokaut olsem. "Husat ol grup olsem yut, sios, grup bilong ol meri na wanwan man, i laik kirapim ol liklik projek bai i mas salim aplikesen bilong ol i go stret long opis bilong LLG bilong ol na i no kam long opis bilong Mema bilong Vanimo Green. Lo bilong rifom i as bilong dispela senis i kamap na olgeta i mas bihainim dispela rot bilong kisim helpim mani long kirapim ol liklik projek insait long ol ples."

Mista Wes olsem siaman bilong komiti i tokaut olsem faivpela LLG insait long distrik aninit long dispela baset bai kisim K40,000 wanwan long ol. Na dispela i K24,000 moa long 1999/2000 baset we ol LLG i bin kisim K16,000. Antap long dispela helpim mani bilong Vanimo Green Mema i go long ol LLG, ol LLG bai i kisim narapela hip mani aninit long mani ol i kolim Taid Grent em Nesenei

Gavman yet bai i givim.

Mema bilong Vanimo Green i tokaut olsem bikpela namba bilong ol pipel i stap long ol eria insait long bikbus. Na bikpela namba bilong mani ol i kolim Rurel Developmen Fan, ol dispela lain pipel i no kisim helpim long en. Bikos bikpela namba bilong dispela mani i mas go ken long ol projek insait long eben eria na dispela i no stret.

"Na mi kisim dispela taim tu long singaut strong long faivpela LLG presiden wantaim tu meya bilong Vanimo taun, Mista Mathew Sangu long noken yusim mani bilong narapela projek i go long narapela ol projek we i nogat tok orait bilong komiti. Dispela paul pasin i bin kamap planti taim pinis na i bikpela as pipel i no lukim trupela developmen i kamap long hap bilong ol. Na dispela i mekim planti pipel i ting olsem memba i no save givim mani long kamapim ol kain developmen em pipel i laikim long en,"

Mista Wes i tokaut.

Rotari Klab givim yunifom long kalabus grup

ESTHER HARO i raitim

OL memba bilong Prisen Felosip Grup long Beon haus kalabus nau i gat ol yunifom na ol intramen o ol samting bilong mekim musik bilong ministri bilong ol. Dispela helpim i kam long Rotari Klab bilong Madang yet.

Presiden bilong Rotari Klab, Dokta Hal Daniel i tok ol i yusim namel long K500 na K600 long baim tupela yukelele, sikspela gita na ol blupela kala materiel.

Em i tok Klos Nabaut, wanpela seken hen stua i donetim 30 waitpela snot wantaim ol

nek tai.

Donesen na help Rotari i givim i olsem wanpela komyniti bes projek.

Dokta Daniel i tok: "Mipela i kisim tripela proposel long Paul Fuglestad husat i wok wantaim Yut wantaim Misin. Long dispela mipela i bin makim long helpim Prisen Felosip Grup."

Prisen Felosip Grup i bin stat long las yia olsem pat bilong program bilong helpim ol kalabusman.

Long Sande grup ya i save go lukim ol manmeri bilong kainkain sios long holim felosip o lotu wantaim ol.

Diwain Wod Kaunsela,

Rosie Weldon husat i wanpela memba bilong Rotari Klab i tok ol kalabus lain bai filim gutpela long ol nupela yunifom bilong ol.

Ol kalabus lain bai werim waitpela snot na pasim blupela laplap na dispela bai mekim ol filim gutpela long sanap long ai bilong ol pipel.

Ol yia wan studen bilong Rilijes Stadi i helpim Mis Weldon long samapim ol laplap insait long pastorel ke klas bilong ol.

Wanpela kalabus meri, Alexia Kaku i tok em i amamas long nupela yunifom bilong ol.

I gat tenpela kalabus lain husat i stap long dispela grup.

Daiosesen Katolik Yut Bod miting

DAIOSESEN Katolik Yut Bod bilong Aitape Daioesen i bin holim 2001 Bod miting bilong en long Aitape long 27 Februari long toktok long Daioesen Yut Pastrol Program.

Ol lain i bin kamap long dispela miting em Daioesen Yut koodineta Gerald Towun, Yut Sepin Fr Gianni, St Anna bilong Yankok Sab Dineri, Yut Spiritual Direkta Lumi Fr Noberi, Yut Siaman Lumi Dineri Terence Eki, Yut Spiritual Direkta Aitape Br Morris, St Ignatius Kalidrel Peris Yut presentativ Alice Yeni na Diken Joes Amenos olsem obseva.

Bipo long ol i go insait long toktok bilong program, ol i bin lukluk long kamapim as tingting bilong dispela program, program bai i sut long wanem samting.

Aitape Daioesen Yut koodineta, Gerald Towun i tok wanem

ol samting ol bai putim insait long dispela Daioesen Yut Pastrol Program bai sut long toktok bilong Pop 'Yupela ol yut wasman bilong moning san kamap i go long nupela milinim."

Mista Towun i tok toktok bilong Pop i sut long toktok bilong Profet Aisais long baibel (21:11-12). Em i tok Pop i lukim ol yut olsem bun tru bilong karim wok sios long bihainim.

Em i tok as tingting ol i bin kamapim bilong dispela program em lidasip trening. Ol tingting insait long dispela trening em 1. Kristen lidasip, 2. Moden lidasip na 3. Tredisenel lidasip. Dispela ol trening bai stat long 7 i go pinis long 17 Mei 2001.

Mista Towun i tok ol lain husat bai i stap insait long ol dispela skul em ol yangpela manmeri husat ol wanwan yut grup insait long wanwan peris

i makim.

Em i tok bihain long dispela lidasip trening ol lain husat i bin stap long trening bai i go bek long hap bilong ol na givim gen trening long ol yut lida. Dispela i bilong helpim ol yut lida long supavaisim gut ol yut long rere long 2002 Aitape Daioesen Yut reil long Nuku. Reil bai sta long 13 i go pinis long 20 Januari.

Mista Towun i tok tu olsem ol bai i holim tupela kain trening, wanpela bilong ol Katolik na narapela bilong ol yut bilong ol narapela sios na ol husat i no stap insait long wanpela sios. "As tingting bilong Katolik Sios em long helpim ol yangpela long kamap gutpela manmeri."

Miting i bin lukluk tu long ol hevi bilong ol yut na wanem ol samting i kamapim ol dispela hevi na nogat luksave bilong Gavman long wok yut bilong Daioesen.

trukai. RICE

SAPOS NAMBA BILONG YU ISTAP LONG HIA YU WINEM K200

PACK

F01213070	B01654658	B00871496	A01150634
C01243126	A01606981	E00911885	
D01631109	E03345894	D01624365	

LONG KISIM PRAIS BILONG YU. GO LONG TRUKAI DISTRIBUTION CENTRE.

HRD Savi 3839

SAUTEN RIJON

Pater Bernard Ekako bai lusim Gerehu

DANIEL MONA i raitim

KATOLIK pris na man i save go pas long wok bilong yut long Gerehu, Pater Bernard Ekako bai lusim Gerehu paris na go wok long Wes Nu Briten provins long neks wik. Dispela senis i mekim planti manmeri bilong Gerehu paris i kirap nogut long harim long las wik Sande misa.

Reveren Pater Bernard Ekako i bin wok pris long asdaiosis bilong Mosbi taim em

i go long Gerehu Sen Charles Lwanga Paris long 1995.

Long taim em i bin wok pris long Gerehu paris, em i bin mekim kamap planti gutpela senis long sait bilong wok lotu na menesmen wok long komyuniti.

Taim em i bin stat wok em i save go raun long banis wanwan bilong ol Katolik manmeri na lotu wantaim ol na strongim kristen bilip na pasin bilong ol gen. Ol pastorel kaunsil bilong paris i save go pas long wok bilong administresen long wok

bilong sios na em yet i save go het long wok bilong spirit na pastorel wok namel long ol manmeri.

Planti paris manmeri i kirap nogut tru long harim em i tokaut long dispela senis bai i kamap long em long taim bilong misa. Planti i tok ol i no amamas long dispela disisen bilong MSC Suparia na Asbisop Brian Barnes long salim em. Ol i tok Pater Bernard Ekako em i mas stap long Mosbi.

Wanpela olupela yut spirituel kodineta, Agnes Mona i tokaut

olsem Pater Bernard em wanpela gutpela pris tru we i save gat taim na bel long ol yangpela long wok bilong ol.

Maino Kireva, Yut Lida i tok sapos Pater Bernard i go bai dispela i daunim tru amamas na bel bilong planti yangpela insait long paris. Em i tok Pater Bernard em i wanpela pris husat i save soim na bihainim wanem samting sios i save tok-tok long en. Em i tok planti pris i save kamap olsem ol bikpela man long ol pipel i lukim tasol Pater Bernard em nogat. Em i

Pasin kastam em i bikpela samting long Japan



VERONICA HATUTASI i raitim

JAPAN i save givim bikpela luksave na i laik holim pasim long ol pasin kastam bilong em.

Long las Fraide Mas 3, Japan i bin selebretim festival bilong ol doll we long tokples bilong ol em ol i save kolim long "Hinamatsuri".

Festival ya i bilong pre long gutpela taim na helt bilong ol yangpela meri long Japan.

Bilong amamasim dispela de, Eri Tanaka em meri bilong Ambaseda bilong Japan i bin holim wanpela lans na singautim ol nius manmeri long tok klia long dispela festival naol pasin

kastam we i go wantaim dispela festival.

Long pasin kastam bilong ol Japan, ol i bilip olsem long dispela festival bilong Hinamatsuri, ol i wokim seremoni klostu long wara we ol i karim ol dol we ol i bilip ol pasin nogut bilong ol man i stap insait long ol. Na taim ol i wasim long seremoni klostu long wara, dispela i karim olgeta pasin nogut na sinpasin i go na ol manmeri na komyuniti i kamap klinpela gen.

Em i tok long Japan dispela festival i save kamap long olgeta yia na taim em i pinis, ol i save putim gut ol dol long ol bokis na wetim narapela festival we bai kamap long narapela yia gen.

K24 milien skul projek bilong NCDC i ron gut

HELEN REI i raitim

NESENEL Kapitel Distrik Komisn (NCDC) edukesen projek long kirapim gut ol skul insait long siti i wok long go gut we i lukim tupela projek bilong Koki praimer i na Gerehu hai skul i bin pinis.

Dispela K24 milien NCDC projek i bin stat long pinis bilong 1999. Na long mun Mei 2000 olgeta wok i stat.

NCDC Edukesen Dairekta Tom Gesa i tokaut olsem dispela projek i bihainim wok bilong edukesen rifom. Namba wan program bilong edukesen rifom i kamap gut pinis we olgeta komyuniti skul insait long siti i bin kamap olsem top ap praimer i skul.

Namba tu program bilong rifom em long kamapim ol samting we skul bai yusim na NCDC bai putim mani i go long ol wok bilong stretim graun na ol bilding na ol bikpela wok bilong skul. Dispela em aidia bilong Nesenel Gavman long kamapim ol infrastraksa developmen long ol skul na NCDC i wok long karimaut dispela.

Mista Gesa i soim amamas olsem bihain long 10-pela krismas bai olgeta olupela bilding na ol samting bilong skul bai raus na ol nupela skul bilding o haus bai kamap na sanap.

Sapos Gavman ino bin rausim (saspenim) pawa bilong olupela NCDC politikel lida bai ol dispela projek i no inap kamap. Ol mani we i save long planti ol rong eria bilong sosel sevis na i bin paul nabaut, nau i go stret long wok bilong kirapim na stretim gut ol skul projek, Mista Gesa i tok.

Bihain tasol long NCDC i saspensen long 1999, NCDC edukesen opis i bin kamap na long Oktoba 3, 1999 Mista Gesa i kisim opis. Em bin lukim ol eria bilong edukesen we mani i mas go insait long en long strongim na kirapim. Na wantaim ol 8-pela wokmanmeri opis bilong em i gat, em i lukim olsem ol dispela program na wok i kamap.

Long las yia ol i makim Tom Gesa olsem Deputi Siti Edministreta long Novemba las yia.

Mista Gesa i tok edukesen projek istap long nupela stat bilong em na i wok long kamap gut isi isi, tasol ol wok i wok long ron gut nau.

Koki praimer i skul i kisim foapela nupela klasrum na Gerehu hai skul i lukim 6-pela nupela haus slip bilong ol tisa wantaim foapela nupela klasrum we L&A Construction kampani i pinisim long las yia.

I gat foapela arapela projek we inap long pinisim tu long dispela taim. Ol dispela projek em Hohola praimer i skul wantaim 6-pela nupela klasrum na Eki Vaki wantaim foapela nupela klasrum. Dispela tupela projek i no kamap hariap bikos long hevi bilong mani L&A Construction kampani i gat wantaim mani.

Ol projek we wok i kamap pinis long en na i wok long go het yet em Niu Erima foapela haus slip bilong ol tisa na foapela klasrum, Waigani praimer i skul wantaim 8-pela klasrum na wanpela toilet eria, Philip Aravure wantaim foapela haus bilong tisa na 6-pela klasrum na Baruni wantaim 6-pela klasrum na foapela haus bilong ol tisa.

Mista Gesa i tok tendas bod i bin bung las wik na kontrakta bilong ol arapela projek bai ol i givim aut sampela taim bihain.

Ol dispela projek em Ororo praimer i wantaim foapela haus bilong ol tisa, St John wantaim 6-pela klasrum, Boreboa wantaim foapela klasrum, Morata wantaim foapela klasrum, Jubili Katolik sekenderi skul wantaim foapela haus bilong ol tisa, Daugo wantaim foapela klasrum na foapela haus bilong ol tisa, St Michael wantaim 6-pela klasrum Tatana wantaim foapela haus bilong ol tisa na foapela klasrum, Kaugere wantaim 6-pela klasrum, Moitaka wantaim 6-pela klasrum na Kila Kila Sekenderi wantaim foapela haus bilong ol tisa.

Kontrak bilong ol dispela projek bai ol i sainim neks wik na wok bai i stat long mun Mas.

Mista Gesa i askim olgeta papamama long amamas bikos ol pikinini bilong ol i kisim gutpela helpim i kam long NCDC wantaim ol nupela klasrum na ol samting bilong skul lokng helpim ol long lainim ol samting long klasrum.

Em i askim ol papamama long helpim lokng wanem kain rot ol i ken mekim long helpm ol pikinini bilong ol i ken skul gut.

Mipela i askim ol papamama long stap isi sapos ol i no bin kisim helpim long ol projek bilong ol long dispela yia bikos ol bai kisim long bihain. Em i bikpela samting nau long ol papamama i mas redim ol yet na stretim gut skul fi bilong ol pikinini bilong ol i stap redi, em i tok.

Dispela Wik

Beef Brisket per kg	K6.50
Saveloys per kg	K4.95
Diana Tuna 380gr	K2.40
Sunshine Milk 200gr	K2.90
Omo 200gr	K1.69
Heinz Tomato Sauce	K2.09

Supa Spesol Prais!

Spesols!

Roots Rice 10kg	K12.92
Power Rice 1kg	K1.60
Globe Corned Beef 300gr	K2.20
Fabulous Pork Luncheon 170gr	K1.42
Bluebird Sardines 425gr	K1.98
Modess Regular 10	K2.95

EXTENDED TRADING HOURS
 Monday to Wednesday - 5.00am to 7.30pm
 Thursday / Friday - 5.00am to 8.00pm
 Saturday / Sunday - 5.00am to 7.00pm

Planti moa kaikai prais i go daun long en!
 Ph: 325 7566, 325 7310 Fax: 325 7096



Hailans Nius

Niningi apim nem bilong ol Imbongu Elementri tisa

JOE KANEKANE i raitim

ADMINISTRETA bilong Sauten Hailens Provins, Pila Niningi i tokim ol elementri tisa bilong Papua Niugini i ki lain long bihain taim bilong kantri na ol i mas amamas olsem ol i wokim dispela kain wok.

Mista Niningi i tok planti lain i ting olsem dispela em i liklik wok tasol helpim ol sumatin long kisim save long mekim ol i kamap ol bikpela saveman na meri long bihain taim.

Em i mekim dispela toktok bihain long em i bungim ol elementri tisa bilong Imbongu distrik we em i mumuim wanpela pik na tok tenkyu long wok bilong ol.

"Yupela nambawan tisa bilong ol pikinini. Sapos yupela i no skulim ol gut bai ol i no kisim save gut. Wok bilong yupela em i nambawan tru na mi amamas long lukim olsem yupela i wok hat," Mista Niningi i tok.

Em i tok wok i hat tasol em i save ol lain i gat laik long wokim dispela wok na planti ol skul pikinini i ken amamas olsem i gat dispela ol tisa.

Mista Niningi i tok gavman bilong em i pasim pinis planti mani long wokim wok bilong ol skul long provins i gat sampela mani i stap

long elementri skul.

"Olgeta level bilong edukesen i gat mani long surukim wok bilong ol na elementri tu i gat sampela rot we ol i ken kisim helpim," em i tok.

Luke Kaile bilong Kou Elementri skul i tok em i amamas olsem administreta i luksave long wok bilong ol.

"Mipela i save kisim taim tasol

nogat man i save luksave long wok bilong mipela. Em i gutpela olsem administreta i luksave long wok bilong mipela na em bai helpim," Mista Kaile i tok.



• Mista Niningi i tok amamas long Jeff Mona bilong lmi Elementri skul, bihain long em John Oseah i sanap wantaim ol moa tisa. Foto: JOE KANEKANE

Man sutim tupela yut bilong birua lain

BRADLEY NAVI i raitim

LONG Fonde, Februari 22 long hap pas 7 moning, wanpela man wantaim wanpela M-16 masin gan bilong ples Waiminokun traip i bin wokabout long graun bilong Yoken klen na sutim dai tupela yut long birua traip bilong Iroken long Wapenamanda Distrik.

Tupela yut ya i mekim gred faiv na seven long praimer skul. Sampela lain i bin ripot olsem tupela yut ya i bin karim kunai gras long haiwe i go long haus taim man ya i kamap na sutim tupela.

Ol man long traip bilong tupela yut i dai i bin kirap hariap tru na banisim na kilim dai dispela man wantaim gan klostu long Pombupus Peris Sios na Vokesenel Skul. Ol birua i katim bodi bilong man ya na tromoi nabaut long gras. Ol ai witnes i tok ol birua i kisim gan bilong man ya.

Tupela birua i bin sut i go kam long gan long moning i go inap long apinun. Krai na bel sori i bin kamap i bin bikpela tru.

Pater Joseph Mesa (SVD) husat i save go lukim peris planti taim i bin stap taim dispela hevi i kamap tasol Peris pris i no bin stap na Pater Mesa i bin go long Wabag na ripot long Bisop Arnold Arowae long ol samting i bin kamap.

Tupela traip i bin makim ples bilong pait antap long maunten na pait. Tupela birua i bin mekim tok promis long pait i no inap go daun long klen bilong Yoken. Man wantaim gan i bin dai long graun bilong Yoken. Bihain tupela traip i bin tok sori long ol samting i bin kamap long graun bilong Yoken.

Ol Palamen lida lusim tingting long ol vota

OL pipel long kantri i mas no ken bihainim ol giaman toktok bilong ol selfis na gridi politikel lida long ol samting ol i save mekim taim ol i stap long pawa olsem long dispela taim we 2002 Nesenenel Ilesken i kam klostu.

Wanpela viles komyuniti lida long Simbu, Paul Nengero i mekim dispela toktok na tok ol 109 Memba bilong Palamen i no mekim gut ol wok

bilong ol we ol i sapos long makim maus bilong ol lain husat i votim ol long go long Haus Palamen.

Mista Nengero husat i bilong Toromanno viles long apa Simbu eria i tok planti bilong ol lida nau i laikim pawa na glori na ol i no tingting long wok bilong ol.

Em i tok ol lida bai bihainim wanem rot long kisim tras na tingting bilong ol vota bilong ol taim ol i mekim plan-

ti rong pasin olsem stilim ol pablik fand na long wankain taim ol i hangamap strong long pawa. Ol i mas planim het bilong ol insait long wesana.

Bikman ya i toktok moa olsem long ol westen demokrasi, sapos wanpela Palamenterien i mekim rong, em bai risain wantaim digniti. Long PNG politiks, yumi gat narapela kain stori stret.

Plis i sasim Gavana Agiru long stilim mani

DEPUTI Plis Komisina, Sam Inguba i tok ol plis i kisim na sasim Gavana bilong Sauten Hailens olsem wanpela longpela wok ol plis i mekim long paitim korapsen long kantri.

Mista Inguba i tok amamas long wok bilong ol lain diktektiv husat i karimaut dispela wok painaut na tok moa long hap bilong K1 milien bilong ol pablik fand i bin go insait long pesenel akaunt bilong Gavana na em i bin yusim taim em i stap long pawa.

Ol fail bilong Mista Inguba i soim olsem K585,611.04 i bin go long pesenel akaunt bilong Mista Agiru namel long Mas 13, 1998 na Julai 28, 2000 na ol mani ya ol i bin rausim na kainkain pipel i bin yusim.

Plis i bin sasim tu administreta bilong dispela saspen provinsel gavman, Donald Ramanong long sevenpela kaunt bilong stilim ol plablik mani.

Mista Inguba i tok korapsen long kantri i bikpela tru na plis bai pait strong long rausim dispela pasin.

I gat planti ol toktok bilong pasin korapsen insait long kantri na plis i save long dispela olsem na ol lain i mekim rong i mas lukaut bikos ol plis

bai i no inap malolo inap ol i putim ol long kot.

Mista Inguba i tok plis wok hat long mekim wok painaut long kisim ol pipel husat i stap insait long wait kola kraim tasol ol i nidim asistens bilong olgeta sekta bilong komyuniti long mekim ol wok bilong ol.

Korapsen em i bikpela samting na em i bagarapim demokretik sosaiti bilong yumi tasol ol lo enfosmen ejensi, ol bisnis na praivet sekta, ol sios, ol yut grup, grup bilong ol meri, ol gras rut lain na olgeta manmeri bilong PNG i ken senisim dispela pasin sapos ol i sanap wantaim na jonim plis long stapim korapsen.

Plis i wok yet long mekim wok painaut long ol pipel husat i wok long Gavman na ol narapela bisnis oganaisesen bilong Gavman na bai ol i sasim ol taim ol wok painaut i pinis.

Wok bilong painaut i no liklik samting na Mista Inguba i tok ol i nidim ol help bilong ol pipel husat i gat save long ol kain samting long helpim ol long kisim stret ol infomesen bipo long ol plis i sasim ol man i mekim rong.

Em i tok plis i nidim fanding long mekim gut ol wok bilong ol.

The sweetest thing
Great for a picnic
Great for the office
Great for the village
Now that's refreshing

RAMU
RAMU
SUGAR

NATIONAL
No.1
2 in 1

A combination of 25 Ramu Sugar sachets of sweet cane sugar from the Ramu Valley and 25 National No.1 Tea bags of carefully selected tea leaves from the Highlands

SWIPE & WIN

COMPETITION

Competition starts on the 5th of March and ends on the 4th April 2001




Simply swipe your SaveCard and you could be a lucky winner.

Commencing 14th March 2001, 20 of PNGBC's branches nationwide will each be drawing three (3) EFTPOS receipts every week for three weeks. That's 60 lucky SaveCard holders per week.

- 20 Weekly Prizes : 1st Prize K200
- : 2nd Prize K150
- : 3rd Prize K100

- Major Draws : On the 4th April 2001, 20 lucky winners will receive K500 each



HOW TO ENTER:

1. It's very simple. When you use your SaveCard at a merchant to pay for your purchase, bills or to get cash, do not throw away your EFTPOS receipt.
2. Write your name, address and contact number on the back of your EFTPOS receipt and place it in an entry box provided at your local PNGBC branch or enclose it in an envelope and post it to your nearest PNGBC branch. Selected stores will also have entry boxes.
3. Receipts should be lodged by 12noon every Wednesday for each week's draw.
4. Each week, 20 of PNGBC's branches will draw three (3) lucky winners.
5. Each week, the names of the sixty (60) lucky winners will be published on Fridays in the daily newspapers.
6. Prizes for the competition will be automatically credited to the account shown on the winning EFTPOS receipts.
7. The competition is open for EFTPOS receipts obtained from the 5th of March 2001 up to and including the 4th April, 2001.
8. EFTPOS receipts for the Grand Draw should be lodged no later than 12pm on Wednesday 4th April, 2001.
9. Competition closes on the 4th April, 2001.
10. All PNGBC staff and their immediate families are not eligible to enter this competition.
11. The promoter's decision in relation to any aspect of the competition is final and binding on each person who enters. No correspondence will be entered into.



WE'RE YOUR BANK

ALOTAU PO Box 260, Alotau
BOROKO PO Box 1635, Boroko
BULOLO PO Box 85, Bulolo
GOROKA PO Box 84, Goroka
KAVIENG PO Box 45 Kavieng

KAINANTU PO Box 255, Kainantu
KIMBE PO Box 203, Kimbe
KOKOPO PO Box 56, Kokopo
KUNDIAWA PO Box 5, Kundiawa
LAE PO Box 104, Lae

LAE MARKET PO Box 1263, Lae Market
LORENGAU PO Box 147, Lorengau
MADANG PO Box 448, Madang
MENDI PO Box 86, Mendi
MIL HAGEN PO Box 77, Mil Hagen

PORT MORESBY PO Box 78, POM
POPONDETTA PO Box 83, Popondetta
TABUBIL PO Box 13, Tabubil
WEWAK PO Box 71, Wewak
WAIGANI PO Box 169, Waigani

Lae Nius

Sam Sawe rausim Sengero bihainim moa hevi



Memba Ginson Saonu i givim ol tuls i go long ol pipel bilong Sikam na Umum ples long stat wokim rot bilong ka.

YAKAM KELO i raitim

MOROBE Provinsal Eksekutyutiv Kaunsil (PEC) i bin luksave olsem olpela administreta Ainea Sengero i bin kamapim sampela moa hevi antap long hevi em i gat pastaim wantaim Morobe Gavman we ol i bin rausim em i go aut long wok.

Kabinet i bin lukim olsem ol dispela nupela hevi i bikpela hevi we i ken rausim em long wok na pinisim em olgeta long wok bilong em.

Tripela nupela hevi we PEC o kabinet i bin glasim em;

- Mista Sengero i bin oraitim kontrak bilong Biar Garaina rot i go long wanpela kompani we i nogat tenda i bin kamap long en. Na tu tendas bod i no bin sindaun na glasim rekot na wok bilong dispela kompani wantaim ol arapela kompani husat i bin aplai long winim dispela projek. Wantok i holim nem bilong papa bilong dispela kompani. Dispela Biar na Garaina rot em bipo Yamandi Bros i bin go pas long wokim tasol ol i bin stapim bihain long sampela

hevi i bin kamap namel long ol asples na ol wokman bilong kompani. Provinsal Gavman i laik skruim dispela wok i go het yet na i laik putim tenda tasol taim dispela wok i no kamap yet em wanpela kompani i kisim pinis dispela projek.

- Wanpela hap banis insait long Lae siti we Morobe Provinsal Trenspot Pul i stap long en i no bin wok moa bikos olgeta Divisen yet i lukautim fiul na bensin bilong ol ka bilong ol. Dispela hap banis istap nating tasol Morobe Provinsal Disasta na Emejensi Sevis i kisim long kamapim opis bilong ol long lukautim na mekim wok bilong ol hevi insait long Morobe provins. Tasol Sam Sawe i kirap nogut long luksave olsem dispela papa bilong kompani i gat nem gen long dispela hap graun na banis. Dispela papa bilong kompani i laik wokim bisnis long dispela banis na em bai rausim opis bilong Morobe Provinsal Disasta na Emejensi Sevis i go aut.

- Taim Mista Sengero i bin stap aninit yet long saspensen o ausait yet long opis, em i bin go long

Mosbi na haiarim ka bilong MI Rent a Car na raun wantaim sampela Morobe lida long Nesenel Palamen we ol i wok long toktok raun egensim Gavman bilong Gavana Luther Wenge. Draiva bilong wanpela Palamen memba bilong Morobe i bin draiv raun na bamim dispela haia ka na bagarapim olgeta we papa bilong kompani i sasim Morobe Gavman K38,000. Tasol Morobe Gavman i go long kot na tokaut olsem dispela kos i kamap long Mista Sengero taim em i stap aninit long saspensen na kos bilong dispela bagarap i mas go long Sengero yet.

Morobe Provinsal Gavman i bin salim pas i go long Mista Sengero long sainim tasol em i tok em i no bin sainim na i no laik stretim dispela kos bilong ka tu.

Long dispela as, Sam Sawe i bin sindaun las mun na skelim olgeta hevi ya na pinisim kontrak bilong Mista Sengero long wok. Kontrak bilong em long wok bai pinis long Julai 31, 2001 tasol Sam Sawe i pinisim long las mun bihainim ol dispela as.

Wenge tasol i no papa long K1.2 milien kos, ripot i tok

WANPELA insait ripot long Morobe edministresen i tokaut olsem dispela K1.2 milien mani bilong provins we i go long haiarim helikopta i no kamap long Gavana Luther Wenge tasol. Dispela kos i stap long pastaim i kam inap long taim bilong Gavana Wenge.

Ripot i tok dispela mak bilong mani i kamap bihainim wokabout na wok bilong ol dispela lain:

- olpela edministresen
- wokabout bilong Gavana wantaim ol provinsal lida insait long provins,
- ol pablik sevans i go aut long ol distrik long wok,

- helpim ol bus na maunten lain i kam long haus sik.

Ripot i tok Morobe Provinsal Eksekutyutiv (Sam Sawe) i bin bung pinis na wanbel long stapim ol arapela raun moa long helikopta. Tasol helikopta bai helpim yet ol manmeri bilong bus na maunten ples i kam long haus sik.

Insait ripot ya i tok i no gutpela long sutim tok tasol long Gavana Wenge long dispela K1.2 milien kos bilong yusim helikopta. Bikos dispela toktok i kamap pinis long bung bilong Sam Sawe na olgeta siaman na ol lida bilong provins i save na wanbel pinis long dis-

pela toktok. Dispela K1.2 milien kos na kamap long wokabout na wok bilong Gavana Luther Wenge tasol dispela ripot i tok.

Ripot ya i tok i save olsem Deputi Gavman Smith Cornelius i mekim dispela toktok tasol em i mekim wantaim belhat bikos plis i bin holim na sasim em pinis long sas bilong mani i no bin go stret insait long Wafi lokol level gavman kaunsil. Em i gat dispela kot i stap yet, ripot i tok. Wantok i traim long toktok wantaim Smith Cornelius long opis bilong em tasol em i no stap.

Kabwum pipel i laik wokim wokim rot

OL manmeri bilong Sikam, Umun insait long Seko Lokol Level Gavman Kaunsil eria long Kabwum distrik long Morobe provins i gat gutpela as long amamas nau. Long namba 27 de bilong mun Februari, 2001, wanpela bikpela bung i bin kamap long ples Ununu long tokaut na givim tuls bilong wok i go long ol pipel bilong Sikam na Umun long wokim rot bilong ol.

Memba bilong Kabwum Ginson Saonu wantaim ol wokman bilong Kabwum na Seko LLGC ol i bung wantaim ol lida bilong ples na givim ol dispela tuls i go long ol pipel.

Dispela rot bai ol manmeri yet bai mekim wok bilong ol yet. Mista Saonu i givim pinis K20,000 long dispela rot. Hap mani bai pinis na hap mani bai ol pipel yet i wok na bai ol i kisim long grup.

Mista Saonu i tokim ol manmeri olsem prais bilong fiul i go antap

na hevi bilong mani i bikpela olsem na yumi no inap wet long masin i kam na mekim wok bilong yumi. Yumi yet i mas wok long han wantaim liklik mani yumi i gat.

Dispela em developmen projek na olgeta i mas lusim tingting long kompensesen, politiks na olgeta i mas wok wantaim na daunim hevi yumi save karim long i go i kam long maunten, Mista Saonu i tokim ol pipel.

Kaunsila Mista Bimbi Gam em i tok amamas long Mista Saonu long givim helpim na em wantaim ol pipel bilong em i redi long wok bung wantaim em long pinisim dispela projek.

Ol manmeri tu i givim moa sapot long Mista Saonu long i stap memba yet bihain long 2002 ileksen na bai rot bilong ol bai kamap gut bihain long dispela.

Klostu wan tausien manmeri i bin bung long witnessim dispela wok bilong wokim rot.

TEAM UP WITH TOYOTA

COASTER BAS

Ela Motors

TOYOTA

OLGETA HAP LONG PNG

NAMBA WAN 25 SITA BAS LONG PNG !

Ol PMV bisnis manmeri husait i laik baim Coaster bas, yuken kam na lukim mipela long Ela Motors brens klostu long hap yu istap, na mipela bai halpim yupela long baim niupela Toyota Coaster bas. Tasol, yupela mas hariap na lukim mipela kwik taim!

EM7075

Trangu Apil na watpo yumi save givim long taim bilong Lent?

LITEJI long As Wednesde i singautim yumi long bihainim kastam bilong sios long taim bipo yet we prea, pasin bilong hafim kaikai na givim ol samting i go long ol trangu.

Long taim bilong Lent o taim bilong wokim sakrifais, yumi tingim bek long lukaut bilong God long yumi we em i save skruim i go yet. na yumi kisim singaut long glasim na skelim bekim bilong yumi long God long ol gutpela samting we em i givim long yumi wan wan.

Taim yumi glasim yumi yet long pasin bilong prea na hafim kaikai, dispela i skruim tingting bilong yumi long tingim ol arapela klostu long yumi na ol dispela i sot long ol samting.

Luksave na tingim long ol trangu na ol dispela we i bungim hatpela taim em i bin bikpela samting we ol Kristen manmeri yet bilong bipo i save tingim na i no long taim bilong Lent tasol.

Dispela i kamap long ples klia long sios bipo we ol Kristen i save serim ol samting olsem kaikai, klos na ol arapela samting taim ol i bung wantaim long de bilong God. Long dispela taim, ol bin save karim i go hap sea long ol samting we ol i groim long gaden na ol arapela samting moa long givim i go long ol lain i sot long ol samting insait long komyuniti long en. Ol dikon i save bungim ol samting, makim ol wanem samting bai ol i yusim long sios sevis ofa na kaikai na tilim ol arapela samting olsem kaikai na ol klos i go long ol meri na famili we papa bilong ol i dai pinis na ol arapela trangu pipel insait long komyuniti long en.

Long taim bilong Lent long PNG, ol Katolik Kristen i save soim dispela pasin bilong helpim ol trangu insait long ol komyuniti taim ol i givim donesen.

Long planti yia nau long taim bilong Lent yumi save gviiim long hrlpim ol trangu wantaim ol prea na putim ol bokis na envelop bilong putim ol liklik donesen long stat bilong Lent sisen. Taim yumi tingim ol trangu insait long komyuniti bilong yumi, yunmi tingim tu ol dispela long ol arapela kantri.

Yumi save lukim Liteji wantaim komyuniti prea. Long pasin kastam bilong Sios, ol meri i save karim ol ofa long taim bilong komyunio long en.

Long sampela kalsa i kam inap tude ol i save bringim ol gaden kaikai na ol arapela samting olsem ofa long helpim ol trangu long Sande Yukaris taim. Long taim bilong yumi tude, yumi save givim mani long en.

Tasol i luk olsem planti bilong yumi i lus tingting long as tingting bilong Lent na pasin bilong givim long laik long helpim ol arapela long en.

Pasin bilong givim em i bikpela samting long taim bilong Lent. Lent i gutpela taim bilong skelim na glasim na bihainim pasin kastam bilong sios na gviiim bikpela tingting long helpim ol trangu. Sapos olsem wanem, askim inap go long ol sios memba long karim ol samting i go long sios na putim ol long alta klostu long ren.

Angliken Sios bung long Amerika bai lukluk long ol senis

HELEN REI i raitim

OL PRAIMET o bikman bilong Angliken Sios long wol bai bung long wanpela konpres bilong ol long Kanuga, Not Karolina long Amerika long dispela mun na wanpela bikpela samting we ol bai lukluk long en em long odenim ol homoseksuel manmeri i kamap pater long sios.

Homoseksuel em ol man i marit long ol man yet na ol meri i marit long ol meri yet. Dispela pasin i kamap moa yet namel long ol waitman.

Het bisop bilong Angliken Sios long PNG Asbisop James Ayong husat bai makim sios long dispela bung i tok ol bik-

man bai toktok long traim stapim dispela i kamap long sios.

Em i tok sampela provins bilong Angliken Sios long Pasifik rijen i egensim dispela senis we i wok long kamap long sios.

I gat ol sevis bilong marit ol i wokim i stap long tupela pipel i wankain (tupela meri o tupela man).

Asbisop Ayong i tok ol i wokim ol dispela senis long inapim laik bilong ol homoseksuel pipel na i gat ol sevis i wok long kamap long blesim ol dispela kain marit.

Em i tok ol dispela kain samting i kamapim wari na bel i nogut long tising bilong sios na olsem ol bikman bilong sios

bai givim bikpela lukluk long dispela samting long bung bilong ol.

Em i tok sios i save strongim gutpela pasin na stendet long rot we ol Kristen i mas bihainim long laip bilong ol tasol i luk olsem dispela i no kamap.

Em i tok narapela bikpela samting we bung bai lukluk long en em samting we i wok long kamapim hevi insait long Angliken Sios long en. Dispela em long makim ol lain long kisim ol bikpela posisen long sios olsem pater na bisop wantaim nogat tok orait bilong komyuniti long en.

Wanpela eksampel i bin kamap em long tupela pater bilong Amerika i bin hait go long Filipins na ol i blesim ol

olsem bisop na ol i bin go bek long kantri bilong ol.

Narapela samting we bung bai lukluk long en em long poveti o sot long ol samting long wol na ol intenesenel dinau bilong ol puo kantri.

Asbisop Ayong i tok ol bikman bilong sios bai holim ol toktok na painim sampela rot we ol iken mekim ol ris na bikpela na strongpela kantri i daunim ol dinau bilong ol puo kantri.

Long 1998 bung bilong ol sios praimet we ol i bin holim long Lambert, Yunaitet Kingdom, ol bin askim ol presiden bilong ol G-8 kantri na ol lain i makim sampela ol puo kantri i bin autim ripot bilong ol long dispela samting.

Komyuniti Animesen Sevis i holim bung long Hagen

KOMYUNITI Animesen Sevis (CAS) we i hap bilong Muvmen long Gutpela Wol long nesanel level i bin bung long tupela wik long Hagen Katolik Asdaiosisen konpres senta long las mun.

Long dispela bung, tripela fultaim memba i bin bung wantaim tripela pat taim wanlain bilong ol long toktok long ol anuel plen na progrem bilong ol.

Ol pat taim grup em Bisop Giles Cote bilong Daru/Kiunga Daiosis, nupela Okseileri Bisop bilong Mosbi Cherubim Dambui, Philomen Ramram bilong Madang Daiosis na ol fultaim lain em long Pater Arnold Steffen, Sister Joan MacGinley na Bruder Peter van der Wiel.

Bung ya i bin lukluk long wok bilong nesanel grup long ol eria olsem wok wantaim we ol siksipela daiosis husat i gat daiosis Riniuwel Plen na progrem bilong ol, tripela rijinel CAS grup bilong Wewak, Madang na Hailans na wok wantaim ol sios grup ausait long Katolik Sios. Ol bin glasim na skelim ol insait wok



• Ol CAS memba long bung bilong ol long Mt Hagen.

bilong CAS long dispela taim.

Long dispela taim tu, ol bin karimaut ol wok stadi long ol lotu buk olsem "Community and Spirituality" na wanpela hanbuk em Local Church: Community and Structures.

Ol dispela buk i gat ol gutpela stiatok long Komyunio na rot long strongim spirituel sait we i inap helpim besik Kristen komyuniti long gat gutpela laip.

Bung i ripotim olsem ol i bin

gat taim bilong prea na lukluk long tok bilong Jisas we em i laikim pipel long lukautim ol yet gut bikos wanem samting i kamap em long eksen bilong ol.

Ol lain i go pas long CAS long Wewak, Madang na Hailans i stap long karimaut ol sevis we ol i makim long ol olsem holim ol ritrit, ol woksop na ol semina we i beis long riniuwel bilong sios.

"Mipela i laik toktok wantaim

ol man bilong laikim gutpela pasin long ol samting we i kamap long dispela taim olsem Sain o Mak bilong Taim, Komyuniti na Spiritueliti, Dailog na rot bilong bildim ol Kristen komyuniti long en.

Ol i ken holim ol bung long dispela samting long ol peris, ol skul, ol kolis, ol komyuniti we ol rilijes lain i stap long en, ol grup bilong ol yut, ol man, meri na ol NGO.

Sione Kami Memoriel Sios holim prea de bilong ol meri

MOA long 500 meri i bin bung na selebretim prea de bilong ol meri long Yunaitet Sione Kami Memorial haus lotu long Mosbi long las Fraide.

Ol i kolim dispela de "Intenesenel Women's Day of Prayer".

Dispela spesel de i save kamap long olgeta yia long Mas 3.

Het tok bilong dispela yia em "Informed Prayer, Prayerful Action".

Ol Kristen meri bilong Samoa i bin redim ol progrem bilong dispela de na tilim i go long ol meri long olgeta hap bilong wol i bihainim wantaim het tok ya i go pas long ol prea long dispela de.

Wanpela bikpela samting long Samoa em ol meri i gat bikpela luksave insait long famili, hauslain, komyu-

niti na sosaiti.

Long sait bilong ol sioswok, ol i pilaim bikpela hap long en.

Ekumenikel Wimens Felosip bilong ol Kristen Sios (EFCC) we ol i bin kirapim long 1981 i gat long en ol meri memba i kam long ol sios olsem Kongrikesenel Kristen Sios, Metodis, Roman Katolik, Angliken na Apia Protesten Sios. Ol bin kirapim dispela long 1981. Nau EFCC i selebretim 20 yias na wanpela long ol bikpela samting we em i kamapim em long kisim ol meri i skul long ol Tiolojikel Kolis. Na em i mekim ol wok long strongim wok bilong ol meri long olgeta eria.

Taim ol meri Samoa i singautim ol meri long wol na ol arapela brata susa long joinim ol long prea long dispela de, ol i bin tok yumi mas ting-



• Ol meri i pre na paitim han long selebretim prea de bilong ol long las Fraide, Mas 3 long Sione Kami Memorial Sios, Mosbi. Foto: IVAN BAYAGAU.

ing gut pastaim bipo yumi wokim prea na bihainim yumi pre long en, yumi mas karimaut ol samting we i soim olsem yumi ol tru manmeri bilong prea.

Sione Kami Memoriel Sios i bin pulap long ol meri i kam sea wantaim ol singsing na ol prea. Planti ol meri i bin ka

long ol sios grup, ol wimens felosip grup na ol meri grup insait long Mosbi siti. Liklik lain wokmeri i bin stap long dispela bikpela de bilong ol meri.

Salens long ol meri long dispela taim em long gat gutpela felosip o toktok na pren wantaim God na ritim buk

Baibel long save moa long en.

Ledi Roselyn Morauta i bin ges long dispela bung. Ol arapela bikmeri bilong Nesanel Kaunsil bilong ol Meri, YWCA na ol arapela moa i bin stap insait long dispela prea de.



MAN I BILIPIM LO BILONG GOD

Bikpela, yu soim mi olsem yu laikim mi tumas na yu kisim bek mi. Yu promis pinis long mekim olsem. Yu helpim mi na bai mi inap bekim tok long ol man i tok nogut long mi, long wanem, mi bilipim tok bilong yu. Yu strongim mi bai mi ken autim tok tru bilong yu long olgeta taim, long wanem, mi save bilip long stretpela tok bilong yu. Bai mi bihainim lo bilong yu oltaim.

Buk Song 119:41-44.



• Dispela em piksa bilong Kens Konsevetri haus long Australia we i gat bikpela toktok i pas yet long en. Ombudsmen Komisn nau i askim ol lida i gat nem long baim haus ya long givim ripot.

PNG na Australia lida toktok strong long boda sekyuriti

BUNG bilong ol Papua Niugini na Australia lida las wik long Australia i tok strong long hevi bilong ol ausait lain i brukim boda long Westen na Sandaun provins na kam insait long sait bilong PNG.

Minista bilong Plis Jimson Sauk i tokaut bihain long kam bek bilong em long namba 13 enuel Ministeriel

forum o kibung we em i sindaun toktok wantaim Plis Minista na ol bikman bilong Australia long las wik olsem ol i laik lukim strong wok sekyuriti i mas kamap long was gut long boda na baundri bilong PNG.

Mista Sauk i tok Gavman bilong Australia i wanbel tu long helpim ol plisman bilong PNG long dispela wok bilong

strongim sekyuriti wok long boda bilong PNG na Indonesia long bilong Westen na Sandaun provins.

Dispela toktok i kamap bihain long ol ripot na toktok olsem ol manmeri bilong Wes Papua i wok long brukim boda na i kam stap long sait bilong PNG bikos ol i pret long laip bilong ol long bikpela pait we i kamap

namel long ol OPM paitman bilong Wes Papua na ol plis na ami bilong Indonesia.

Mista Sauk i tokaut tu olsem bung bilong ol i tokaut long ol wok na helpim long sait bilong sekyuriti na lo na oda long Bogenvil we Australia i sanap yet wantaim helpim ol i bin givim pinis na inap givim gen long Bogenvil ailan.

Komplen kamap long kuk kaikai long Bogia maket

FUZO PAUL i raitim

PLANTI mama na ol yangpela meri husat i save salim ol kuk kaikai bilong ol insait long Bogia stesin maket olsem drai pis, kuk pis, kuk mit, plawa, skon, ol kek, pis flawa na ol arapela kuk kaikai olsem i no save banisim o was gut long ol kaikai bilong ol.

Ol i no save was gut o karamapim gut wantaim tawel o karamap bai ol lang i no ken sindaun antap long ol dispela kaikai na tu das i noken holim ol kaikai.

I gat luksave olsem ol mama na ol yangpela husat i save salim ol kuk kaikai

insait long bikpela maket bilong Bogia i save abrusim pasin bilong was gut long ol kaikai na i mekim isi long sans bilong kamapim sik.

Wantok i bin toktok wantaim opis bilong Helt na Envaromen long Bogia long askim sapos atoriti i luksave long dispela wari.

Man i go pas long opis bilong Helt na Envaromen long Bogia Distrik James Aiam i tokaut olsem opis bilong em i luksave tu long dispela hevi na em i wokim pinis wanpela strongpela pas i go aut long olgeta Lokol Level Gavman Kaunsil insait long distrik long putim strongpela ai long ol maket na pasin bilong ol mama

husat i save tingim helt o sik na salim ol kain kuk kaikai olsem long maket.

Mista Aiam i tok namba bilong ol sik olsem taipoid na antap olsem na em i askim ol kaunsil long sekim gut ol kaikai na ol mama i save salim ol kaikai long traim helpim na daunim dispela kain sik long noken go bikpela moa.

Em i askim tu ol mama husat i save salim ol kuk kaikai long i mas banisim o karamapim gut ol kaikai bilong ol na i noken larim i stap ausait nating.

I gat ol komplem i kamap pinis tu olsem long olgeta

apinun ol mama i save go sindaun tasol arere tasol long bikrot na salim ol kaikai bilong ol. Long dispela sait maket tu bai ol ka i ron i go kam na mekim bikpela das na tu bilas smok i save kam long enjin bilong ka na i go antap long ol kaikai ol mama i salim.

Komplen i kamap tu olsem han rot we ol mama i salim ol kaikai tu em i gat pablik toilet na pablik ples bilong Bogia stesin komyuniti long tromoi ol pipia. Wantaim ol dispela ples pipia planti lang tru i save kamap na maket em i gat bikpela sans long kamapim ol kain kain sik we lang i save givim.

PNG luksave long Apil Kot disisen bilong Fiji

MINISTA bilong Foren Afeas Bart Philemon i tokaut olsem Papua Niugini bai olgeta taim sanap long lukim olsem Fiji i ken stretim hevi bilong em yet long bihainim demokretik lo we ol i soim dispela nau.

Minista Philemon i mekim dispela tok bihain long Fiji Apil Kot i mekim disisen long lusim ol hevi bilong politiks na hevi we ol igat namel long ol asples Fiji na India Fiji. Na ol i ken go het long stretim na kamapim gutpela ekonomik na politikel developmen bilong kantri bilong ol.

Disisen tu i strongim 1997 konstitusen we ol i bin kamapim we i soim nau olsem interim Gavman i nogat pawa aninit long lo long lukautim Fiji. Deputi Sief Jastis bilong Papua Niugini Sir Mari Kapi i bin sindaun long harim dispela apil kot.

Mista Philemon i tok Papua Niugini i amamas long Fiji Interim Gavman long larim olgeta wok bilong lo i go het long stretim dispela hevi na tu em i amamas long

Interim Praim Minista long sanap antap tu long dispela luksave bilong lo.

Mipela i luksave tu olsem Ekting Presiden na Interim Gavman i bin tokaut ples klia olsem em bai rispektim lo na bihainim wanem disisen i kamaut long dispela kot bilong apil. Mipela i gat bilip olsem ol pipel bilong Fiji bai bihainim dispela pasin we Interim gavman i bin soim long bihainim disisen bilong kot, Mista Philemon i tok.

Mista Philemon i tok tu olsem mipela i save olsem ol kaunsil ov sief bai sindaun liklik taim long makim nupela presiden bihain long olpela presiden Ratu Mara i bin risain long las yia. Papua Niugini i gat bilip olsem dispela olgeta samting i bin kamap bai pinis gut bihainim lo, Mista Philemon i tok.

Minista bilong Foren Afeas i to Papua Niugini i sanap redi long helpim Fiji long wanem kain rot em i ken long helpim Fiji bihain long dispela distipela disisen bilong Apil Kot.

Vanimo Fri Tred Jon bai go het

YAKAM KELO i raitim

AS bilong salim Vanimo Fri Tred Jon Agrimen i go long opis bilong Atoni Jenerel (Jastis dipatmen) em long lukim olsem ol wok bilong wanwan gavman opis na dipatmen i stap insait gut long dispela agrimen we projek ya i ken bihainim mak bilong wok stret, Minista bilong Tred na Indastri John Tekwie i tokaut.

Mista Tekwie i tokaut olsem bikpela toktok bilong Praim Minista long wanpela pas i go long em i tokaut olsem Praim Minista i askim olgeta gavman opis husat inap stap insait long dispela projek long lukluk gut insait long agrimen. Dispela em long mekim ol i ken givim sampela tingting na wok bilong ol i kam long dispela bikpela projek. Toktok bilong Praim Minista long givim dispela agrimen pepa i go long ol dipatmen i skelim em long traim lukim sapos interes bilong Stet (kantri) i stap gut. Dispela em samting we olgeta wok i mas bihainim, Mista Tekwie i tok.

Minista Tekwie i tokaut olsem long mekim ol toktok nabaut olsem dispela projek i stop em i no trupela ripot na toktok.

Em i tok dispela wok bilong Atoni Jenerel opis long glasim gen dispela agrimen i no inap long stapim wok go het bilong dispela projek olgeta.

Long bagarapim gutpela nem bilong PNG long ai bilong ol ovasis kantri em i no stret long pulim ol bisnis invesmen na ol lain i kam long PNG. I gat ol ripot nogut bilong raskol pasin na ol bikhet pasin i stap pinis na i wok long stapim planti gutpela samting long kamap tasol wanwan ovasis lain i wok long gat bilip long PNG na i kam long hia olsem na mipela i gat wanem long givim ol long dispela gutpela bilip bilong ol long PNG, Mista Tekwie i askim.

Ripot i bin kamap las wik olsem Papua New Guinea Economic Development Group Limited em kampani bilong Sibona Douveri bilong PNG na David Law wanpela waitman husat i save stap long Amerika. Ripot i tok dispela marasin kampani i laik sanapim bkpela haus bilong ol hia long bringim ol marasin i kam long ovasis na wokim ol arapela marasin bilong ol sik long en.

Tasol opis bilong Mista Tekwie i tok olgeta wok bilong Fri Tred Jon i no inap bungim hevi bikos dispela em wanpela kampani tasol wantaim kontrak bilong em long Fri Tred Jon. I gat planti moa kontrak i stap we i no inap bagarap long dispela projek.

Nuku Hai Skul i no statim skul yia yet

HELEN REI i raitim

NUKU Hai Skul insait long Sandaun Provins bai statim skul yia bilong em neks yia bikos skul i nogat inap ol tisa long statim skul long dispela yia.

Katolik Daioses bilong Aitape i ronim dispela skul na skul bai pas yet taim ol atoriti i painim ol tisa husat i ken tis long hap.

Edukesen Seketeri bilong Katolik Sios, Linus Keri i tok tu olsem skul i pas faipela wik nau.

Em i tok ol tisa i tokaut pinis long go long ol postim bilong ol na ol i isi long muv i go insait long skul long dispela wik.

Mista Keri i tok hetmasta i kisim balus wantaim ol saplai kaikai bilong ol studen i go long skul long dispela wik na long pinis bilong wik bai planti ol tisa i go long skul.

I gat foapela tisa pinis long skul na ol atoriti i gat dispela wik tasol long painim wanpela saiens tisa.

Ol tisa i painim hat long muv i go long skul bikos rot i bagarap na long trenspot problem. Narapela as wai na ol tisa i les long go long hap em bikos skul i stap long bus stret na prais bilong kaikai i antap tru.

Wanpela ripot i kam long Katolik Sios long Nuku i tok hai skul i pas yet na dispela i mekim ol papamama bilong ol studen husat i save go long dispela skul i wari.

Ripot i tok planti bilong ol tisa ol i bin makim long go long Nuku Hai Skul i no bin go bikos long ol fesiliti long distrik level i no gutpela.

Las yia planti tisa i bin wokabaut i go long skul na kam bek. I no bin isi long

ol tisa wantaim ol famili bilong ol karim ol kago bilong ol long baksait bihain long ol i kisim balus long Vanimo, Aitape na Wewak na go long Nuku na wokabaut olsem 12 kilomita i go long skul.

Ripot i tok moa olsem skul i bin nogat kaikai long givim long ol studen bikos long rot long Wara-Sikau i go long Nuku Hai Skul i bin bagarap tru. Nogat wanpela komyniti skul klostu i stap long Nuku Hai Skul.

Ripot i tok i luk olsem bai nogat gred seven na eit long dispela yia. Sapos nogat tisa long skul, i luk olsem ol bai saspenim gred 7 na 8 long yia 2001.

Edukesen edvaisa, Ignatius Wunum i tok planti taim ol skul i save stat bihain liklik bikos skul i save nogat mani long operet. Trenspot em i wanpela problem na ol

balus i no save ron planti taim. Em wankain problem i save kamap na ol i lukluk yet long stretim dispela problem.

Em i tok planti muvmen bilong trenspotesen i go insait long Nuku em ol i save yusim balus olsem na ol i save painim hat long kisim ol tisa i go long skul long taim. Ol ejensi i painim hat taim stret long helpim ol pipel.

Mista Wunum i tok provinsel edukesen bod i mekim ol apoinmen tasol ol tisa bai no amamas long tis long hap.

Em i tok sapos nogat ol tisa i wok, ol i mas tokim opis bilong em tasol em i no kisim wanpela ripot bilong skul i pas.

Em i tok Nuku i no stat bikos long nogat planti tisa. Em i tok ol i wok yet long painim ol arapela rot long stretim dispela problem.

Mas 24 em i Wol TB Dei

OL samting i redi pinis long selebretim Wol Tubakulosis (TB) Dei long Mas 24 long Sir John Guise Stadium indo kompleks.

Wanpela grup we i gat ol helt wokmanmeri bilong TB, ol sik manmeri na ol narapela pipel wantaim intres insait long NCD bai tek pat long ol samting we Dokta Joe Bana-Koiri long Pot Mosbi Jenerel Hospitel bai go pas long en.

Grup ya i kamap olsem NCD Enti-Tubakulosis Asosiesen (NATA) we ol i bin statim long 1999 taim selebresen bilong Wol TB Dei i bin kamap long nambawan taim. Patron bilong asosiesen em Gavana bilong Bogenvil, John Momis.

Las yia NATA i bin ogenaism wanpela flot na sampela ol ektiviti i bin kamap long makim TB Dei olsem 'song bilong TB long Dairektly Obsev Tritmen Sotkos (DOTS).

Long dispela yia NATA i plenim planti ol ektiviti long makim dei. Bai i gat stesin bilong maikroskop, stesin bilong patoloji spesimen, stesin bilong ol posta, liplets, statistik, ol poem bilong ol skul pikinini, pamplets na ol nutrisenel posta, stesin bilong salim ol NATA ti-set, stesin bilong ol voluntia helt eduketa bilong TB na HIV

Sputum kap spesimen bilong sek ap na stesin bilong laip redio brodkas.

Em bai wanpela open dei na bai fri bilong ol famili, studen na ol narapela manmeri husat i laik kam na lukim.

Wanpela mas bai stat long Kina Mat Supamakot na bai go insait long stadium. Ol drama grup, tredisenel danis o danis bilong ol tumbuna na laip ben bai entatenim ol pipel long dispela dei.

Dokta Bana-Koiri i tok bikpela tingting bilong holim dispela ekspo em long kamapim awenes long disis o sik TB.

Em i tok TB em i wanpela bikpela problem insait long PNG na em i wanpela samting we i save mekim planti lain i kam silip long haus sik. Ol reit bilong TB i bikpela insait long rijon na HIV/AIDS i save mekim TB i kamap nogut tru.

Dokta Bana-Koiri i tok: "I nogat gutpela komitmen bilong Gavman. Mekim TB i kamap prairiti em i wanpela samting tasol givim sapot em i narapela samting na mipela i nidim asistens long selebretim Wol TB Dei."

Em i tok tritmen bilong TB em i fri long PNG, ol lain i no laki tumas i save kisim sik ya.

UPNG statim projek bilong raitim tokples

WANPELA projek bilong Yunivesiti bilong Papua Niugini long kisim ol stori bilong ol tokples ol Melenisen stet o kantri we i wok long dai o pinis na putim long rekot i bin kisim US\$195,000 (K637 254.90) long Yunaitet Nesens Edukesen Saientifik na Kalsa Ogenaisesen (UNESCO) long wik i go pinis.

Profesa Otto Nekitel husat i save stadim na tisim ol kos bilong tokples long UPNG i tok dispela helpim bilong UNESCO i apim namba bilong mani i go antap long US\$216,000 (K705 882.35) long kirapim gen stadi bilong ol tokples i dai pinis. Profesa Nekitel i wanpela bilong ol dairekta bilong UNESCO long dispela projek ol i kolim Indijines Languis Developmen Projek we UPNG yet i statim long 1998. Tingting bilong statim dispela projek i kamap long wanpela woksop long Fiji we ol manmeri bilong wanwan kantri husat i memba bilong UNESCO i bin go. Woksop i bin tok tok long ol rot bilong kirapim gen ol tokples we i wok long dai.

Projek i bin stat wantaim US\$27,000 (K88 235.29) we mani i bin kam long baset bilong em yet na i bin gat pinis ol narapela woksop na ol raun bilong mekim ol risets o stadi long luksave na rekotim ol tokples we i luk olsem ol bai pinis insait long PNG.

Profesa Nekitel i tok dispela US\$195,000 i kam long Siapan Fand-in Tras bilong UNESCO long lukautim na promosen bilong Intenjibel Kalsarel Heritej we i bes long Siapan.

Em i tok projek i traipela tru na i gat planti sovei long mekim yet.

Profesa Nekitel i tok: "Mipela bai mekim sovei long olgeta languis o tokples we ol i no bin raitim yet we bai mipela i developim alfabet na yusim long putim ol tokples long buk na bai ol komyniti i yusim na developim venakula edukesen o edukesen bilong rit na rait long tokples."

Profesa i tok dispela em i wanpela wei long karimaut o implimenim nupela edukesen rifom olsem Tokples Skul Literacy program.

"All dispela i kam gut insait wantaim nupela polisi bilong Gavman na mipela i amamas long UNESCO olsem Fand-in-Tras bilong Siapan long lukautim na promosen bilong Intenjibel Kalsarel Heritej.

PNG i laki bikos ol lain husat i save mekim disisen insait long Intenjibel Heritej Bod i save long ol lain husat i save stadi long ol tokples olsem Profesa Nekitel long ol kontribusien bilong ol olsem long raiting.

Mani bai karamapim kost bilong planti wok ol i bin mekim we ol i bin rekotim ol tokples i dai pinis o ol tokples ol i no raitim yet long buk.

Profesa Nekitel i wok nau long bungim ol speselis o languis wantaim long karimaut dispela bikpela projek we bai karamapim tupela yia.

Em i tok ol i plenim ol strateji o ol samting bai ol i mekim na wok long karimaut pinis. Nogat planti languis long PNG na em i sekim ol yunivesiti long ol ovasis kantri long nem bilong ol languis.

Stori stap baksait long dispela pro-

jek i tok languis o tokples olsem viakel bilong yumen aidentiti i bikpela samting. Wanwan languis i soim narapela kain lukluk bilong wol na ol kalsa, glasim-kain pasin bilong toktok insait long komyniti i save helpim ol problem bilong wol, na kamapim ol samting, sistem bilong em long sait bilong pilosopi na luksave long wol i stap raunim tokples.

Wanwan tokples i olsem rot bilong ekspresim o tokaut long intenjibel kalsarel heritej bilong ol pipel. Tasol dai na lus bilong kain languis bai kamapim problem long ol kalsa na ol sosaiti. Dai na lus bilong ol tokples i bin wok long kamap long planti tausen yia olsem wanpela netserel samting i wok long kamap long yumeniti o ol pipel bilong wol. Tasol insait long 300 o moa yia i go pinis, planti tokples i bin dai o lus nating long planti hap bilong wol. Situesen bilong ol languis long Melanesia i bikpela samting. Long PNG planti tokples i bin dai na planti arapela bai klostu pinis. Dispela i kamap bikos planti bilong ol lain husat i save tokples i wok long pinis bikos ol i go stap long narapela hap na tokples i bruk na miks wantaim ol narapela tokples. Dispela kain pasin i save kamap taim ol yangpela man i lusim ples na go long taun long painim wok. I moa beta long raitim ol tokples long buk na bai tokples i no inap pinis.

Dispela projek bilong UNESCO we UPNG i statim bai tanim dispela pasin bilong dai o pinis bilong tokples.

NCDC bai putim was long skul subsidi bilong ol NCD skul

OL skul insait long Nesanel Kapitel Distrik bai givim ripot bilong hau ol i yusim ol skul fi subsidi bilong ol we ol i bin kisim long Nesanel Kapitel Distrik Komisni i go stret long edukesen seksen bilong Komisni.

Bipo em edukesen opis bilong NCDC i save wet tasol long lukim sapos ol skul bai givim ol ripot long ol subsidi.

Dairekta bilong NCDC Edukesen, Tom Gesa i tokaut long dispela senis long wik i go pinis. Em i tok wantaim dispela senis, olgeta sek mani bilong ol skul bai go stret long wanwan bilong ol skul. Bipo ol mani i save go long NCDC edukesen divisien na bihain ol i save peim i go long ol skul.

Mista Gesa i tok dispela senis i kamap bikos long ol skul i no save givim ol ripot bilong subsidi bilong ol.

Em i tok polisi bilong nesanel edukesen bod em long yusim mani long baim ol skul materiels bilong ol praimer i na komyniti skul na kaikai samting bilong ol boding skul.


Sampela skul i save yusim mani long mekim narapela samting na ol i no save baim ol samting bilong skul olsem na NCDC i mekim disisen pinis long was long ol skul long lukim ron bilong skul subsidi bilong ol.

Mista Gesa i tok taim NCDC i kamapim ol bilding, kes mani ol i givim long ol skul i bilong baim ol kerukulum materiel bilong skul long mekim fes tu o namba tu pat bilong projek i kamap tru. Fes wan i bilong apgredim ol praimer skul i go antap long top ap level.

Em i tok olgeta hetmasta bilong ol skul i kisim pinis toksave tasol ol bod ov menesmen i no harim yet na bai ol i edvaisim ol. NCDC i bin wok long peim ol NCD skul long wanwan mun long tupela yia nau.

Mista Gesa i tok dispela wanwan mun peimen bai go het yet long dispela yia tasol bai dispela i bihainim kes flo o sapos i gat planti mani. Long dispela yia tasol NCDC i bin aloketim K1.8 milien bilong ol subsidi. Wanwan mun subsidi mani bai ol i peim i go inap long Jun. Nambawan subsidi mani bilong mun Februari bai ol i givim klostu. Mani bilong ol narapela mun bai kamap sapos ol skul i givim ol ripot bilong mani bilong ol.

Asisten Seketeri bilong NCD edukesen, Pompiran Kuyei i tok tu olsem ol skul bai kisim ol subsidi bilong ol long NCDC stret.



**ELECTION
2002**

Pawa bilong makim ol Gutpela Lida o Lida Nogut i stap long vot bilong yumi

LONG olgeta Fonde stat long nau i go inap long mun Julai neks yia, bai mipela long *Wantok* niuspepa i raitim dispela Tok Save long 2002 Nesanel Ileksen.

Mipela mekim dispela long kirapim gutpela tingting long Ileksen 2002 namel long olgeta man meri pikinini bilong Papua Niugini.

Yumi olgeta i save olsem sapos yumi vot long Gutpela Lida bai Gutpela Lida i makim yumi long

Nesanel Paliamen. Sapos yumi vote long Lida Nogut bai Lida Nogut i makim yumi long Paliamen.

Nau planti man i redi long kamap kendidet bilong Ileksen 2002 na ol i wok long givim mani long ol pipel o sponsorim ol spot olsem ragbi lig long nem bilong ol.

Lukaut long ol grisman. Vot bilong yu i gat pawa olsem na ol i kam long grisim yu long kisim vot bilong yu long taim bilong Ileksen.

Yusim gut vot bilong yu bikos sapos yu sapatim wanpela Lida Nogut, dispela Lida Nogut i ken giamanim yu taim em i stap long Paliamen na bai yu mekim wanem? Sori, yu rong pinis.

Nomineisen na kempeining bilong Ileksen 2002 bai i stat long namba 4 dei bilong mun Epril taim Gavana-Jeneral i Givim Aut Rit long statim ileksen.

Nomineisen bai i pas long Epril 11

na kempeining bai stop long June 15 taim voting bai i stat.

Voting bai pinis long Jun 29 na ol ileksen wokmanmeri bai stat long kauntim ol vot long painim ol wina bilong ol wanwan sit long Paliamen.

Ileksen 2002 bai i pinis long Julai 15 o bipo long Julai 15 taim Gavana Jeneral i Kisim Bek Olgeta Rit Bilong Ileksen 2002.

• PNG Ilektorol Komisni i sponsorim dispela Ileksen Tok Save.

Tekwie laikim ol Australia bisnis lain i kam Agiwa tok PNG na Australia

MINISTA bilong Tred na Indastri John Tekwie i laik singautim ol bisnis kaunsel bilong Australia long kam long Papua Niugini na lukluk long ol wok na rot we ol i ken surukim na kirapim wok bisnis bilong ol namel long tupela kantri wantaim.

Mista Tekwie i mekim dispela toktok bihain long em i kam bek long Australia long Sande bihain long em i stap insait long namba 13 enuel Ministeriel konsfrens namel long PNG na Australia las wik.

Mista Tekwie i tok em i bin gat sans long bungim wanwok Minista bilong em long Australia na ol i holim sampela gutpela tok-tok tru long wok bilong tred na bisnis namel long tupela kantri.

Mista Tekwie i tok

em i bin amamas tru long bung wantaim tupela siaman Australia bisnis kaunsel we em i holim ol gutpela toktok tru namel long dispela bung wantaim. Insait long dispela bung ol i toktok long traim kamapim gutpela wok poroman namel long tupela kantri bai i sut long kirapim ol wok bisnis na invesmen hia long PNG.

Mista Tekwie i tok tu olsem em i kirapim long harim olsem i gat wanpela gutpela sans maket bilong PNG i stap long Australia olsem long we sampela PNG manmeri istap, wantaim tu ol hapkas PNG manmeri na ol waitman husat i bin stap longpela taim tru long PNG na i save gut long kantri.

Olsem na Minista Tekwie i tok wanpela

gutpela maket nau em long kirapim rot bilong salim ol kaikai olsem saksak, taro, kaukau na banana i go long Australia long ol dispela lain husat inap amamas long baim na kaikai.

Mista Tekwie i tok i gat namba olsem 20,000 manmeri istap long hap na ol bai baim ol prodak bilong PNG bikos ol i save gut long ol kaikai bilong PNG.

Mista Tekwie i tok insait long dispela bung bilong ol tu, em i

lainim olsem ol lida na bikman bilong Australia i gat bikpela amamas tru long Praim Minista bilong PNG, Sir Mekere Morauta long tingting na rot em i laik kamapim long kirapim bek ol bisnis na ekonomi bilong kantri. Na ol i wanbel long dispela na amamas long wok klostu wantaim PNG long strongim na mekim kamap dispela tingting bilong Praim Minista Sir Mekere Morauta.

Agiwa tok PNG na Australia bai kamapim gutpela plen

AUSTRALIA na PNG bai kamapim wok poroman na sapot wantaim gutpela wanbel plen bilong ol samting long bus graun na solwara (envaromen plen) taim wok bilong dispela bikpela projek bilong PNG na Kwinslen Ges Paipain i laik stat.

Minista bilong Envaromen na Konsevesen Herowa Agriwa i tokaut olsem PNG na Australia i bin wok klostu wantaim pinis long las yia we i lukim kaikai bilong nupela Envaromen Bil we i bin kamap long Palamen las yia.

Dispela Bil (10) i kamap bihain-

im wok poroman na sapot Australia i gat wantaim PNG long lukautim na sevim ol envaromen o ol samting bilong bus, graun na wara olsem na dispela lo i kamap.

Mista Agiwa i tok taim dispela PNG Kwinslen ges paipain projek i stat bai tupela kantri wantaim i kamap wantaim wanpela gutpela na wanbel plen bilong envaromen we i gutpela long sevim na banisim interes bilong tupela kantri wantaim insait long dispela projek.

Australia i sanap yet long helpim PNG

YAKAM KELO i raitim

FOREN Afeas Minista Bart Philemon i tokaut olsem namba 13 Ministeriel kibung namel long Australia na Papua Niugini las wik i bin kamap gut tru. Dispela em bung namel long tupela kantri we i save karap olgeta yia.

Mista Philemon i tok bung i bin kamap gut tru bihainim luksave na wanbel we i pas long planti bikpela wok na program namel long tupela kantri wantaim.


Mista Philemon i tok bikpela luksave tru em long dispela prensip i bin stap namel long PNG na Australia long 25 krismas i kam inap nau we dispela prensip i mekim PNG na Australia i sanap olsem wanpela spesel poroman tru.

Mista Philemon i dispela spesel prensip i mekim Australia i go pas long 1999 insait long APEC miting long kamapim wanpela program we ol i kolim Ol Pren Bilong PNG. (Friends of PNG). Insait long dispela program ol kantri olsem Siana, Japan na Australia i bin givim helpim mani i kam long PNG long hevi PNG i stap long en we strong bilong mani (Kina) i bin pundaun. Aninit long dispela program tu em Wol Beng na Intanesenel Monitori Fan (IMF) i tokaut long givim \$20 milien dola. Dispela mani i no kam yet.

Mista Philemon i tok dispela em wanpela bikpela wok Australia i go pas long mekim long helpim PNG long ol hevi bilong em na PNG i sanap strong yet lon gog het wantaim Australia long dispela program we i sut tu long mekim kamap Straksere Edjesmen Program (SAP). SAP program em Wol Beng i laikim i mas kamap na Australia tu i laik lukim em i kamap.

Mista Philemon i tokaut tu olsem long dispela bung las wik, Australia Gavman i wanbel long helpim PNG Gavman wantaim ol senis o rifom insait long PNG Difens Fos. Olsem na Minista bilong Difens bai stretim ol pepa na ripot na kamapim long bung bilong kabinet long Mas 17 dispela mun.

Minista Philemon i bin go pas long wanpela Gavman grup we i gat ol Minista olsem John Tekwie Minista bilong Tred na Indastri, Herowa Agiwa Minista bilong Envaromen na Konsevesen, Jimson Sauk Minista bilong Plis, Moi Avei Minista bilong Plening na Implimentesen na Chris Haiveta Minista bilong Petroleum na Ges. Ol i bin go long Australia las wik we ol i holim dispela namba 13 enuel Ministeriel forum namel long ol lida bilong tupela kantri wantaim. Dispela grup i bin kam bek long Sande apinun.



TOKSAVE LONG OL LAIN I SALIM SMOK

Lukaut long ol Kon man.

Sampela man i wok long raun na giamanim ol lain i salim sigaret na tabak. Planti taim ol dispela man bai i ken trikim yu na stilim ol sigaret stok bilong yu.

Eksampel, yu mas was gut long:

- **Husat man i tok olsem em i makim British American Tobacco PNG.** Yu mas askim dispela man long soim ID kat bilong British American Tobacco PNG pastaim long em i mekim bisnis wantaim yu. Sapos em i no gat ID Kat. noken wokim bisnis wantaim em.


- **Giaman long senisim samting.** Sapos wanpela kastoma i laik senisim sigaret o tabak, yu mas sekup gut na lukim olsem ol i no brukim karamap bilong boks.

Sapos yu gat sampela wari o askim, plis yu fri tasol long toktok wantaim ol lain bilong British American Tobacco PNG long hap bilong yu, o ringim ol rijinol depo (long ol namba i stap daunbilo).


Depo	Telipon Namba	Feks Namba
Mosbi	323 5599	323 1310
Lae	472 1899	472 1793
Goroka	732 2723	732 1348
Mt Hagen	542 1464	542 1416
Kokopo	982 8475	982 9196

British American Tobacco PNG. Dedicated to growing your business & your profits.

BRITISH AMERIC.
TOBACCO
PAPUA NEW GUINI



MADANG NIUS



Woksop lukluk long sotim taim bilong givim sas long plis opisa

LYNNE MINIRU i raitim

AUSAID i bin sponsaim wanpela wan de woksop long Madang plis stesin long wik i go pinis long stretim o painim rot bilong stretim proses bilong givim sas long ol plis opisa husat i save brukim ol lo.

Taim wanpela plis opisa i mekim rong, ol bos bilong ol i save tok-save long hetkwata long Mosbi long rong bilong plis opisa na bai ol i wetim wanem sas bai hetkwata i putim. Dispela pasin bilong wetim hetkwata long mekim disisen i save kisim longpela taim tru na long dispela pasin na AusAid i traim long stretim dispela pasin.

Woksop i bin toktok long sotim proses o rot bilong sasim plis opisa taim em i mekim rong na mekim proses i wok hariap. Bipo proses bilong sasim opisa i

save kisim klostu long tripela o foapela mun.

Stesin komanda bilong Madang plis, Edgar Sebastian i tok AusAid i bin holim pinis wankain woksop long Lae na dispela woksop long Madang i karamapim Sandaun, Wewak na Madang Provins.

Mista Sebastian i tok taim wanpela plis opisa i mekim rong, ol i klasim ol aninit long maina na siries ofens. Dispela i toktok long bikpela o liklik bilong rong em plis opisa i mekim.

Ol komisin opisa bilong ol dispela tripela provins i stap insait long dispela woksop we i bin kamap long Madang plis stesin.

Dairekta bilong intenel afes long plis hetkwata long Mosbi i bin go long Madang na ronim dispela woksop.

Long wankain taim Provinsel Lens Dipatmen i muvum ol lain husat i save stap long



• **Wanpela patrol tim bilong Bogia ol i kolim Komyuniti Eksen na Patisipesen (CAP) treni na sanap redi aninit long haus win bipo long ol i go long awenes patrol bilong ol long ol ples maunten olsem Parikanam, Dumudum na Tauratapat. CAP trening i wok long go long planti ples nau long Bogia. Ol CAP woksop i save soim ol pipel long kamapim gutpela sindaun na wok bung long kamapim ples we i helti. Foto: FUZO PAUL.**

Banana na Fikus setelmen we AusAid i plenim long bildim nupela bareks bilong ol plis manmeri. Ol lain husat i gat wok olsem ol pablik sevan na ol kampani

wokmanmeri em ol i go long Mero we i stap autsait long Madang taun.

Ol narapela setla em ol i go nabaut o ol i go stap wantaim ol wantok bilong ol.

Rotari Klub donetim yunifom long kalabus grup

ESTHER HARO i raitim

OL memba bilong Prisen Felosip Grup long Beon haus kalabus nau i gat ol yunifom na ol intramen o ol samting bilong mekim musik bilong ministri bilong ol. Dispela helpim i kam long Rotari Klub bilong Madang yet.

Presiden bilong Rotari Klub, Dokta Hal Daniel i tok ol i yusim namel long K500 na K600 long baim tupela yukelele, sikspela gita na ol blupela kala materiel.

Em i tok Klos Nabaut, wanpela seken hen stua i donetim 30 waitpela siot

wantaim ol nek tai. Donesen na help Rotari i givim i olsem wanpela komyuniti bes projek.

Dokta Daniel i tok: "Mipela i kisim tripela proposel long Paul Fuglestad husat i wok wantaim Yut wantaim Misin. Long dispela mipela i bin makim long helpim Prisen Felosip Grup."

Prisen Felosip Grup i bin stat long las yia olsem pat bilong program bilong helpim ol kalabusman.

Long Sande grup ya i save go lukim ol manmeri bilong kainkain sios long holim felosip o lotu wantaim ol.


Diwain Wod Kaunsela, Rosie

Weldon husat i wanpela memba bilong Rotari Klub i tok ol kalabus lain bai filim gutpela long ol nupela yunifom bilong ol. Ol kalabus lain bai werim waitpela siot na pasim blupela laplap na dispela bai mekim ol filim gutpela long sanap long ai bilong ol pipel.

Ol yia wan studen bilong Rilijes Stadi i helpim Mis Weldon long samapim ol laplap insait long pastorel ke klas bilong ol.

Wanpela kalabus meri, Alexia Kaku i tok em i amamas long nupela yunifom bilong ol.

I gat tenpela kalabus lain husat i stap long dispela grup.



• **Andrew Oaego bilong Nesenel Disasta Menesmen Opis (NDMO) sanap wantaim Ekting Australian Hai Komisina, Nicholas Coppel. Long baksait bilong tupela em ol rilip saplai bilong ol lain husat i painim birua long kerosin long Madang. NDMO long Pot Mosbi i bin baim ol rilip saplai na Royal Australian Air Fos Hercules i bin karim ol saplai i go long Madang. Dispela deliveri wok em AusAid na Imejensi Menesmen Australia i kodinetim o karimaut. Foto: AUSTRALIAN HAI KOMISIN.**

Pablik sevan wet yet long DPM long mekim seleksen

SELEKSEN o makim bilong ol lowa level opis holda insait long Madang Provinsel Gavman i mekim planti bilong ol pablik sevan i belhat na ol i no save bai ol i go we.

Prinsipal Ogenaisesen Developmen Opisa, Pauline AINU i tok ol i sapos long mekim seleksen long Oges bilong las yia tasol sampela samting i bin kamap na ol i bin no mekim.

Em i tok ol i bin etvetaisim 340 posisen long Jun 19 i go inap long 30 taim ol aplikesen i pas.

Ol posisen i karamapim provinsel hetkwata, distrik na lokol level gavman. Las yia yet ol pablik sevan husat i aplai i wok long wet yet na ol i no save bai ol i kisim wok o nogat.

Em i tok ol wokmanmeri i wari na tingting planti olsem na ol i mas hariap na mekim seleksen.

Yumen Risos Developmen Edvaisa, Bernard Lange i tok Dipatmen bilong Pesenel Menesmen (DPM) i wok long isi tumas long dispela.

Mista Lange i tok ol i sot listim ol nem bilong ol apliken na givim long DPM taim ol i go long Pot Mosbi long Februari bilong dispela yia.

Em i tok nogat wanpela toktok i kam long DPM bikos ol bai lukluk long ol narapela provins wantaim Nesenel Kapitel Distrik.

Deputi Seketeri wantaim narapela opisa husat i wok insait long selekesen komiti i sapos long kam long Madang tasol ol bai wet na kam bihain long ol i lonsim o tokaut long kopret plen bilong DPM.

Mista Lange i tok las yia long Jun, wanpela wik bipo long ol i putim ol etvetismen i go aut, PEA i bin holim wanpela forum long rausim edministreta na dispela i mekim seleksen taim longpela.

Ol i bin rausim seleksen pawa bilong edministreta long 1996 olsem na em i nogat seleksen pawa.

DPM sapos long mekim dispela wok tasol ol i no bin lukluk long dispela samting.



BANK OF PAPUA NEW GUINEA

KINA FASIILITI RET (KFR) BILONG MAS 2001

Ol ripot bilong wokmani bilong kantri i soim olsem inflesen i kam daun long Desemba 2000 olsem na Kina Fasiliti Ret (KFR) i kam daun tu long 50 basis poin long 15.50 pesen i go daun long 15.00 pesen long Mande Mas 5, 2001. Dispela senis long mak i bihainim ol senis long Monetari Polisi em Bank of Papua New Guinea i kamapim, na Sentral Benk i ting ol maket intres ret tu bai i bihainim dispela senis.

L Wilson Kamit CBE
Governor

Twenti wan pipel dai long balus birua

Washington, Amerika:

Twenti wan (21) pipel i bin dai taim wanpela militeri balus i bagarap long Georgia, Amerika.

Nesenel Kosgad i bin papa long dispela liklik balus.

Dispela C-23 Sherpa twin enjin propela balus i bin karim 18 pasindia na tripela kru. Em i bin bagarap na pundaun klostu long

Unadila taun we i stap saut long Robins Eafos beis long las Sande. Olgeta man long dispela balus i bin dai.

Ol atoriti i no tokaut yet long as bilong dispela birua. nau ol i mekim ol wok painimaut long dispela samting.

Presiden George Bush taim em i salim tok sori bilong em long ol lain i dai long birua na ol famili bilong ol i tok balus ya i bin wok long

karimaut trening bilong en.

"Dispela birua i mekim yumi tingting long ol sakrifais we ol dispela man na meri i save wokim long olgeta de. Prais bilong fridom em i bikpela tumas", Presiden Bush i tok.

Balus ya i bin sapos long mekim ron i go olsem long Hurlburt Fil long Florida i go long Osen nevi ea beis long Virginia.

Ol kemis kampani kotim Saut Afrika gavman

Johanesbeg, Saut Afrika:

Planti ol bikpela kemis long wol i laik kotim gavman bilong Saut Afrika long wanpela keis we i sut long HIV/AIDS marasin.

Bilong mekim klia, kot i sut long kisim sip marasin i go long Saut Afrika long traim daunim sik HIV/AIDS long ol puo kantri.

Moa long 36 bikpela kemis kampani long wol i tok long 1997, Saut Afrika i bin kamapim wanpela lo we i tok oraitim gavman long kisim i kam insait long kantri o wokim ol sip marasin we i kopi long ol marasin ol dispela bikpela kemis kampani i save wokim long traim daunim sik AIDS. Ol kampani i tok lo ya em i karamapim bikpela eria na i no klia na tu em i tagetim ol lain i save wokim ol marasin.

Ol kampani ya i plen long

askim Hai Kot bilong Pritoria long rausim dispela lo taim kot i stat long dispela wik.

Gavman, ol AIDS aktivis na ol intenesenel humen raits grup i tok ol drag o marasin kampani i laik wokim profit long dispela sik we i wok long kilim dai planti pipel na i wok long kamapim bikpela bagarap long Saut Afrika na ol sampela arapela puo kantri.

"Dispela kot keis em i sut long komesel intres bilong ol kemis o long humen raits bilong ol pipel husat i wok long traim hat long stap laip", Belinda Coote em dairekta bilong rilif ejensi Oxfam i tok.

Ol ripot i tok moa long 36 milien pipel long wol i gat sik HIV/AIDS. Long dispela mak, 25 milien i bilong sab Sahara Afrika.

Dispela rijen em ol puo pipel long wol i save stap long en.

Long las yia 2000, 2.4 milien pipel long Afrika i bin dai long sik AIDS.

Marasin em bikpela hevi bikos em i kostim bikpela mani long kisim sik HIV/AIDS tritmen. na planti ol puo famili na pipel i nogat mani long baim ol marasin na olsem planti pipel moa long ol puo kantri olsem Afrika i wok long dai na ol bai dai yet.

Ol dispela ripot na antap long en, pasin we ol marasin kampani i laik stapim ol komon marasin na i no sik HIV/AIDS i bagarapim nem bilong marasin kampani long wol.

"Mi no ting olsem dispela i givim gutpela piksa na planti bilong ol bai givim nating ol

marasin," Henry Grobowski em Profesa bilong ikonoms long Duke Yunivesiti i tok.

Gavman na Amerika i pilim sem pasin long isu bilong AIDS marasin.

Aninit long foma Saut Afrika gavman bilong Nelson Mandela, planti ol atoriti i no bin amamas long pasin we gavman i bin tromoim bikpela hap mani bilong ol helt progrem long AIDS aweanes na tu long developim Virodene, marasin we ol lain i gat sik AIDS i save kisim.

Nupela gavman bilong Saut Afrika i gat plen long kamapim marasin i no dia tumas na dispela marasin em bai ol meri i gat bel i ken kisim long stapim rot bilong givim sik i go long ol bebi.

Qantas sasim spesel fea

Sidni, Australia:

Balus kampani bilong Australia Qantas i go insait long resis bilong givim sip eafeas o pe bilong balus namel long Mas na Epril. Mak long pe long baim rot long wanwe em \$Aus39 na dispela em long ol lain i laik raun

namel long Sidni na Brisben.

Impulse em narapela balus kampani we i givim wankain ofa pas-taim na nau Qantas i bihainim long en.

Qantas bai givim moa nius long dispela samting.

Mardi Gras festival go gut

Sidni, Australia:

Mardi Gras festival we biknem PNG musikman Moses Tau i bin go long en long Sidni i bin pulim moa long 400,000 long en, ol ripot i tok.

Gutpela taim i bin kamap na festival i bin go gut tasol taim ol lain i bin stap long en i putim ol kain stail na kala klos long soim ol wanwan pasin tumbuna bilong ol.

Antap long ol pilai, singsing, pasin tumbuna na ol samting long sait bilong entateinmen ol i putim kamap, sampela ol bikpela samting we ol i bin toktok long en em long ikwaliti long ol homosksuel (ol man yet i marit) na lesbien (ol meri yet i marit), ikwel rait long ol lain insait long dispela kain marit na rikonsiliesen o pasin bilong kamapim wanbel.

Samting olsem 7,500 pipel i stap insait long dispela festival i bin putim ol kain kala klos na mas aninit long pinkpela lait na mas i go pas long Oxford Strit.

Pliis i bin amamas long nogat trabel i bin kamap tasol ol bin holim sevenpela pipel long ol liklik bikhet pasin ol i wokim.

Ol ripot i tok mak bilong ol lain i bin kamap long festival long dispela yia i bin daun long 100,000.

Prins William bai raun long Afrika

London, Briten:

Ol ripot i kamap olsem Prins William em pikinini bilong Prins Diana na Prins Charles husat bai i kamap King sapos mama bilong em Kwin Elizabeth i dai, i stap insait long tripela mun wokabout i go long Afrika.

Em bai mekim wok stadi long konsevesen o wok long lukautim en vironmen olsem ol bus, diwai, ol animel samting.

Ol ripot i tok Prins William husat nau i gat 18 kris-mas i kisim wanpela krismas aut long skol bilong go long dispela Afrika safari wokabout.

Em i mekim dispela wokabout wantaim wanpela grup bipo em i statim skol long Sen Andrew yunivesiti long Skotlen long mun Septemba.

Ol ripot i tok ol no inap long tokaut wanem hap tru o ol ples we bai em i go lukluk raun long en tasol em inap bihainim wokabout bilong papa bilong em husat i bin raun i go olsme long Kalahari Deset long kantri Botswana. Prins Charles i bin lusim foapela de long wanpela spirituel ritrit o taim bilong stap isi na pre wantaim godpapa bilong en Laurens van der Post.

Ol pik long Inglan i gat sik



• Piksa i soim ol dispela pik long Gemeni we inap pundaun long wankain sik olsem ol dispela long Inglan. Piksa long hansut kona i soim ol i kukim ol pik i gat sik long Inglan long las wik. Piksa i kam long Weekend Australian niuspepa.

Inglan:

Ol pik long Inglan i bungim sik long lek na maus (Foot and mouth) na dispela em bikpela hevi.

Sik ya i bin stat long las Desemba long fam bilong tupela brata long pik fam bilong ol long Heddon-on-the-Wall long Nu Kasel, Inglan. Nua helt Ministri na gavman i wari na i wok long karimaut ol investigesen wok long dispela samting.

Bikos dispela sik i wok long bagarapim planti pik, ol bin kukim planti tausen laip pik insait long Inglan las wik.


Nogat man i save yet rot long sik i bin kamap long en tasol ol i bilip olsem ol pik i bin kaikaim bagarap kaikai na sik ya i stat.

Fut na maus sik bilong ol pik i no inap kamapim bagarap long ol manmeri.

Ol rot we ol i ken karim dispela sik long wanpela ples na kantri i go long narapela

em long win i karim binatang i go long ol ples longwe, tais na pekel long ol taia bilong ka, ol gambut su bilong ol fama, ol su bilong ol haika na tu long han bilong ol animel olsem ol pusi.

Ol kantri olsem Gemeni, Frans, Holan na Belgium i rausim ol pik prodak bitong Briten long ol stua bilong ol olsem rot bilong lukautim ol man na animel bilong ol.



India Fama kisim bek 1997 Fiji mama lo

• Chandrika Prasad husat i gat 66 krismas em dispela Fiji Indian we karij o strong bilong em i senisim histri long las wik. *Piksa i kam long Weekend Australian niuspepa.*

Fiji: Mista Prasad em wangepa Fiji Indian fama. Long las wik, em i bin kisim stet i go long kot long famili bisnis na ol samting we em i lusim long taim bilong Fiji hevi. Bihainim apil bilong em, Apil Kot bilong Fiji i bin wokim disisen long kisim bek malti resel 1997 konstitusen bilong Fiji. Dispela em bikpela samting we kantri na ol atoriti long Fiji bai lukluk long en.



Susu taim bilong Meli

Australia:

• Bebi monki tu ya i save susu olsem ol pikinini bilong manmeri. Mama bilong em i bin lusim bebi monki Meli na ol lain long Pert zoo insait long Westen Australia i kisim em na lukautim em. Ol ripot i kam long zoo i tok insait long neks 12-pela wik, Meli bai nidim gutpela lukaut long em i stap laip. I kam inap nau, Meli em namba foa bebi (gibbon) monki we ol i painim na zoo i lukautim.

Sir Don, biknem kriket pilaia bilong Australia i dai



• Dispela piksa long yangpela bilong Don em ol i kisim long 1948 taim em i laik go pilai long Sidni Kriket Graun. Poto em i waitpela tasol ol save lain i wokim na em i kamap olsem kala na i kliia bilong pablik long lukim gut piksa long en. *Piksa i kam long Weekend Australian niuspepa.*

Australia: Biknem man Australia long pilai kriket em ol i kolim em long "The Don" i bin dai long las wik. Nem tru bilong en em John Bradman. Em i wangepa kriket lejen o hiro bilong Australia. Mista Bradman i bin karim nem olsem top kriket pilaia, stat long 1930's yet na nau yet em i dai, nem bilong em i stap olsem wangepa long ol kriket lejen o bikman long Australia. Kantri i sori tru long lusim wangepa biknem lain bilong em.

Top risman na milenia bilong Australia i go long haus sik

Australia: Top risman long Australia Kerry Packer i edmit gen long Royal Prins haus sik long Sidni long dispela wik. Sik bilong em i kamap bihainim kidni operesen na trensplent we em i bin gat

long en las yia. Trensplent i min olsem kidni bilong em i bagarap na ol i karimaut operesen long putim nupela wan long em. Man husat i donetim kidni long Mista Packer em helikopta pilot bilong em,

Nicholas Ross. Ol dokta i lukautim em long haus sik i no autim wangepa toktok long kondisen bilong em, wankain tu long Brotkasting & Pablisng Limitit kampani bilong em.

Ol hos meri i tokaut long ol bagarap



• Janette Pearce lephan, na Valerie Kost. *Piksa i kam long Weekend Australian niuspepa.*

Tupela long ol meri disk joki o i save resis long hos na husat i bin save wok long hos res ples taim ol i yangpela meri yet em Janette Pearce na Valerie Kost i autim toktok olsem ol man i wok wantaim ol i bin save bagarapim (repim) ol long taim bilong wok. Ples na wok ol i mekim em i wangepa hatpela wok bikos planti i save lukim dispela hos res olsem wok na eria bilong ol man. Ol ripot i tok ol meri i no save autim ol toktok long dispela inap nau. Ol ripot i tok ol meri disk joki long Nu Silan i orait, ol wanwok man i luk-save long ol na ol i no wokim nabaut long ol olsem long Australia. Ripot i tok long Nu Silan 30 pesen long ol disk joki em ol meri, skelim wantaim dispela long Australia we 10 pesen tasol em ol meri. Ripot i tok long Nu Silan, ol meri i ikwal tasol wantaim ol wanwok man.

Ol Harry Potter stori em lewa bilong planti pikinini long wol

Harry Potter and the Philosophers Stone em nupela muvi piksa bilong ol pikinini i kamap nau na ol pikinini long Australia bai i gat sans long lukim dispela.

Harry Potter em dispela man long ol stori buk bilong raita JK Rowling we i kamapim bikpela nem wantaim ol pikinini long wol husat i laikim tumas em (Harry Potter).

Raita ya em meri ya. Stat yet long 1996 taim em i kamapim dispela Harry Potter karakta long buk, em i salim pinis. planti milien buk, over long 30 milien na long 49 tokples.

Ol ripot i tok JKRowlings i gat nem nau olsem wangepa long ol meri long Britenhusat i save kisim bikpela mani.

Nau ol i wokim namba muvi piksa long buk bilong em, em bai rekim moa ya.



Muvi bai skruim dispela moa yet.

• **Piksa i soim Daniel Radcliff i ekt olsem Harry Potter long muvi na pisin aul. Long hansut, em wangepa hap long muvi piksa ol i kolim long Gringotts na em nom (gnome) o wangepa long ol liklik hap man.**

Vanimo Green distrik gavman opisa i mas mekim gutpela wok

FELIX RAMRAM i raitim

VANIMO Green memba insait long Nesenel Palamen husat tu i Vais Minista bilong Tred na Industri Micah Wes. I laik lukim olgeta gavman opisa insait long Vanimo Green distrik i mekim trupela wok long wanem stesin ol i go stap long en. Mista Wes i mekim dispela toktok long taim em i lukim planti gavman opisa wantaim tu ol tisa bilong Vanimo Green distrik "i raun raun nating" insait long Vanimo taun. Long taim ol i mas stap long ples bilong ol long mekim wok pipel i baim ol long mekim.

Insait long Join Distrik Baset Praioriti Komiti miting bilong Vanimo Green ol i holim las Fonde. Mista Wes i givim strongpela tok-tok askim distrik edministreta bilong Vanimo

Green Steven Yigrin long raitim wanpela pas i go long Sandaun edministreta na tokim edministreta long dispela bel hevi.

Mista Wes i go het na tok ol gavman opisa bilong Wutung na Bewani i nogat eskius long raun nating insait long Vanimo taun olgeta de long wan wan wik. Em i tok planti long ol i raun long maket, pilai poka, baim na ridim niuspepa na raun nating long ka.

"Bewani i bagarap olgeta, traipela bikbus i kamap na karamapim stesin. Ol pekpek i pulap long ol gavman haus. I nogat didiman opisa tu i save stap antap. Ol narapela divisen i bungim hevi tu em helt na edukesen na ol wokman tu i luk sik na i no amamas long wok - olgeta samting i bagarap.

"Tupela plis ka, bilong Bewani na Wutung tu i kamap olsem ol PMV. Ol manmeri nating i pulap

long dispela tupela plis ka i go kam olgeta de. Moa yet, ambulens bilong Bewani i bagarap bikos long planti misyus na mi laikim ol bosman bilong ol divisen ya i mas save tu long dispela hevi nau i stap.

"Ol tisa husat i mas go pinis long skul ol i mas go long en i stap wokabaut i go kam yet insait long Vanimo. Wanem as dispela ol tisa i stap yet i no klia. Na ol narapela gavman opisa husat i mas go pinis long ples bilong ol long wok tu i no go yet. Sapos olgeta long ol dispela gavman opisa i no go hariap long ples bilong ol long wok, i moa gutpela long pinisim posisen bilong ol na makim ol nupela opisa husat inap long go hariap na mekim wok," Vanimo Green Memba na Vais Minista bilong Tred na Industri i tokaut long bel hevi bilong em.

Dispela taim, Presiden bilong Wutung Onei Bewani LLG Patrick Muleale i tokim JDBPC miting ya olsem, stesin bilong em long Wutung em yet i plisman na kiap. Muleale i tok stat long namba wan de bilong Desemba las yia "i nogat pes bilong wanpela gavman opisa long Wutung, na dispela i stap yet olsem i kam inap nau."

Mista Wes i tokaut olsem taim ol gavman opisa i no stap long ples bilong ol long wok, pipel i no klia long ol as tingting bilong gavman na ol lida. Long wanem ol senis wantaim ol developmen bai i kamap. Olsem na lida i singautim olgeta bosman bilong provins na ol divisen insait long provins. Long wok bung na lukim olsem gavman opisa bilong ol i go hariap long ples bilong ol long wok.

Bos bilong Gembog ben katim musik bilong em yet

KIWURAM KANAKO i raitim

PLANTI taim ol man i save tok olsem ol driman yumi seva lukim long nait o san em ol driman tasol. Ating yu yet i save long bekim bilong en. wankain pasin i kamap long wanpela bikpela nem musik man bilong Madang. Em long Felix Yausi, stail musikman bilong Gembogs ben bilong Angoram, Is Sepik provins.

Taim Felix i gat foapela krismas tasol, em i save singsing na waswas wantaim pul kanu bilong em long Wara Sepik. Tasol em i no save olsem bihain long yia 2000, em bai katim wanpela ten singsing wantaim Tumbuna Trek Studio long Madang. Felix i no bin driman. Nogat. Em i bin mekim samting i kamap tru bikos em i bilip long em yet.

Taim mi stap liklik manki yet, mi save singsing bikpela tru. Na ating yu sanap hapsait long Wara Sepik, yu inap harim nek bilong mi. Mi save laik singsing ol kankain singsing. Mi no save wari sapos mi no singsing gut o kolim ol toktok gut. Mi wari tasol long kilim ol singsing. Singsing em mi ya, Felix Yausi i tokim Wantok.

Taim Felix i stap liklik manki yet, em i save kisim ol hama na so bilong papa bilong em na paitim olsem gita na singsing. Planti manmeri i save olsem Felix em manki bilong singsing stret. Bihain papa bilong em i sapim pangal bilong saksak olsem piksa bilong kulele na taitim foapela string we Felix i save pilai na singsing long en.

Long 1979, Felix i joinim wanpela stringpela ol i kolim long Daligam Mates na em i save pilai olsem lida gita. Dispela string ben i save pilai long kain kain ples na tu long ol pati long hap bilong Angoram. Em wanpela bikpela nem musik lain na save winim ol kain kain prais long string ben resis.

Dispela musikman em man bilong kirap na mekim samting. Em i skulim em yet long pilai gita. Em i save sanap na lukuk na stadi long ol man bilong pilai gita. Felix i tok, mi save lainim samting long taim mi lukim na harim. Orait bihain mi go na traim han

long gita.

Long 1988, Felix husat i save pilai gita olsem pukpuk i paitim abus long tel bilong em i go raun na pilai musik wantaim Salipkot musik ben. Dispela pawa ben bilong hap bilong Kambot. Salipkot i save kam pilai musik long hap bilong Aiome na Karkar long Madang.

Mipela save kukim ol pati na ol liklik ples na ol manmeri i save waia lus na kus pundaun. Yu save long kain musik bilong dispela taim. Paia save lait nating tru aninit long lek bilong ol manmeri long taim bilong danis, Felix i tok.

Taim Felix i raun mekim musik wantaim Salipkot, em i no save olsem Gembog ben tu i bin stat long pairap. Gembog i pailai long tripela yia tasol na Wara Sepik i daunim em. Long 1990 olgeta musik lain i ronowe na lusim ol gita na arapela samting bilong pilai i slip sore long Angoram.

Mi no bin save olsem Gembog i bruk pinis. Taim mi kamap long Angoram, papa bilong Gembog i askim mi long kirapim bek dispela pawa musik ben. Mi wanbel long dispela askim na long 1991, Gembog i soim gen stail na mak bilong em long pairapim ol stail Sepik musik stret. Dispela musik i kalabusim Gembog na mipela i no lukuk i go long baksait, nogat, Felix i tok.

Faipela yia bihain, Gembog i katim namba wan musik albam bilong en. Felix i tok olsem em i lainim planti samting long katim musik kaset. Em i tok olsem taim man i paitim gita na singsing long pati i narakain moa long grup i laik katim ol singsing long wanpela musik haus olsem Tumbuna Trek Studio.

Felix i tok olsem musik bilong Gembog em musik bilong Sepik Wara stret na em wantaim ol lain bilong em i amamas tasol long strongim Sepik bikos em asples bilong ol.

Bosman bilong Gembog i amamas tasol long dispela kaset we em i bin katim long 2000 na nau i wok long pairap long tupela redio stesin, Yumi FM na Nau FM long Mosbi. Felix i tok olsem ol singsing i stap long dispela Wara Sepik, Mi no inap lusim yu


album bilong em i kra i narakain long ol tupela kaset bilong Gembog. Long dispela album bilong Felix em i katim 10-pela singsing we insait long en i gat tupela singsing i stap long tupela tok ples bilong Madang provins. Singsing Korosio em i stap long tok ples Bosmun long Bogia na narapela singsing i stap long tok ples Baiteta Not kot Rot.

Wanpela strongpela singsing em long Pondo Pondo we musik bilong em i kra i liklik olsem singsing Jabilane bilong musik bilong Afrika Hotlain, Pondo Pondo bai mekim yu skin kirap we yu bai paitim das long skin bilong yu na waswas wantaim wel bilong kokonas na sanap tromei lek. Dispela singsing i stori long wanpela man husat i save kaikaim buai olgeta taim. Sapos em i nogat buai, em bai sik. Tasol sapos em i gat wanpela buai em bai soim pawa bilong em. Na sapos yu askim em long givim yu wanpela em bai spetim win na tok, Nogat ya, em wanpela tasol we tupela marit i pait na mekim pundaun long rot. Lukim mi nogat buai long basket. Pondo Pondo i stori long ol man husat i save pasim han bilong ol.

Singsing Maramba Pisai em Felix i tok olsem Mandawali i bilong ples Maramba. Na Felix yet i bilong Karasindo na tupela i brata musikman bilong Wara Sepik. Em i tok Mandawal i gat bikpela nem na bikpela pes long musik long kantri. Tasol nau Mandawali i go pinis. Olgeta man i ken harim nek tasol.

Narapela tupela singsing we i wok long pairap gut tru nau yet em long Wara Sepik na Biem Ailan. Felix i tok olsem ol singsing we bai pulim planti manmeri tru em long Pondo Pondo, Wara Sepik, Akumbalemba Medley, Korosio na Maramba Pisae.

Olsem na yupela olgeta inap long het bilong Wara Sepik i kam daun i go olsem long Sandaun na i kam olgeta long boda mas redi tasol long kisim pul bilong yupela na danis wantaim Sepik disko antap long baksait bilong tumbuna pukpuk stret bilong Wara Sepik wantaim stail Wara manki Felix Yausi.



Gutpela lo long rausim politiks long pablik sevis

NUPELA lo we i tok olgeta eksekutiv opisa bilong ol politikel pati i mas risain long wanem kain pablik sevis wok ol i holim nau em gutpela lo tru. Dispela lo i kamap long rait taim stret tasol em i kam bihain liklik bikos planti pati eksekutiv olsem ol presiden, vais presiden, seketeri na edvaisa i bin holim planti bikpela Gavman wok pinis olsem siaman, menesing dairekta, menesa, edministreta, konsalten na arapela moa wok pinis. Na ol i save kisim bikpela pe na ol gutpela gutpela naispela haus, ka, skul fi bilong ol pikinini na planti gutpela samting moa. Na antap long en, ol i sevim olgeta laik na tingting bilong dispela politikel pati bilong ol we i stap long gavman. Taim gavman i tok long dispela wok o stretim pepa na rekot bilong wokim wanpela bisnis o bikpela wok, dispela gavman opis i mekim hariap tasol. Bikos bos bilong dispela gavman opis em memba bilong dispela pati long Gavman.

Gutpela tru long dispela lo i kamap bikos nau yumi ken lukim ol politikel pati man olsem Jamie Maxtone Graham husat nau em Menesing Dairekta bilong Eda Ranu long Mosbi, Jacob Jamugot siaman bilong Nesenel Geming Bod, Timothy Bonga siaman bilong PNG Habas Bod tasol nau i stap aninit long saspensen na ol arapela lain moa. Long taim bilong olpela gavman bilong Bill Skate, ol i gat man bilong pati olsem Peter O'Neil siaman bilong Pacific Finance Group na arapela moa. Dispela em gutpela lo tru na bai i mas wok strong nau long lukim olsem ol politiks lain i noken wok insait long pablik sevis na pulim o paulim wok wantaim.

Nu Luk Yut sainim kontrak long helpim ol kalabusman na strit yut

LYNNE MINIRU i raitim

NU Luk Yut PNG i sainim pinis wanpela kontrak wantaim Dipatment bilong Sosal Welfe na Developmen (DSWD) long las Fraide long surukim na sapotim ol wok bilong dispela nupela grup.

Man husat i kamapim Nu Luk Yut, Victor Soni i tok kontrak em i sainim wantaim Seketeri bilong Dipatmen bilong Sosal Welfe na Developmen, Joseph Sukwianomb bai helpim grup bilong em long mekim ol samting bilong helpim ol yut na ol narapela kalabusman long painim gutpela sindaun bihain long ol i lusim jel.

Mista Soni i wok wantaim DSWD na em i bin lonsim o tokaut long Nu Luk Yut long las mun. I gat wanpela faiv yia plen i stap pinis bilong grup long karimaut long helpim na givim gutpela sindaun i go long ol lain husat i pinis long kalabus.

Nu Luk Yut i kamap olsem wanpela senta bilong givim gutpela skul na painim wok bilong ol lain husat i lusim kalabus.

Mista Soni i tok olsem wanpela bipo kalabusman, em save sindaun wantaim ol narapela kalabus lain na ol i save toktok long wanem samting ol i laik bai kamap taim ol i kam aut long kalabus.

"Dispela tingting bilong ol narapela kalabusman i bin stap wantaim mi taim mi kam aut long kalabus na long dispela tasol na mi kirapim Nu Luk Yut PNG."

Em i tok i no gutpela long ol yut i lusim kalabus na kam aut na go bek gen long ol wankain pasin ol i save mekim bipo.

Praim Minista, Sir Mekere Morauta i bin givim pinis

K5000 long helpim grup mekim ol wok bilong ol.

Mista Soni i tok i gat tupela bisnis grup bilong Nu Luk Yut PNG na nem bilong tupela em Nu Luk PNG Gads na Nu Luk PNG Kontrakta. Tupela grup ya bai givim wok long ol yut taim ol i kam aut long kalabus.

Nu Luk Yut i save raun long ol skul na ol setelmen komyuniti na toktok long ol yut, skul pikinini na ol manmeri long no ken mekim ol raskol pasin na ol narapela pasin nogut long bagarapim sosaiti ol i stap insait long en. Ol i save autim tu gutnius bilong God long ol pipel.

Mista Soni i tok i no gutpela long Gavman i baim planti gan na ka bilong plis dipatmen taim ol i ken yusim mani long kamapim ol progrem bilong helpim ol lain lusim kalabus.

Em i tok ol mangi long strit i save painim laip i hat olsem na ol i save mekim ol raskol pasin. Sapos Gavman i kamapim ol riabilitet senta o senta bilong givim gutpela na stretpela tingting na wok long ol yut na ol lain pinis long kalabus bai dispela i ken daunim namba bilong ol raskol pasin long kantri.

Mista Soni i tok em i laik lukim Pot Mosbi siti i kamap gutpela na bai nogat planti raskol pasin i kamap. Siti i mas senis long gutpela bilong dispela kantri.

Em i tok ol i salim wanpela yut i go pinis long Nu Silan long stadi long bisnis menesmen kos. Nu Luk Yut PNG i bin stretim rot bilong dispela yut wantaim helpim bilong ol dona ejensi. Narapela tupela bipo kalabus man i stadi nau long UPNG. Planti bilong ol lain husat i helpim Victor insait long Nu Luk Yut PNG em ol bipo kalabusman.



• Ol mama i bung long bikpela intensenel de bilong prea long bikpela Yunaited haus lotu long Mosbi long las wiken.



• Baim geit stret ah. Geit man bilong Bisini Soka Graun i was gut tru long sekim ol stem na tiket bilong ol manmeri i laik baim geit na i go lukim soka long las wiken.




• Dispela em wanpela bikpela sopin senta Vanimo Forest Product kampani bai wokim long Vanimo taun. Dispela bai wanpela bikpela supamakot o sop-ing senta we ol manmeri bai i gat sans long baim planti gutpela samting ol i save sot long en. *Poto: WINIS MAP.*



• Dispela em wanpela wokabaut o wokaton bilong pulim mani bilong helpim asosiesen bilong Frens Faundesen Inkopresen (Friends Foundation Incorporation) long las wik. *Poto: IVAN BAYAGAU.*



• Depuiti Praim Minista Michael Ogio (namel lephan) i sikan wantaim Gavana Jenerel bilong Papua Niugini Sir Silas Atopare long Goroka ples balus long las yia taim wm i go raun long hap long dai bilong wanpela bikpela lida bilong Isten Hailensprovins. (Lephan) Memba bilong Lufa Mathias Karani i sanap na lukluk.



• Dispela haus em bipo Distrik hetkota biong Obura Wonera long Marawaka stesin, Isten Hailens provins. Longwe na bus ples tasol ol i holim strong dispela haus i stap yet long ol wok edministresen bilong distrik. *Poto: YAMES KAY.*

Mosbi siti opim ai bilong lapun

MASTA WAI i raitim

OLGETA mani bilong Papua Niugini i stap na kirapim Mosbi siti tasol. Dispela em toktok bilong wanpela man bilong ples taim em i bin raun i go lukluk raun long Mosbi long las mun.

Dispela bikman bilong Morobe provins i bin lukim Mosbi siti na aigris nogut tru long lukim ol kain kain samting. Bikman ya i skelim olsem olgeta samting bilong grisim manmeri na pulim tingting i stap long Mosbi. Olsem na long dispela as, planti manmeri i go long Mosbi ino save tingim long go bek long ples bilong ol hariap.

Bikman ya i laikim Wantok i kolim nem bilong em olsem Jakop. Olsem na Yakop i tok taim em i lukim olgeta bikpela longpela longpela tawa na haus long Waigani, Boroko na long Taun, em i ting Mosbi i olsem wanpela bikpela siti wankain olsem ol bikpela siti long ovasis. Na taim em i lukim tupela ka i ron long wanpela sait rot na tupela i ron long narapela sait, em i ting dispela em bikpela developmen tru Mosbi i kisim.

Yakop i lukim olgeta kainkain haus kaikai na ol laki haus na planti bikpela hotel bilong dring na pilai laki na disko ples tu. Na em i tok dispela kain tasol na Mosbi em ples bilong raun na painim amamas long wiken. Mi i lukim tru wara saplai i ron long olgeta haus isi tasol, pawa lait i lait long olgeta haus na rot, telefon bilong ring i pulap hangamap long Boroko ples, ol pikinini i no hat long go painim skul na go long skul, haus sik tu i stap long olgeta kona bilong siti. ol kainkain pilai spot tu i stap na planti arapela samting moa. Ol waitman i kam long ovasis i save kam pundaun long Mosbi pastaim na planti arapela senis moa, Yakop i tok. Laip i isi tru na yu no inap hatwok long painim, em i tok.

Bikpela tingting bilong Yakop tok olsem ating Gavman bilong Papua Niugini i putim olgeta mani bilong Papua Niugini i go long stretim na mekim Mosbi i kamap bikpela na naispela ples bilong ol manmeri i raun na lukim na stap long en. Long dispela as em i tok mani i stap long Mosbi siti bikos olgeta de ol manmeri i bisi tru long mekim ol kain kain wok.

Wanpela bikpela samting Yakop i no laikim em, ol bikhet na raskel pasin we i wok long kamap planti insait long Mosbi siti. Em i bin stap sotpela taim tasol na em i harim nius bilong planti trabel na raskel pasin i kamap. Long nait em i harim pairap bilong sotgan na em i save pret nogut tru na tingim meri pikinini bilong em long ples. Olsem na em i tokuat olsem ol man husat i nogat wok mani na raun mekim trabel na raskel pasin nabaut i mas daunim het bilong ol na go bek long ples bilong ol. Bikos Mosbi em ples bilong ol wokmanmeri na ol skul pikinini bilong ol tasol. Mosbi em i ples bilong mani tu. Bikos olgeta samting long stua em bikpela mani tasol, Yakop i tok.

Dispela toktok bilong plesman ya i soim olsem tru ol manmeri long narapela provins i lukim Mosbi siti olsem wanpela bikpela siti we i narakain olgeta long sait bilong developmen. Senis na groa bilong Mosbi siti i bikpela moa winim ol arapela taun olsem Lae, Hagen, Goroka na Rabaul.

Bikman ya i tok provins bilong em long Morobe i save kamapim planti mani long ol agrikalsa wok



• Antap: Praim Minista Sir Mekere Morauta i laitim paia bilong makim bikpela spot bilong Olimpiks long Mosbi. Planti ol ples lain i nogat sans long lukim. Ol bikpela pilai olsem i save kamap long taun na siti tasol na ol ples lain i save harim stori tasol.

Daunbilo: Ol lain Tahiti i bin kamap long mun Jenuari long bikpela soka resis bilong Osenia klap soka resis.



na bisnis olsem kopi, timba, salim kaikai long Lae maket na arapela liklik kes krop. Na tu het kota bilong ol long Lae i pulap tru long planti fektori na masin bilong wokim ol samting bilong salim long stua na ol bisnis nabaut. Lae tu i gat bikpela wof o bris bilong sip we i save karim ol bikpela kago na 'saplai i kam long ovasis bilong salim i go long ol arapela provins na ol bisnis bilong ol. Na Lae i save pulim bikpela mani long takis. Tasol em i sori long lukim olsem siti bilong em long Lae i nogat kain developmen olsem Mosbi we rot bilong ol ka i ron i pulap long hul. Na i nogat ol bikpela bikpela haus na bilding olsem Mosbi. Olgeta bikpela het opis bilong Gavman i stap long Mosbi.

Yakop i tok Lae i save kamapim

planti mani wankain tu olsem arapela hailans provins we i gat ol maining long wel na gol. Ol i save kamapim planti mani tasol provins bilong ol i wok long develop isi isi tru na Mosbi i go hariap tru, em i tok. Wankain tu long ol provins olsem Hailans we ol i gat kopi, gol, kopa na wel, tasol ol i no kisim wanpela bikpela developmen long rot, haus sik, skul, pawa saplai na arapela moa.

Dispela kain tingting bilong Yakop i tromoi askim i go bek long Gavman long pasin bilong em long skelim na tilim aut ol risoses na helpim bilong wanwan provins. Dispela em long lukim olsem olgeta provins i bihainim wanpela step tasol long sait bilong developmen na sevis.

Dispela rot inap mekim ol man-

meri bilong Lae, Goroka, Hagen, Madang, Rabaul na arapela provins i ken stap isi long taun bilong ol yet na amamas long serim developmen na sevis ol i gat. Na ol i noken painim na kisim balus i go pulap long Mosbi siti. Na dispela em inap stapim tu pasin bilong raskel na bikhet long ol siti na taun bikos ol manmeri i stap long provins bilong ol stret na go bek isi long asples bilong ol.

Mosbi i sanap olsem hetkota bilong olgeta gavman opis na dipatmen. Na wanem kain hevi we ol manmeri i laikim i stap long Mosbi na oltaim ol i save kisim balus i go long Mosbi long stretim. Mani bilong ol manmeri i stap tu long ol pasbuk bilong Gavman long Mosbi olsem na taim ol pinis long wok na i no kisim POSF, NPF

o ol ritaiamen mani bilong ol, ol i save kisim balus i go long Mosbi long kisim. Taim ol i gat hevi long tok bilong graun, wok bisnis o kot samting, ol i save go long Mosbi bikos het kota na olgeta fail pepa i stap long Mosbi. Het kota i stap long Mosbi bikos bikpela haus bilong wokim disisen, Haus Palamen i stap long Mosbi we olgeta memba i stap. Olsem na dispela i save pulim ol manmeri i go long Mosbi tasol.

Dispela i olsem namba tu taim Yakop i raun i go long Mosbi na em i lukim ol senis na em i mekim ol dispela toktok. Namba wan taim em long 1978 na namba tu taim em mun Februari, 2001.

Tasol luksave i stap olsem insait long ol bikpela taun na siti, hevi bilong em tu i bikpela. Pasin stil na raskel i bikpela. Ka i save bam long rot, ol man i spak na pait, man i lusim meri pikinini na maritim nupela meri, pasin pamuk, sik AIDS, nogat gutpela haus bilong slip, nogat kaikai na planti moa hevi olsem i save stap bikpela long ol bikpela siti. Na Mosbi siti i gat ol dispela kain hevi i pulap i stap. Ol dispela samting i kamap bikos long developmen we i pulim ol manmeri. Wanwan i painim gutpela sindaun na planti i save abrus na sotwin. Na bikos balus tiket i save kos bikpela mani tumas, ol i stap olgeta long Mosbi na mekim nating i stap.

Ol lida bilong mipela i save long ol dispela hevi tasol ol i save toktok planti na mekim planti mauswara tasol na ino save mekim samting tru long kamap wantaim sampela rot bilong stretim. Tasol dispela em hevi bilong ol pipel bilong dispela kantri na ol lida i stap long karim. Na wanem taim ol i kamap wantaim rot bilong stretim na mekim kantri i kamap gutpela na ol manmeri i ken sindaun isi long wanwan provins bilong ol yet, em i stap long han bilong ol lida long kamap wantaim plen na gutpela polisi bilong ol.

Bilong wanem gavman laikim bikpela pe tru

PEKU PILIMBO i raitim

"MIPELA planti i save painim hat tru long stap wantaim liklik pe ol gavman na kampani i givim mipela long wanwan pe de.

"Laip i ha tru long tude tasol nogat wanpela samting i kamap long stretim dispela hevi tasol nau tasol mi harim olsem gavman i laik hapim pe bilong ol palamen memba na tu long ol lain husat i holim bikpela opis bilong gavman insait long kantri. Dispela kain pasin i gutpela o olsem wanem?" Shorty Steven i sindaun stori wantaim poroman bilong em Philip taim em harim olsem gavman i laik hapim pe bilong ol i go antap.

Steven i bin harim long redio na tu ol planti manmeri i bin stori tu olsem ol lain bilong makim hamas pe ol man mekim liklik wok inap lusim K22 long wanwan wik na bai kisim K60 long wan wik. Tasol gavman i bin tok olsem dispela i no inap kamap. Ol palamen memba yet bai kisim pe i go antap na ol manmeri nating husat i painim hat taim long stap bai i no inap kisim pe i go antap liklik.

Em i bin harim tu olsem gavman i tok olsem ol liklik bisnis manmeri bilong kantri bai kisim bagarap taim ol wokmanmeri bilong ol i kisim pe i go antap. Plant bisnis bai peim ol wokmanmeri na bai i sot long mani bilong kamapim bisnis i go bikpela olsem na planti manmeri inap lusim olgeta wok mani bilong ol na lus olgeta.

Steven i bin wok olsem wanpela klina longpela taim long wanpela stua bilong ol sampela Sainaman. Ol i save peim em tasol i no bikpela mani. Sampela taim ol i save givim em K50, K60, o nogat sampela taim ol bai givim em olsem K44 samting long wanwan fotnait. Em i bin painim hat tru long lukautim meri na faivpela pikinini bilong em husat i stap long skul.

Pastaim Steven i bin kisim dispela nius bilong pei i go antap olsem wanpela gutpela nius stret. Em i bin ting olsem i no long taim bai em inap kisim bikpela mani olsem K120 long wanpela pe dei nabaut na dispela inap helpim em long lukautim famili bilong em.

Steven nau i sindaun na skelim ol samting we i kamap wantaim gavman bilong kantri. Philip, husat i wanpela draiva i bilong sem kampani tupela i wok wantaim. Philip tu save gat wankain hevi olsem Steven. Yu save, stail bilong hailans ya, em bin maritim tupela meri. Na siksipela pikinini i save givim em hat taim stret long lukautim ol wantaim liklik pe bilong em.

Tupela Steven na Philip i sindaun na skelim wanem samting i wok long kamap. Steven i save liklik long wanem samting i kamap bikos em i save putim yau long redio na save rit na rait liklik olsem na em save ritim sampela olpela niuspepa ol manmeri i bin ritim pinis na lusim long em. Dispela i mekim na em i save long wanem samting i wok long kamap insait long kantri. Nau em i sindaun gut tru wantaim Philip na em i wok long stori olsem dispela pasin gavman i mekim long i no hapim pei i mekim na em i tingting olsem dispela pasin i no stret.

Steven i save putim yau long redio na em i save olsem gavman na ol lain bilong makim hamas mani ol wokmanmeri i ken kisim na ol lain husat i save givim tok orait i wok long traim na kamap wantaim wanpela tingting long dispela samting.

Steven i bin harim tu olsem ol mausman bilong ol wokmanmeri i



wok long tok strong olsem gavman i no mekim gutpela samting. Em i mas noken hapim pei bilong ol memba tasol. Ol memba i kisim inap mani na i no gutpela long ol i kisim moa i go antap long wanem mani ol i kisim nau yet.

"Philip, yu save.. Ol bikman bilong gavman na sampela kampani i no save wari long peim skul fi bilong ol pikinini, kain man olsem yu na mi i peim olgeta takis long liklik wok bilong mitupela. Ol dispela takis mani i go bilong helpim na peim skul fi bilong pikinini bilong ol dispela bikman," Steven i tok.

"Sampela bilong ol dispela pikinini i stap na skul nau long Australia o sampela ovasis kantri.

Gutpela haus, sekuriti na ka em i kam long hat wok bilong mitupela. Ol i sindaun long opis tasol na givim aut ol tok oda na mipela i save mekim olgeta wok. Tuhat i save kapsait na skin i save tekewe long kamapim ol dispela samting. Mani bilong dispela hatwok i go na save helpim wanpela o tupela bikman long opis bai ol i kaikai gut na slip gut," em i tok.

"Mipela sampela i save taitim bun olgeta moning na givim siksti i go long wok. Apinun mipela i save kam bek. I no save silip gut. Planti taim nogat kaikai long haus na mipela famili i stap hangre.

"Ol dispela samting i kamap na mi save ting olsem gavman i gridi stret. Planti wokman i kisim bikpela mani long pei, kankain alauwens olsem haus, ka, miting na planti arapela rot long kisim mani. Mipela sampela i lukluk long wanpela rot. Dispela em long pe bilong mipela. Nau gavman i tok nogat, yupele no inap kisim pei i go antap.

"Ol memba nau i kirap na tok olsem ol bai kisim pei i go antap moa yet. Hamas ol kisim nau i no inap na ol i tingting na mekim ol dispela gridi toktok bilong ol o? Ating dispela samting i mekim na gavman bilong yu i nogat pawa. Planti taim ol i wok long tok olsem gavman i nogat strong." Steven i tok.

Philip i sindaun tingting i go na tok: "Mi ting sapos ol hapim pei bilong mipela bai orait. Lukim, planti kaikai bilong stua na maket em prais i go antap tru.

"Planti taim mi no inap baim kaikai long liklik mani, wokim skul fi long sait, givim bas fea mani bilong pikinini. I go moa antap long dispela em ol klos bilong pikinini na meri. Mi no inap raun as nating long ai bilong ol mamneri.

"Mi ting olsem sampela manmeri

i save ting olsem wanem gutpela laip ol i stap nau i kamap tasol bilong ol i kaikai na sindaun gut. Ol i no luksave olsem sampela manmeri i sanap beksait na wokhat long wanwan de bai ol dispela wanpela o tupela i ken kaikai gut.

"Yu tok gavman i ting bisnis long ples bai bruk daun sapos gavman i hapim pei, mi ting dispela i no tru. Lukim, mi ting olsem ating mipela i wok na ol dispela bisnis i bin kamapim bikpela profit tru. Yumi i no save. Gavman i no luksave gut tu. Ol i sindaun tasol na lukluk antap long sampela liklik ripot na kirap singaut olsem pei bai i no inap go antap," Philip i tok.

"Steven, mi save sori long mi yet. Sampela taim mi save driman na ting olsem sapos mi kamap praim minista o bikman, ating mi inap lukim hevi bilong olgeta liklik manmeri insait long kantri.

Planti bilong ol opisa insait long gavman i save ting olsem ol i moa yet. Sapos kain man olsem yu na mi i no laik wok, yu ting olsem sampela bai karim bikbel bilong ol na slip long gutpela hotel, draivim gutpela ekspensif ka. Em bai nogat na hat tru.

"Mi gat graun long ples. Sapos yu na mi i laik i go sindaun longples na mekim wok. Ating em bai i moa gutpela. Yu wok gaden na planim kaikai bilong ples stret na kaikai i stap.

"Sapos ol i les long hapim pe, bilong wanem bai yumi i hatwok nating na nogat gutpela bekim. Yumi bai olgeta taim traim stap laip na wanem taim bai yu kamap long gutpela taim na sindaun wantaim meri pikinini.

Ol waitmanmeri i save kolim ol wokhos. Dispela em hos husat i save mekim wok isi bai ol masta bilong ol i sindaun gut. Ol kankain hevi wok em ol dispela hos i save mekim. Ol masta bilong ol bai sindaun tasol na tokim ol hos long mekim wok. Mi luksave olsem gavman bilong yumi laik kamapim yumi olsem ol wok hos. Yumi hat wok na ting bai ol takis mani bilong yumi i go na helpim wanpela o tupela les man husat i save sindaun nating long opis bai dispela man i ken kaikai gut na mekim nating long ol mani we yumi i save hat wok tru long kamapim." Philip i tok.

"Sapos yu na mi i go long ples, bel bilong ol memba bai slek. Ol bai i no moa go bikpela na sindaun kaikai gut olsem ol i mekim nau," Steven i surikim.

"Mi ting olsem sapos yumi olgeta pipel bilong Papua Niugini i pasim tok long go bek long wan-

wan liklik ples yumi kam. Yumi i go na bihainim olgeta pasin ol tumbuna bilong yumi i bihain, ating bai yumi i stap gut. Em bai hat tru long ol memba na opisal bilong gavman husat i sindaun nating na mekim nabaut long mani na laik kisim moa yet. Mi ting olsem dispela lain bai das i kamap long ol pastaim wantaim ol gutpela pikinini na manmeri husat i stap aninit long ol. Ol dispela lain i no save long mekim wanpela wok gaden o stretim kaikai bilong ol long haus. Yumi mekim olgeta samting na ol i save kam sindaun tasol na mekim yus long dispela ol hatwok bilong yumi," Steven i tok.

Tupela Steven na Philip i bin raun na save wok wantaim taim Steven i mekim ol wok bilong em pinis. Tupela wantaim i kam long wanpela hap bilong provins na pasin na kastom bilong tupela i wankain. Tupela i tingting i go na olgeta tingting i sot. Gavman i no mekim gutpela pasin. Ating ol memba i tok orait, ating ol liklik bisnis inap kamapim inap mani bilong peim olgeta wokmanmeri.

Bipo taim Steven i nambawan taim i kam lon taun em i bin wok olsem wanpela tiboi long wanpela gavman opis tasol bihain ol i rausim em na nau em i save stap wantaim famili bilong em long wanpela setelmen. Em i no wari tumas bikos em i bin laki tru long wanpela liklik hap spes we ol manmeri i les long en. Ol famili bilong em na sampela arapela wankain famili olsem em yet i bin bung wantaim na wokim ol liklik haus wantaim hap plang na kapa nabaut na dispela hap i bin kamap olsem wanpela setelmen.

Tupela wantaim i no bin go long wanpela skul na tupela i no save gut long rit na rait. Steven tasol i bin go long gret siks na em save long ritim sampela liklik hap toktok long English na Pisin wantaim.

Tupela wantaim i bin stap longpela taim na kamapim famili bilong tupela long taun olsem na tupela i save gut tru long wanem samting i bin kamap bipo na wanem samting i wok long kamap nau. Planti manmeri i bin tok olsem planti senis i kamap long mani. Bipo liklik mani i save baim planti kaikai long stua na maket wantaim. Tude, dispela kain mani i nogat pawa bilong em. I no inap baim o kisim bikpela kaikai long ol stua. Na tu bisnis bilong stua em ol i givim i go long han bilong ol sainaman husat i mani pes lain stret. Ol i save peim ol wokmanmeri-liklik mani na salim ol kaikai bilong ol long ekspensif prais stret.

Dispela ol samting i lukim nogat wanpela Papua Niugini manmeri i sanapim na wokim bisnis insait long kantri tu. Planti narapela manmeri long ol dispela stelmen i pilim stret dispela hevi.

Sapos olgeta manmeri i sanap wantaim olsem wanpela grup na askim Gavman o sampela taim samting we i kamap long kantri Fiji inap kamap long dispela kantri tasol ol manmeri i no save bisi long wanem samting gavman i mekim olsem na planti manmeri i kisim taim. Asua i stap long ol yet tu. Ol i bin votim na salim long manmeri i go insait long palamen long nambawan taim. Long ileksen ol dispela manmeri i save pairap na kamap ples klia na long taim bilong hevi, man, nogat ya. Olgeta i save go kaikai na sindaun gut na planti manmeri husat inap stap gut i kisim bikpela bagarap stret.

Philip wantaim Steven i bin tingting na pasim tok sampela taim i go pinis olsem tupela bai kisim olgeta famili bilong tupela na go long ples na dispela i no kamap hariap. Tupela i luksave olsem nogat mani bilong balus tiket, long wankain taim, famili bilong tupela i kamap long ples, husat bai lukautim ol na givim kaikai na arapela samting long ol. Ol manmeri long ples bai i no inap helpim na tu ol manmeri long ples bai tok ol i nogat graun lep i stap bilong ol famili i ken i kam na stap long en.

Nambawan pikinini bilong Steven, Peter i i bin kam aut long skul na nau i save stil raun. Planti taim ol plisman i bin paitim em. Em bin go silip sampela mun long Bomana wanpela taim bihain long em i bin stilim mani bilong wanpela meri. Peter i bin wanpela gutpela manki long skul tasol taim em i go kamap long gret seven, papa Steven i bin nogat mani long helpim em. Ol narapeal pikinini i mekim na kaikai sait tu i sot na em bin stap long setelmen. Nau Peter i save kam pes long stilim ol redio, TV na ol samting bilong ol manmeri long setelmen na salim gen long ol narapela man.


Philip tu i gat wankain hevi tasol narapela brata bilong em i stap olsem na em i save helpim Philip long peim skul bilong ol sampela pikinini bilong em.

Gavman i no laik luksave long sampela ol hevi olsem na hapim pei bilong ol liklik wokmanmeri. Steven i salim dispela kain tingting i go na i no wanbel stret. Planti taim em i save kaikaim tit na ting olsem sapos gavman i bin wanpela man i gat nus na pes, ating em inap kilim dispela man na i go silip long haus kalabus na kaikai fri braun rais.

"Mipela planti manmeri tru i gat hevi nau. Mi bai amamas stret sapos gavman i hapim pe bilong yumi," Steven i tok.

"Yu ting wanem? Mipela planti hap long kantri i driman olsem laip bai isi liklik bai orait. Mani tu i no bikpela na luk olsem ol manmeri husat i save kisim bikpela pei bai kamap i go antap moa yet. Mipela sampela husat i nogat bai stap pipia olgeta na dai olsem ol sik dok we banis bilong ol i sanap i kam aut," Philip i tok.

Tupela wantaim i gat bikpela tingting olsem sapos gavman hapim pei liklik, ating tupela inap kaikai na silip gut long ol krismas i kam tasol sapos nogat, tupela bai hatwok yet insait long laip bilong tupela i go inap dai i painim tupela long wanem kain rot em i laik kisim tupela. Tupela wet tasol long dai i kam painim tupela bikos nogat mining long laip bilong tupela. Wanem taim bai senis i kam?



Kuma Walep maritim Kopun Moru

pela taim ol bikman long ples tokim ol yangpela man long go painim ol pisin, gras, lip, malo, tanget na ol kain samting bilong bilas na singsing.

Ol yangpela go nabaut long bus na ol narapela ples olsem Simbu, Kambia, Hagen. Tasol Kuma Walep nogat wantok long dispela hap so em karim sampela kol kaikai na tekop long Jimi ples.

Em bin gat wanpela kandre long Jimi so em go painim em. Walep wokabaut klostu olsem tu de. Bihain long namba tu de em kamap long ples ol kolim nau Tapi Buga.

Angol bilong Walep amamas long lukim kandre na kilim wanpela pig bilong em. Walep stori long wanem samting em kam long kisim.

Kopunkes tokim Walep olsem long moning taim bai tupela kirap na raun long bus na bungim ol samting em laikim long en. Neks de, tupela kandre ya kisim ol lip, tanget, peints na Kopun Kes givim angol planti kainkain pisin gras, ret, grin, blak, blu na planti moa.

Long moning em laik kam bek long Kurumul tasol wanpela kumul bilong Tapi i ronawe long nait wantaim Walep. Tupela ronawe i kam bek long Minj na bikpela pati bruk long Kurumul.

Tupela Kuma Walep na Kopun Moru bin marit. Bihain long wanpela de singsing kamap na kundu i bin pairap.

**Matt Dedeboh Holeyah
Banz**

Bipo bipo tru long wanpela ples ol save kolim Kurumul long Minj distrik insait long Westen Hailans provins. Insait long dispela hap i gat wanpela yangpela man i save stap.

Nem bilong em Kuma Walep. Baga ya save karim tais na man bilong wokim gaden, haus, banis na pit nating. I go na wan-



Mi les long lusim marit man mi laikim

Dia Pren,

Famili bilong yu i rait long tok nogat long dispela prensip bilong yu wantaim dispela maritman.

Yu yet painimaut pinis olsem dispela i no isi long brukim kain prensip olsem kwiktaim. Bikos yu laikim em tumas. Na dispela inap givim bikpela wari na belpen long yutupela wantaim.

Tasol noken lusim tingting long laik man ya i gat tu long meri bilong em. Em i meri bilong em. Na em bai karim pikinini bilong tupela. Meri ya bai kisim bikpela bel hevi tru sapos em i painimaut olsem man bilong em i laik traim long lusim em.

Pren bilong yu i no inap tok tru tumas long meri ya i bin trikim em long maritim em. Wanpela man na meri save kam bung wantaim long kamapim pikinini. Olsem na man tu i gat dispela hevi bilong famili wankain olsem meri gat.

Taim man ya i bin slip wantaim meri ya, ating em i bin tokim meri ya olsem em i laikim em tumas. Wankain olsem em i bin tokim yu. Em i ken giamanim meri bilong em na raun wantaim yu. Tasol nogut em i ken mekim wankain giaman gen long yu sapos em i bungim narapela

yangpela meri long bihain.

Long brukim kain prensip olsem yutupela i gat bai no inap isi. Tasol ating yu ken traim long painim wok long narapela provins na i go stap.

Sapos dispela i no isi, yu ken mekim strongpela mov long lusim man ya. Bai i moa gutpela sapos yu raitim pas na tokim em. Tokim em olsem famili bilong yu i no laikim dispela prensip bilong yutupela. Tokim em olsem yu i no inap long lukim em moa bihain long wok. Yu bai lukim em taim yu nogat planti wok long mekim.

Sapos olsem wanem, yu ken kisim wanpela wantok bilong yu long kam bungim yu long olgeta apinun taim wok i pinis. Dispela i ken givim hat taim liklik long man ya long kam klostu long yu. Sapos yu stop long raun wantaim em, yu bai gat sans long bungim arapela yangpela man. Bihain yu ken laikim wanpela man we ol lain famili memba bilong yu bai laikim.

Na i luk olsem pren bilong yu i ken luksave long dispela na stat long laikim gen meri bilong em. Na lukautim em na nupela pikinini bilong tupela.

Mi Laiplain



Nem: Michael K Puiye

Krismas: 20 (man)

Adres: P O box 610, Port Moresby. Lukim TV, rit na raitim pas, go lotu, wokim haus na gaden na bungim ol nupela pren.

Nem: Kevin Pel

Krismas: 23 (man)

Adres: University of PNG. P O Box 117, University Post Office, Waigani, NCD.

Save laikim: Go lotu na tek pat long ol kainkain lotu wok, harim gospel na reggae musik. Bai traim na bekim olgeta pas em i kisim.

Nem: Judy Yakumbu

Krismas: 19 (meri)

Adres: P O Box 282, Waigani, NCD.

Save laikim: Helpim mama, wok long haus, raun wantaim ol poroman na tok pilai. Bai traim long bekim olgeta pas.

Nem: Hetlem Fulin

Krismas: 20 (man)

Adres: Behir Primary School, PO Box 2070, Jomba, Madang

Save laikim: Pilai ben, paitim gita, singim lotu singsing, lukim TV, go lotu, stori wantaim ol pren. ridim Baibel, raun long taun na senisim presen.

Nem: Walter Maukos

Krismas: 23

Adres: Sanguiamba Blk, PO Box 3611, Lae.

Save laikim: Harim lotu musik, go lotu, pilai soka, raitim pas long pren, raun wantaim wantok.

Nem: Rasht Rosco

Krismas: 19

Adres: Sanguiamba Blk, PO Box 3611, Lae, Morobe Province

Save laikim: Pilai soka, volibol, harim lotu singsing, pop, reggae na lokol singsing, raitim pas long pren, lukim TV na raun wantaim wantok.

Nem: Kolly Kelau

Adres: PO Box 1873, Lae, Morobe Province

Save laikim: Wokim gaden, pilai soka, basketbol, raitim pas wantaim ol prens na pilai gita.

Nem: Gulho Dulen

Adres: PO Box 1873, Lae, Morobe Province

Save laikim: Wokim gaden, pilai soka, basketbol, raitim pas wantaim ol prens na pilai gita.

Nem: Steven Danane

Krismas: 16 (man)

Adres: Kerema Catholic Mission, PO Kerema.

Save laikim: Go lotu, helpim ol man, pilai spot na harim musik.

Nem: Siringi Simao R.

Krismas: 26 (man)

Adres: PO Box 130, Badili, NCD

Save laikim: Ritim Baibel, prea na sindaun isi long haus, lotu long Sande. Amamas long husat kristen bratasusa i bekim pas.

Nem: Norman Oree

Krismas: 19 (man)

Adres: Vanimo CIS, PO Box 124, Vanimo.

Save laikim: Singsing kwaia, stadim Baibel pilai, ridim buk na raitim leta.

Nem: Amos Isoei

Krismas: 22 (man)

Adres: DAL, PO Box 417, Konedobu, NCD

Save laikim: Go wok, pilai gita long haus lotu, pilai basketbal, tok pilai wantaim ol brata na susa.

Nem: Dutch Numbokas

Krismas: 20 (man)

Adres: Mondaly Trading, PO Box 779, Wewak.

Save laikim: Raun wantaim poroman, go lotu. Mi bai bekim pas olgeta pas mi kisim.

Nem: Martinus Maweng

Krismas: 14 (man)

Adres: Iowara North Montfort Primary School, PO Box 32, Kiunga, WP

Save laikim: Pilai soka, volibol, stori wantaim ol poroman, go lotu long Sande, kukim kaikai, raitim leta na mekim garden.

Nem: Agustinus Maweng

Krismas: 17 (man)

Adres: Iowara North Montfort Primary School, PO Box 32, Kiunga, WP

Save laikim: Pilai soka, volibol, stori wantaim ol poroman, go lotu long Sande, kukim kaikai, raitim leta na mekim garden.

Nem: Joseph Anjoe

Krismas: 22 (man)

Adres: Diocesan Formation Centre, PO Box 357, Kavieng, NIP

Save laikim: Singsing na kamapim nupela singsing, go lotu, pilai basketbol, volibol, tas ragbi, na lukautim ol enimel.

Nem: Christine Moro

Krismas: 17

Adres: Ruino Brothers Trading, PO Box 170, Bulolo, MP

Save laikim: Pilai volibol, basketbol, kukim kaikai, klinim haus, harim gospel musik, go lotu na mekim pren go kam.

Nem: Charles Kilisen

Krismas: 28

Adres: PO Box 125, Vanimo, Sandaun Province

Save laikim: Harim reggae musik, pilai volibol, raitim leta, senisim ol presen, lukluk raun long ol ples na wokim gaden flawa.

Nem: Max Maiwa

Krismas: 25 (man)

Adres: Christ The King Parish, Siau, P O Box 107, Wewak, ESP

Save laikim: Go lotu, harim musik, waswas long solwara, pilai volibal na pilai gita.

Nem: Benadeth Trur

Krismas: 14 (meri)

Adres: P O Box 866, Wewak, ESP

Save laikim: Harim musik, pilai spots, mekim pren wantaim ol arapela lain, go lotu na planti moa.

Nem: Janneth Goi Pilimbs

Krismas: 18

Adres: Saint Mary's Tech School, P O Box 71, Mingende, Kundiawa.

Save laikim: Pilai volibal, basketbal, go lotu, harim musik na bungim ol nupela manmeri bilong narapela ples.

Nem: Cecilia Borag

Krismas: 17 (meri)

Adres: Saint Mary's Tech School, P O Box 71, Mingende, Kundiawa.


Save laikim: tokstori, luk8im TV, go waswas na pilai basketbal.

Nem: Sakin Kaingi

Krismas: 20

Adres: Saint Mary's Tech School, P O Box 71, Mingende, Kundiawa.

Save laikim: Stori wanataim ol poroman, pilai basketbal, go lotu, mekim pani na pinim ol nupela pipel bilong bungim na prenim.



Dia Laiplain,

FAMILI bilong mi bin painimaut olsem i wok long raun wantaim wanpela maritman. Olsem na ol i askim mi long lusim dispela man.

Man ya i tokim mi olsem em i gat bikpela laik tru long mi. Na mi tu mi gat bikpela laik tru long em.

Man ya i tokim mi olsem wanpela meri bin giamanim em na kisim bel long em. Olsem na em bai salim meri ya i go bihain long em i karim pikinini na bai em i stap wantaim mi gen.

Mi laikim em tumas. Tasol mi laik bihainim tu laik bilong papamama bilong mi. Olsem na bai mi brukim dispela prensip bilong mitupela olsem wanem we mi noken bagarapim bel na tingting bilong em.

Mi save lukim em olgeta taim long wok olsem na mi no save bai mi mekim wanem.

ACHING HEART

KANAGE



Kanage bilong Kolowaru long Kume. Wapela taim mama bilong em i painim bikpela sik na em tingting long karim i go long Mt Hagen haus sik. Taim em i go kamap long haus sik, ol nes i askim em olsem. "Kanage yu save long Inglis o nogat? Kanage kirap tokim ol olsem. "Yes, ap-ap." bihain liklik wapela waitman dokta em sekim sikman i meri na em askim Kanage long sik bilong mama bilong em. Wait wantok, "Kanage, what is the sickness of your mother? Na Kanage tok, "she's sick and back pain tired. Bihain master to. "Have you got any friends and relatives in town? Kanage tok, no she's no hat long masin blade. Man, ol nes na dokta lap i dai. Sem taim trangu Kanage kisim mama bilong em na tupela tekov long Kolonaru.

Peter Namba
Kaupena

Kanage bilong Tössin Neps long wapela liklik ples Bawan insait Kowoa eria. Kabwum distrik. Sori tru olsem brata bilong buai em wapela manki long ples stret. Na em i no save long laip bilong taun. Wapela taim em kam long taun long Lae long lukim ol prens na wantok bilong em na em bin stap long haus na kaikai. Ol wantok bilong Kanage i pilim hot we ol i tokim Kanage long putim em pen na ol mekim olsem long Kanage wantu Kanage ron siksti go ausait na kam insait wantaim wapela 20 lita dram. Man ol visita na ol wantok i kirap nogut tru long lukim em kam wantaim 20 lita dram. Ol taim em bai mekim wanem, em putim dram sanap antap long em na stat tanim pen long han

bilong em. Ol man ol visita na ol wantok ol lap na lus wanwan.

Seku unch
Lae

Kanage bilong Watarais long Madang na em i save wok long Mt Hagen. Yu save manki long ples ya. Em i no save long tok Inglis. Yu save manki Madang ya em prenim wapela meri Morobe save wok long Hagen haus sik. Wapela Fraide moning pe de bilong Kanage em lusim wok na go long Hagen pak na mekim save long bia i stap. Sem taim spak longlong wantaim i go long Hagen maket. Sem taim mitim gel pren bilong em. Meri ya kirap tokim em. Helo my darling how are you? Paps Kanage kirap tok yes mi dia darling lim drink long Hagen pak. Meri ya kirap tokim em. You are under control so I will tell you something in the afternoon so drop in the house. Em nau pasin bilong Kanage ya kisim krangi pinis na tekov. Long biknait stret baga man ya i go long haus bilong meri ya na kalap i go antap long kapa na drop i go insait long siment pairap na pundaun krangi insait long haus. Na Kanage kisim taim. Meri ya kirap nogut na askim em, hey! Kanage olsem wanem? Kanage kirap tokim em. Why na yu tokim mi long drop in long nait. Kanage i no save harim tok Inglis olsem na em kisim taim stret. Het bilong Kanage i bruk olgeta na nau em i save ekt olsem longlong raunraun.

James Yace
Kopiago

Kanage wapela man Madang hapkas Sepik na em i marit long Morobe. Wapela taim ol dokta na nes ol i go lukluk raun long ples bilong meri bilong Kanage. Na ol i mekim tok olsem, yupela papamama bilong dispela ples, yupela i gat planti pikinini tru, na bai mipela lainim yupela long pasin bilong spetim pikinini. Wapela yangpela nes i kirap tasol em tokim ol olsem, yupela ol papa, yupela i mas yusim dispela kain raba ben long slip wantaim meri bilong yupela. Taim nes i toktok yet em i kisim dispela raba ben na makim long mama pinga bilong em yet long soim olsem we bilong yusim. Dispela taim Kanage i kisim krangi tingting. Olgeta nes dokta i go pinis nau Kanage laik traim save em lainim. Em tokim meri bilong en olsem, ol taim mi tupela save

kamapim pikinini long olgeta ya, nau nogat. Em putim raba nben long mama pinga long lek bilong en pinis nau em slip wantaim meri bilong en. Sampela man i pinis nau Kanage luksave long meri bilong en na em i belhat long ol nes na dokta. Em i tokim ol olsem mi bikman tumas long pasim bilong mi. Wanem samting yupela laik lainim mi lainim mi stret tasol. Na em i tokim ol long raba bek na ol i lap i dai long Kanage na ol tok, O Kanage mipela i ting yu save kukim gras na het kela i kamap, tasol nogat longlong bilong yu tasol i mekim na het kela i kamap.

Taing Tawen
Finchhafen

Kanage em bilong Kabwum insait long Morobe provins. Em save stap long bus kompaun. Long olgeta nait tupela i save raun long olgeta haus na stilim ol samting. Long nait em em toktok long go stil long haus bilong wapela man Buang. Em go sko long wapela rol kumu gras na go laitim na kukim pinis na stat wokabaut isi isi tru go long haus ya. Taim em go yet, Kanage tingim long wanem samting em i lukim. Samting bilong kaikai o givim wok. Em stat kolektim ol samting i go na kasen kisim wapela karamapim lip banana na tekov i go long as mango na i laik opim ya! Nogat karamap pekpek bilong bebi, mama karamapim na pusim ausait long veranda. Em belhat na karim karamap peks ya go bek na giamanim pren na tok rais 'n' stik ya kaikai hap. Kuan! Han i pulap ya! Putm long maus tasol na bai mi kaikai. Trangu pren Peks i pulap long maus bilong em na em tromoi ol samting nabaut antap.

Pory Geroso
Lae

Kanage em wapela kela man na bikman bilong Morobe. Em i save wok olsem wapela peinta long Rabaul. Wapela taim long nait em i go lukim piksa long haus piksa. Piksa i pinis na em i go bek long haus long rot em i lukim tupela marit i holim han na toktok lap na wokabout i go pas long em. Man em i amamas gut tru. Kanage em wapela fani man stret. Kanage hariap wokabaut abrusim tupela stret na em i kapupu na i krai. Em pret na em i abrusim tupela na i go na meri hia i kilim skin stret long lap na i tok man kapupu bilong kela

man hia i sting tumas. Kanage harim olsem na em i pairapim arapela gen em i no wari em i wokabaut tasol. Man bilong meri hia i krosim meri bilong em na i tok. Em bikman hia, yu noken tok olsem long em. Nau meri hia i kros wantaim man bilong em i stap na ol i paul tasol long kapupu bilong bikman hia. Em i go pinis na i harim meri hia i krai na em i tok samting yu tok i sting olsem wanem na yu krai long en.

Gabriel Simo
Kimbe

Kanage em man bilong raun long Sande tu Sande long Gerehu Stet 2. Em lapun tasol, hap man bilong saitim ai long ol yangpela meri stret. Wapela taim Kanage i sindaun long bas stop. I no long taim, ai bilong Kanage i pas long pes, em save kus pundaun long en. Kanage kisim filings na singaut hey! Meri yu raun long we na yu kam. Meri ya i askim em. Yu tok long husat. Kanage i tok, em yu tasol husat meri ken. Meri ya i bekim tok, yu lapun wrinkel, nogat strong. Kanage i tanim na tok pisin. I no olgeta ya. Mi gat strong olsem pamp bilong Gerehu Sevis Stesin ya. Wantu meri i harim olsem na tanim i go bek long haus.

Bransca Kenue
Boroko

Kanage kalap long wapela balus long Goroka na laik i kam long Mosbi siti. I no long taim na balus i lusim eapot na tekov. Taim balus i ron yet pailot givim wanwan toilet pepa long ol manmeri i stap long balus. Na pailot brukim hap toilet pepa na klinim kus bilong em na i no tromoi pepa. Em holim stap na Kanage wantaim ol lain long balus ting em kaikai. Ol i kaikai i go na pinisim olgeta toilet pepa. Tasol Kanage wok long kaikai yet. Taim pailot lukim olsem, em bel kaskas stret. Na bikmaus antap long ol. "Yu blacks are corrupt people!" Taim Kanage harim olsem, em kirap tokim em. "I no brek man tasol save kop, yu waitman tu save kop. Pailot harim na lukluk strong long Kanage. Na Kanage painim ples long hait na daunim het tasol i go. Na taim balus pundaun tasol em pes man long opim dua na i go aut.

Paul Samuel
Goroka



Sanap wantaim Madang MP Jacob Wama

Dia Edita,

PLIS larim mi, long autim tingting bilong mi long sapatim memba bilong mi long Madang Open, Hon. Jacob Wama.

Nau ol pipel bilong Madang i gat wari long hevi i bungim memba bilong yumi Mista, Wama bihain long plis i sasim em long bikpea mani em i bin kisim long Geming Bod long ronim wok bilong Madang Open ilektoret.

Mi bilip olsem dispela em i wok bilong PDM politikel pati insait long kahtri long bagarapim nem bilong Mista Wama. Olgeta pipel insait long kantri i save olsem Mista Wama em i wanpela strongpela lida tru long pait long stretim ol hevi na bringim developmen insait long kantri na ilektoret bilong em Madang Open. Em i save tok stret long wanem hait pasin na nogut gavman bilong Sir Mekere Morauta na lain PDM pati i save mekim long pipel bilong PNG. PDM tasol i bagarapim sans bilong Mista Wama long winim sia bilong Madang Gavana long las mun taim gavman bilong Madang i laik senisim gavana bihain long olupela Gavana Jim Kas i lusim gavana sia taim nesanel kot i rausim em. Nau ol i gat plen long bagarapim sans bilong em long winim neks ileksen long 2002. Na tu ol yet na lain bilong ol insait long plis i plen na sasim em long dispela mani em i kisim long Geming Bod. Gavman i save tu long ol arapela Madang memba bilong palamen i yusim dispela wankain mani tasol nogat plis i sasim ol na ol i raun fri man tude. Mi sori tru long hevi em memba bilong nau karim.

Mi save olsem memba bilong mi i no longlong na bai yusim dispela mani nating nating bikos em save long hevi bilong Madang Open ilektoret na askim Nesanel Geming Bod long helpim em

long mekim moa wok long Madang. Mi na ol lain bilong mi insait long Transgogol na tu Madang taun i luk save pinis long ol wok Mista Wama i mekim. Tru tumas Mista Wama em i man bilong wokim eksen na i no save toktok nating. Long hap bilong mi long Transgogol, mi na ol lain wan pisin bilong mi i gat bikpela hamamas tru long memba long kirapim dabol klasrum na haus sik long hap bilong mi. Em i helpim tu sios grup na liklik spot asosiesen bilong mipela we nau i gat bikpela senis long laip bilong komyuniti bilong mi. Mipela long planti krismas i makim Madang man long kamap memba tasol i nogat wanpela senis o sevis ol i bringim i kam long hap bilong Gogol. Skul bilong mipela long ples i bagarap na nogat ol olupela memba i helpim mipela inap olsem 20 krismas nau. Tasol taim Wama i win em i mekim samting stret na tenk yu tumas Mista Wama. Yu no mekim wanpela tok promis long 1997 ileksen tasol yu wokim eksen em bikpela samting. Nau tu yu senisim ol toilet bakset sistem long taun na senisim wantaim septik tenk. Em wanpela bikpela samting tru long laip bilong taun komyuniti bikos bipo yet i kam inap nau nogat tru wanpela Madang MP i mekim olsem. Yu save long hevi na save putim helpim i go long en. Mi tok bikpela tenk yu tru long gutpela wok yu mekim winim planti ol olupela memba husat i nogat plen long senisim Madang. Pastaim ol olupela Madang MP i save tasol long helpim wantok bilong ol yet na haitim mani we yumi ken lukim Madang i no senis tumas inap nau.

Nau bai yu kot long 19 de bilong dispela mun, plis redim gut ol ripot na soim stret long kot yu nogat wanpela samting ol haitim long pipel bilong yu. Ol

birua bai stat long sutim yu wantaim spia tasol sanap strong na winim kot bilong yu. Mi save tru olsem i nogat wanpela mani i paul bikos ol klasrum na klinik yu sanapim em i kos moa long dispela rabis K100,000 plis i sasim yu. Soim ol olsem yu no haitim wanpela samting long ai bilong kot na pipel bilong yu.

Mi na ol lain bilong mi long Transgogol bai sanap wantaim yu i go inap long 2002 ileksen na bai mipela makim yu yet olsem memba bilong mipela. Planti taim ol kendidet bilong Madang i save tok Madang bilong Madang tasol nogat wanpela senis nogat na nogat tru long las 20 krismas i kam inap nau yu mekim tru wok insait long Madang ilektoret. Mipela i nogat moa bilip long dispela tok Madang bilong Madang bikos taim ol i win dispela ol memba i save helpim wantok na famili bilong ol yet na yumi ken lukim Madang i nogat wanpela bikpela senis.

Mista Wama wok bilong yu long wokim klasrum bilong ol bus skul na kirapim haus sik na helpim ol sios grup na spots long Madang i bikpela samting tru olsem na tru tumas yu lida tru bilong tude. Mi tok gen mipela bai sanap wantaim yu long gutpela na taim nogut bikos yu mekim bikpela samting pinis long ilektoret bilong yu. Larim kot i mekim wok bilong em na yu ken soim ol pipel long Madang olsem yu man bilong mekim wok na i no toktok tasol. Em ol wok bilong PDM na yu noken surik, sanap strong na mekim moa wok bilong yu insait long Madang na soim ol pipel olsem yu ken stil provaidim strongpela na gutpela lida bilong Madang. Mipela i gat bilip olsem yu bai winim dispela kot wansait nating tru.

**Mangi Asples
Transgogol, Madang**

Larim ol wokmanmeri i kalap long bas pastaim

Dia Edita,

Mi wanpela wokmeri husat save kisim bas long Waigani na go long wok. Wanpela samting mi no laikim stret insait long Mosbi em ol manmeri husat i nogat wok na ol i save kalap na pasim ples bilong ol wokmanmeri long kalap long bas na go long wok.

Olgeta moning bai ol wokmanmeri i resis wantaim ol manmeri husat i laik go raun nating long kalap long bas na dispela kain pasin i mas stop. Inap ol lo man bilong trenspot i kamapim sampela kain lo we olgeta moning ol bas mas kisim ol wokmanmeri tasol na bihain orait bai ol manmeri husat i nogat wok i kalap. Narapela tingting bilong mi tu em long makim ol bas we bai kisim ol wokmanmeri tasol long kain taim olsem siks kilok i go inap long nain kilok na bihain long dispela em ol manmeri nating i ken kalap. Mi bilip sapos dispela kain lo i stap bai ol wokmanmeri i go hariap long wok na mekim ol wok bilong ol na bai bos bilong ol i amamas long ol na dispela bai stapim pasin bilong go long wok leit tru na pinis wok eli stret.

Planti wokmanmeri bilong dispela kantri i no save statim wok long taim stret. Ol i save westim taim bilong ol long raun nating, kaikai buai, simuk,

pilai pokis na mekim ol narapela samting olgeta.

Sapos trenspot sistem bilong yumi i senis, bai dispela i ken helpim ol wokman liklik.

Long apinun, em i orait bikos em taim bilong go long haus. Olgeta manmeri i ken kalap long bas na go long haus.

Planti taim yumi ritim long niuspepa olsem ol papa bilong bas i no save lukautim ol bas. Bas i save doti na ol sit i bruk, nogat glas long windua na ol kainkain ol samting olsem. Sampela taim em i tru bikos ol papa bilong bas i no save bisi long klinim na stretim ol bas bilong ol tasol yumi mas sutim tok long ol pasindia tu bikos sampela bilong ol i no save waswas na kalap doti wantaim long bas na taim bas i ron yet, ol i save mekim pipia insait long bas. Sapos olgeta pipel bilong dispela kantri i tingim gut ol gutpela pasin bilong lukautim helt bilong ol gut, ol bas bilong yumi bai stap klin na luk nais.

Em tasol na yu husat brata o susa i laik sapatim mi o egensim, rait tasol long Wantok na bai mi lukim.

**Wokmeri,
Waigani**

Pipel no sapatim Banz kaunsil

Dia Edita,

Mi laik putim hevi bilong mi long Wantok niuspepa olsem. Ol pipel long Banz taun long Westen Hailans i no save sapatim na helpim taun kaunsel.

Dispela pasin i no gutpela bikos hau bai liklik taun bilong ol Jiwaka i gro bikpela. Taim kaunsel i tok nogat long 1 sipsip long arere bilong maket, ol mama bikhet na kukim yet.

Plis smel ya save bagarapim ol manmeri husat save raun long rot. Em gutpela tasol traime na kuk long wara Mombol bai orait. 2 Narapela em buai skin i save pulap long baret we save stopim wara long ron.

Dispela wara save mekim smel. Plis respektim ol lo bilong maket gut. Harim tok na bihainim bai Banz i kamap gutpela na klinpela stret.

Tenkyu.

Matt Dedeboh Holeyah, SKN Banz

Papagraun Farata rot Bum i kisim nem nogut

Dia Edita,

Mi wanpela man long ples Farata na mi wok i stap long Kokonas Prodak, Rabaul long Is Nu Briten provins. Mi laik autim bikpela wari bilong mi long dispela rot Bum. Wari bilong mi i go olsem. Planti holap na kilim man nating nating long dispela ples nogat.

Na mipela kisim nem nogut olsem papagraun wok long mekim. Plis mi laik gavman mas lukluk long dispela. I gat planti we long stretim dispela tasol gavman bilong S.H wok long slip i stap. Mi gat bikpela wari olsem sapos plis dipatmen sanapim wanpela haiwe patrol yunit long Farata rot jaksen em i orait.

Bikos 115km rot long Moro, Poroma na Pimaga long we tru long lukluk long dispela hevi. Na tu Nipa patrol yunit i longwe tru long lukim dispela hevi tu em i wanpela senta ples bilong Moro, Tari,

Nipa na tu em bai givim pis long tupela Mato, Farata Onepisin pait i bin kamap long 8-10 yia.

Taim birua i ron long rot em i ting ol birua bai hol-ap na kilim mipela long dispela hap. Na Tari o Moro, Pimaga manmeri ron long rot i ting bai raskol bai stap na turangu manmeri i gat pret wantaim na ol wok long ron long rot olsem na plis Poroma Lokol Level Gavman presiden mas save long dispela.

Na sapatim ol man olsem David Ongol, Hailans rijen komanda, Provinsel Plis Komanda PPC) bilong

Sauten Hailans na tu MP bilong Nipa Kutubu mas sapatim tu. Mi bilip olsem sapos haiwe patrol yunit i stap long senta ples. Bai i no inap pait bai kamap bilong wanem mi tok olsem mipela i tingting long sainim priventiv oda na ol i kilim papa bilong mi John Towape.

Wankain olsem bai kamap olsem na mi wari long en na mi tokaut. Sapos yu husat laik sapat o egensim rait i go long Wanok niuspepa na bai mi lukim.

**Richard Hoskome
ENB**

Sapos yu laik salim ol pas bilong yu i kam long dispela niuspepa. Salim i kam long dispela adres:

THE EDITOR
WANTOK NEWSPAPER
PO BOX 1982, BOROKO, NCD.

Memba i nogat tingting long ol pipel

Dia Edita,

Mi wanpela mangi bilong Guriaso viles insait yet long Amanab distrik, Sandaun provins. Mi laik autim wari na bel hevi bilong mi long ol nesanel memba bilong mipela long Sandaun provins.

Bikpela wari na bel hevi bilong mi em i go long Vanimo Green memba na Vais Minista bilong Tred na Industri. Bel hevi bilong mi em olsem, long de 25 bilong mun Januari 2001 long provinsel nius long radio Sandaun.

Mi harim olsem Mista Andrew Kombakor o minista i bin helpim long baim hap bilong skul fi long Nuku provinsel hai skul. Em i bin givim K50,000 long olgeta pikinini husat bai go skul long dispela yia 2001.

Narapela em i givim K83,000 bilong muvum olgeta tisa long go long wanem skul ol PEB i makim ol long go long en. Dispela kain memba em i gat lewa long ol pipel bilong en na tu ol wokman bilong em. Bikpela tru em long olgeta tisa long Sandaun provins.

Las tru mi laik askim wanpela askim bilong mi i

go long memba bilong Vanimo Green.

Askim bilong mi em i go olsem.

(1) Yu i gat lewa long ol pipel bilong yu long Vanimo Green o nogat?

(2) Yu i gat tingting long edukesen bilong ol pikinini bilong bihain tu o nogat?

Em mi i gat dispela tupela askim tasol bilong mi long memba bilong Vanimo Green.

Long pinisim toktok bilong mi em mi laik putim salens bilong mi gen long ol pipel bilong Vanimo Green. Salens em olsem 2002 i wok long kam klostu. Makim rait man na bai em karim hevi bilong yu na mi.

Mitupela i noken tingting long samting bilong nau tasol o tingim mitupela yet. Nogat. Tingim yangpela t'long mitupela long bihain.

Em tasol na yu husat brata long Vanimo Green o ol arapela, yu husat sapatim o egensim. Mi bai amamas tasol long ritim.

**Chris Woxie
Guriaso, Sandaun Provins**

MP bilong Nipa Kutubu i stap we?

Dia Edita,

Mi wanpela vota bilong Nipa Kutubu MP Philemon Embel tasol mi stap nabaut long kostel eria painim sevis. Mi laik sapat long brata Philip Sendex Nyco long Wantok niuspepa long mun Jenueri 4, 2001 long mani bilong ilektoret bilong mipela.

Em i tru taim mi go lukluk raun long lalibu na Pangia, Hon Roy Yaki i save givim kainkain sevis olsem, Muli Yate rot, Yate Wama rot, Yate Pogere rot, Kirane Yarena rot, Muli Paipa rot na ol skul, tasol long Nipa Kutubu nogat na nogat tru.

Ating wanwan as gavman i no save putim mani bilong mipela o

samting, na olgeta yia kwota mani save go we? Ating i gat sampela mani tu we lagifu oil tu save givim long yumi tu tasol nogat liklik sevis.

Mipela long Kum Kusa rot we Dick Mone i givim kontrak long 50 tausen tu yu no laik bekim dispela hat wok we mipela i wokim long 1997. Em i wok long givim sevis long Wild Wes Nembi Piatto tasol.

Tru ol lain bilong yu save givim vot tu tasol win namba i save kamap long mipela. Em i orait plis ol kain konman nabaut i redi pinis long putim lek long haus dua long yupela long 2002 so lukluk long dispela kain man.

Kain kempen menesa i kam bilong yu givim vot long satespaim ol nid bilong em long bel bilong em. Klostu long ileksen lukaut long kempen menesa bilong em, em promis long kisim samting long bel bilong dispela man tasol yu em bai kon tasol long yu makim vot tasol long em.

Tingim gut ol pipel bilong Nipa Kutubu tingting long rait lida na makim vot man. Mi wanpela mangi nating bilong Kusa Tosu wok long R&M Coconut Product long Rabaul.

**Richard Yambol
Rabaul**

Embel winim yia nating tru na nogat man mak long Nipa Kutubu ilektoret

Dia Edita,
Pela bilong Nipa Kutubu laikim mbusmen
Konsen i mas sekim wok bilong dispela memba
bilong Nipa Kutubu hariap long dispela yia 2001.

It long yia 1987 na 1992, 1999 em i no mekim
wopela samting long Nipa Kutubu. Em mipela tok
truning ai bilong God. Wanem as tru gavman givim
man nating long dispela memba.

Gavman givim mani bilong em maritim planti
me na wokim bisnis bilong em yet. Insait long 15
yia Nipa Kutubu nogat palamen memba bilong
bratim developmen i kam.

Laik askim Sir Mekere Morauta. Insait long 15
yia i mas sekim mani bilong Nipa Kutubu pipel
bilong Nipa Kutubu tingim olsem gavman i no save
gavman mani bilong dispela ilektoret.

Tok tru long ai bilong God husat wokim yumi
o. Gavman i mas salim ol wokman na sekim
o. Mani bilong Nipa Kutubu. Olgeta 108
man na bilong palamen mipela lukim na harim ol i
save kisim mani i go stret long ilektoret bilong ol na
man wok.

Olsem wanem long dispela pikinini bilong
gavman Philemon Embel. Yu dispela man
Philemon Embel mipela tokim yu nau. Yu wanpela
gavman stret tasol ol pipel bilong Pomerel
Topua Karamela askim strong na yu save winim

dispela sit bilong yu.

Nau yu mas save olsem God bai givim strafe
long yu long stil pasin yu bin mekim insait long 15
yia. Nau yu kamap bisnismen na yu no wari. Embel
yu inap pinis. Olgeta mani yu stil inap. Yu wanpela
stil man tru insait long 15 yia.

Nau ol pipel bilong Nipa Kutubu i no laikim yu go
stil gen long palamen. yu wanpela stil man tru
insait long palamen haus. Yu mas pilim sem na
lusim dispela sit. Lain bilong yu Embel ol i no save
sapotim yu. Pomerel na Topua Karamela ol i
sapot na yu save win.

Nau ol wokman na mani bilong yu ol lain tru
bilong yu ol Embel kaikai na Pomerel Topua na
Karamela. Asham sapotim yu nating tru na mipela
save pilim pen nogut tru.

Mipeal tok gen yu bikman tasol long ai bilong
God yu bai kisim gutpela pe bilong yu tu. Olsem na
nau tasol yu mas pinisim laik bilong yu wantaim ol
meri bilong yu.

Long 2002 yu sutim graun na yu pilim sem long
kempen. Yu bai tok wanem long ol pipel. Nogat
sem bilong yu.

**Yakpus Naik
Mendi**

Ol plis wokim sait dil wantaim ol bas draiva

Dia Edita,
Inap yu givim mi wanpela spes
long raitim dispela pas i
kain long yu. Mi wanpela mangi
long raitim mi kam raun tasol
long lae, na nau mi draivim bas
long raitim i stap.

mi draiv i go i kam long
bepel, ol plis save saspek nat-
ir long sasim mipela nating i
nating as ol save painim wok
sem taim ol bai lokim
nating long sel o nogat go long
kain long nogat spot fain o ting, ol
bepel laikim mipela long K100
kain long mipela sas.

long mipela no givim em nau

taim bilong ol long wokim sait dil
we ol bai askim mipela long
givim K30, K20 dispela mani em
bilong maus, nek, na bel bilong
ol tasol. Taim ol askim mipela
long givim dispela kain mani,
mipela save givim bikos mipela
pret long slip long sel.

Long dispela as ol plis long
Lae yupela i no save mekim wok
bilong gavman. Ol trepik tasol. Ol
save raun long T4. Ol save
wokim planti pekpek tumas, yu
wanpela dispela plis mi ken tokim
yu, yu wanpela pipia na lesman
long wokim wok long ples.

Sapos yu man tru orait nau

long dispela taim noken askim ol
bas boskru o ol draiva long kisim
mani na baim simuk o buai na
bia tu. Em wanpela pipia pasin
yupela ol trepik plis long Lae
save mekim.

Taim yupela putim yunifom em
yupela ting yupeal man tru na
askim mipela long givim mani
olsem K30 o K20 nabaut, nogat
brata mi tokim yu dast bai go
antap long yu na bai yu stap
olsem longlong man long ples
bilong yu.

**B.F.K
WHP**

Noken komplek tumas long ol memba

Dia Edita,
Fasmanmeri i save amamas tru long
kain tumas long memba bilong ol long
Pela. Ol i toktok olsem planti develop-
ment o go insait long ples. Nau yupela
pela. SDDapos pastaim yu votim rong
rong wanem na yupela rait long ol
Nipela na save komplek tumas. Traim
pela haus bilong yupela tu ya. Raitim pas
i wanpela gutpela samting na salim

long pepa. YUpele save raitim long memba
i no mekim wok long ples, wanem samting
bai kamap. Yu yet putim long tingting na
taim bilong ileksen i kam long 2002. putim
pipia vot bilong yu long rait man na bai yu
no moa raitim pas long pulumapim ol niu-
ispepa.

Traim na rait long narapela samting tu.

PP Bigfoot, Port Moresby.

Maski toktok tumas long dresing bilong ol meri

Dia Edita,
Wanpela meri i stap
nating insait long PNG na
nating laikim tru long raitim
olsem i kam long Wantok
na lae. Tasol mi save les
na go stret long lukim ol
pela long ol man na meri
haring save rait i kam na
komplek tumas long ak ol
mamba long PNG i save dres-
ing.

kain stail olsem.
Tasol mi laik mekim wan-
pela tok i go long ol lain
olsem P.S Petaken na
Sylvia wantaim Nataniel na
ol arapela lain olsem, ol
gutpela brata na susa
bilong wanem na yupela i
save westim taim bilong
yupela na komplek tumas
long ol dispela meri i save
dres.

Mi no egensim yupela
bilong wanem mi save
yupela i gat konsen long
kain ol nupela pasin na stail
i kam insait long kantri
bilong yumi na i save
kamapim planti kain kain
hevi.

Mi laik tok moa olsem em
tru baibel i tok tambu long
mekim ol dispela kain bilas
bilong skin bilong wanem
papa God i no bin wokim
yumi wantaim ol dispela
kain samting na tu baibel i
tok man bilong graun i

nogat rait long skelim pasin
bilong arapela nogat na
nogat stret. God wanpela
tasol inap. Dispela tok i stap
long Rom 2:1-16 het tok.
God i mekim stretpela tok.

Olsem na liklik toktok
bilong mi i go long ol brata
na susa i save komplek
tumas, plis maski nau.
Wanem ol prinses na quin
na yupela westim taim long
toktok tumas?

Larim ol dres kinkain
long laik bilong ol na
wanem kain hevi ol i
painim, em ol yet nau.
Bilong wanem taim yu ske-
lim arapela, yu kotim yu yet
olsem na lukluk long ai
tasol na lusim God i ken
skelim yumi olgeta.

Em tasol na yu husat laik
sapotim o egensim, yu
welkam tasol.

**Nox Bisi Lady
PNG Asples**

Haus i no opis bilong Wenge

Dia Edita,
MI laik skelim tingting ken wantaim
brata Robert Naio long Wantok niu-
pepa long mun Jenueri 4, 2001.

Brata Robert dispela kain toktok
we yu raitim em i no gutpela long mi
na ol manmeri bilong Morobe. Brata
Robert mi tokim yu na ol manmeri
yupela kam long haus bilong Wenge
na em rausim yupela na em i gat rait
na atoriti long mekim.

Bikos yumi PNG yumi stupid
tumas, haus em haus bilong slip.

Harim, maski long ekting longlong
olsem bipo manmeri ol i no gat gutpela
tingting na nau save kilim yumi pinis.
Yusim gut het bilong yu Robert. Haus
bilong Wenge i no opis bilong yu.

Robert yu rong long kam long
haus. Haus i no benk bilong Wenge o
haus kago na em bai givim yu sam-
ting. Yu laikim samting yu kam long
provinsel gavman opis na lukim
Wenge na askim em long wanem
samting yu laikim.

I no long haus bilong em harim?
Brata Robert sapos yu kam long opis
na em rausim yu tok bilong yu bai
mipela sapotim na tok pisin bilong yu
em krai gut long niuspepa na haus na
em bai hat na brata?

Tenkyu long lukim na bekim mi
amamas tasol long lukim em tasol.

**Bob Sinduk
Kimbe**

Doa plentesen i wankain olsem bipo tumbuna i stap taim

Dia Edita,
MI wanpela mangi 100
maunten mi bin i stap 4
yia long Doa plentesen
na mi no bin lukim dis-
pela kain wok long
olgeta hap tasol nau
nupela plis stesin i
kamap long Doa taimm
mi bin lukim olsem bipo
taim papamama i stap
taim ol bin wok long en.

Wankain olsem ol
mekim na mi ting olsem
ol senisim lo bilong
PNG. Tasol mi no bin
harim wanpela nius tu
tasol ol mekim dispeal
wok. Ol save painim
mipela long wok ples na

paitim mipela hap long
wok mani tu na mi
askim sampela save
man o klia liklik long
dispela samting i ken
kliarim mi long dispela.

Mi lukim olsem ol
plisman long Doa i no
bihainim lo bilong PNG
na ol kisim dispela lo i
kam long we na ol
wokim dispela opere-
sen long Doa plente-
sen.

Ol save mekim olsem
na mipela save baim
sel bilong ol long K50
wanwan man ol i no
save wokim wok stret
na mipela save winim

kot taim mipela i no
save kisim bek mani
hariap, bikos ol ting
olsem ol no inap winim
kot ol ting olsem na ol
kaikai mani pinis bihain
ol painim taim.

Dispela kain wok
olsem, pastaim mi bin
lukim na mi no wan bel
long dispela wok bilong
ol. Em tasol na husat
manmeri yu lukim na yu
laik sapotim mi o egen-
sim mi plis rait i kam
long Wantok niuspepa
na bai mi lukim, Tenkyu.

**Ninics N Elop
100 Maunten, Nipa**

Waswas gut na raun long Lae

Dia Edita,
MI wanpela mangi Sepik. Mi stap long Lae, Morobe provins.
Mi no save amamas long lukim ol wantok Hailans, ol i no save waswas na
kam raun long Lae siti. Ol save bagarapim ol gutpela manmeri husat save
kam raun long taun.

Plis yu wanem man o meri bilong Hailans yu ritim dispela pas, plis senisim
pasin bilong stap nating na waswas, nogat go long ples na stap. Em tasol
husat laik sapotim yu yet.

**Nason Nisa
Lae**

Ol kon man, i nogat rait long salens long lagun

Dia Edita,
MI laik bekim pas bilong brata ya. Lorraine
Ryan Nivani i bin kamap long Januari 4,
2001. Brata yu nogat rait long stopim mipela
long salens long lagun. Bikos yu nogat graun
insait long Barupu ples.

Lorraine, yu harim gut, ol bikpela bilong
yu? Ol i save gut long stori, na yu? Yu stil
dring susu yet. Olsem na yu noken raitim pas
nating nating. Na yu tokim mi olsem, yu boda
long Barupu na Arop.

Tasol yu nogat graun long Barupu na Arop.
Olsem na sapos ol Arop i painim yu. Ol bai
paitim yu nogu tru. Bihain yu stap, yu noken
raitim pas moa, bikos yu no gutpela lek. Na
hap tok bilong yu, yu tokim mi olsem, mi
noken pariap na mekim planti nois.

Lorraine harim gut, mi gat graun long papa
bilong mi long Arop. Na mi gat graun long
mama bilong mi long Barupu, na yu?

Yu nogat histori insait long Barupu ples.
Lorraine, harim gut, mama bilong mi i givim
yu susu yu dring na nau yu kamap man, na
nau yu laik salensim mi. Em bai leta "H" stret,
na yu.

Taim yu kisim pas o lukim pas bilong, yu
mekim we bilong yu na go bek long Malin
long Matapau. Bikos, insait long Barupu ples,
yu nogat stori o histori insait long Barupu
ples.

Olgeta Barupu i gat graun na yu? Yu wan-
pela lus patikel i save raun raun insait long
Barupu ples. Na tu yu noken go moa long
Pupa, Pupu em i no graun bilong yu.

Sapos yu ting mi giamanim yu, yu go long
ples na askim paip lapun kandre bilong mi.
Em bai givim yu moa skul, yu stap olsem na

yu longlong tumas. Lorraine Ryan pirivai,
neks taim yu noken salensim mi long lagun o
stori bilong graun bikos yu kam man, na yu
pasim maus.

Olsem na yu paul long stori bilong papa
bilong mi. Yu tokim papa bilong mi olsem, em
bilong Wakan na Tumleo ailan? Harim papa
bilong mi, em propa Arop ya. Sapos yu laik
save? Em i no longwe, yu ken lusim Aitape
na go long ples Arop na sekim stori bilong
papa bilong mi.

Tasol mi pret, nogut ol Arop bai paitim yu
boda man bilong Barupu na Arop, na bai yu
pilim pastaim. Ryan em samting bilong kros
ya? Na yu kain lek nogut olsem ya, bilong
wanem na yu rait.


Yu laikim bai ol i paralaisim yu wantaim lek
nogut bilong yu ya? Mi tok tru long yu, olsem
yu noken rait moa, bikos mi tokim yu pinis. Yu
nogat graun long ples Barupu. Harim, het tok
bilong yu long niuspepa.

Yu tok, yu gat wanem rait long salens long
lagun. Brata mi gat bikpela rait tru long salen-
sim yu long lagun. Mi no olsem yu, pikinini
bilong maling bik bus bilong Matapau, yu
harim pinis?

Na larim mipela, ol papa graun tasol bai
mipela i salens long lagun. Sapos yu gat
planti stori, orait yu ken rait gen, sapos
nogat?

Pasim tupela lek bilong yu na stap isi.
Egensim o sapotim, rait tasol long Wantok
niuspepa.

**Gabriel Wallel
Aitape, Sandaun Provins**



Elcom i lus long NGI

SOFBAL IPOT

ELCOM i no kamapim gutpela beting egensim NGI na ol i lus 7-2 long bikpela gem bilong Pot Mosbi mens sofbal resis las wiken.

Elcom husat i save kamapim gutpela beting egensim ol top tim i no gat dispela kain beting egensim NGI.

Tupela wik i go pinis, Elcom i bagarapim tru sindaun bilong AB Bears 4-0 bikos ol i gat beting. Tasol dispela kain beting i no bin kamap na ol i lus.

Pitsa bilong NGI Patrick Gili i bagarapim

tru sindaun o beting bilong ol pilaia bilong Elcom. Gili i blokim tru olgeta beta bilong Elcom na ol i no skoa liklik insait long 5-pela ining. Ol skoa bilong Elcom i kamap long las-ining tasol dispela i no inap bikos NGI i go pas pinis.

Tupela tim wantaim, Elcom na NGI, i no rekotim wanpela skoa long namba wan ining. Tasol NGI Michael Pukai i rekotim namba wan poin insait long namba tu ining.

Insait long namba tri ining, NGI i skorim 6-pela ran long go pas wantaim skoa. Skoa nau i sanap 7-0.

Alois Odis i sko pas taim em i paitim wanpela hom ran. Orait Clement Womola tu i mekim wankain wantaim wanpela hom ran.

Ol arapela ran bilong NGI i kamap long gutpela beta na ol lain pilaia, olsem Abiuda Ilikis (Jnr), Pukai, Joe Lau na Len Palauva i kam hom.

Tupela wantaim i no skoa long nabma foa ining na long namba 5, Elcom i skorim tupela ran tasol. Ol pilaia i kam hom long Elcom em Demas Tovia na Eddie Simba taim Edward Senna i paitim gutpela bal long bringim ol i kam hom.

NCD makim Arafura volibal tim

VOLIBAL RIPOT

NESENEL Kapitel Distrik (NCD) Pablik Sekta volibal i makim pinis wanpela skwat long go stap insait long Arafura Gems long Darwin, Australia. Dispela Arafura Gems bai kamap long Me 17-26.

NCDSV lig em i memba bilong PNG Volibal Federesen, na nesanel federesen i oraitim ol long go stap insait long dispela resis.

Trening skwat bilong ol meri em: Dorothy Kivung, Brenda Miria, Piti Johang, Wendy Yikolisa (Telikom), Monica Wala, Vavine Naba (Helt), Constance Ivaroa (Air Niugini), Rayleen Bite, Miriam Walo, Ali Vele, Andau Garena (Uni), Agatha Mautu, Betty Kila (PNGBC), Freda Mero (Nat Parliament), Alexia Luke, Petra Binta (Ombudsman), Christine Noi (OCA), Kila Okirua (Post PNG), Waira Galama, Mekeo Kini

(Finance), Jacquelyn Aitsi, Kay Kalim (DEC), Salome Godfrey (Police), Mea Guba (Central) na Tau Gabina (NHC). Kosa em Mea Johang (Telikom), Margaret Kairu na Norah Lavett (POSF)

Mens skwat em: Graham Alu, Charlie Gabina (NHC), Ruruva Ane (Finance), Henry Aika, Geoffrey Mala (Lab/Emp), John Osbon, Michael Uriatah, Andrew Efi (Telikom), Gima Wala (Helt), Kala Walo (NCDC), Billy Koite

(Haboors) Doni Bapi, Andrew Ila (Obudsman), Sebea Mado (Pangtel), Moses Tau (Nat Parl), Steven Godfrey (Polis), Lohia Ben Moide, John Ali (PM's Dept), Murry Charlie (Central), Shem Garena (Uni), Andrew Ofoi (DEC), M Kairu (POSF), Alex Wini na Jonathan Mala (Edukesen).

Ol kosa em John Kombeng (Edukesen), Michael Unatah na Bugave Gabina (NHC) na Walikali Kila (PNGBC).

PNGFA strongim opis long kisim wokman

SOKA RIPOT

PAPUA Niugini Futbol Asosiesen (PNGFA) i laik strongim wok bilong soka insait long kantri na painim ol wokman nau long mekim wok.

Bikpela tingting bilong PNGFA nau em long kamap olsem wanpela strongpela soka kantri long Saut Pasifik rijen long yia 2005, olsem na ol iaskim wanem ol lain i kwalifai long kisim wok.

Sekretari bilong PNGFA Ivan Ngahan i tokim Wantok olsem opis i kisim ol nupela wokman long bihain astingting bilong wol soka bodi, FIFA. Dispela ol posisen em ol posisen long traimekim mekim soka i kamap wanpela strongpela spot insait long rijen.

Mista Ngahan i tokaut olsem PNGFA i laikim wanpela teknikel na developmen opisa, operesen menesa, referi kodineta, pablik rilesen na media opisa.

Dispela ol ol strongpela na bikpela wok tru na ol i laik ol man i gat save na eksperiens i mas

aplai na kisim wok.

Em i tok wanpela bikpela tingting em PNGFA i long strongim soka long grasrut level, skul na youth soka (bilong boi na meri), na stretim rot bilong ol yangpela husat i laik pilai soka na mekim mani.

Wok bilong teknikel na developmen opisa em long lukautim teknikel dipatmen bilong PNGFA, kamapim ol ektiviti bilong kosa, referi, edministreta na dokta. Na dispela man tu bai helpim ol kosa long redim na stretim tim long go pilai ovasis.

Operesen menesa bai lukautim ol kompetisen bilong PNGFA olsem nesanel soka sempionsip na nesanel klab sempionsip na wanem ol bikpela tonamen em PNGFA i laik holim.

Dispela operesen menesa tu bai lukautim ol pilaia husat i laik transfer go pilai ovasis na tu givim laisens ya na lukluk long hevi i kamap.

Mista Ngahan i tok referi kodineta em long lukautim ol referi insait long kantri. Bikpela wok em long lukim referi insait

long kantri i mas stap long FIFA stendad na wankain olsem arapela kantri long wol.

Dispela kodineta tu bai holim ol kain liklik kos bilong referi long mekim ol i save long ol senis long ol lo.

Arapela wok bilong Pablik Rilesen na Media, em long niusman bilong PNGFA. Wok bilong em long raitim nius na tu helpim ol wanwan afiliat i save long wanem samting i kamap long opis long bilong PNGFA.

Narapela wok bilong em tu long kamapim plen bilong PNGFA long mekim soka i kamap strong insait long kantri.

Mista Ngahan i tok PNGFA bai yusim helpim mani i kam long FIFA na tu Osenia long baim ol dispela wokman. Nau yet PNGFA i save kisim bikpela mani inap long US\$450,000 long wanwan yia long FIFA long mekim wok.

Nau yet i gat tingting tu long putim developmen opisa long wanwan rijen long kantri olsem long Hailens, Niugini Ailan, Sauten na Momase.

Ol niusmeri nekim EFM wansait

NETBAL RIPOT

OL GEM bilong Praivet Kampani Netbal resis i wok long kamap gut na strong stret long olgeta wiken nau.

Wanpela gutpela gem em i stap namel long Post Courier na Express Freight Management (EFM) we sampelá sket klostu i pundaun. Post Courier husat em 1 sempion tim i kisim strongpela salens tru i kam long ol meri, EFM, tasol ol i win 29-21.

Insait long dispela gem, pilai i strong tru we wanpela biknem pilaia bilong Post Courier, Lydia


Veali i no amamas long sampela kain toktok long birua bilong em na laik kirapim pait.

Dispela trabel i kamap taim Veali i yusim bodi bilong em long bamim birua pilaia husat i go pundaun. Meri i kirap na mekim sampela toktok we i no gutpela tumas na Veali i belkros na tromoi han.

Tasol Veali i mekim gutpela pasin moa taim em i kam sekhan na holim pasim birua bilong em.

Insait long arapela A gret gem, BSP One i winim Fairdeal 21-19 na Coca Cola i bagarapim tru sindaun bilong STC 20-7.



Dispela gem namel long Coca Cola na STC em wanpela gutpela gem tu. Ol pilaia bilong Coca Cola i mekim senis we i helpim tru tim long win.






• Golatek bilong Post Courier Imorea Sariman i lukluk long tromoi bal long poroman bilong em egensim EFM. Post win 29-21. Foto: HENRY MORABANG.



MILO IKEN WOKIM GUTPELA SAMTING LONG YU



Lukluk bek long 2001 nesanel boksing sempionsip - Goroka



Nestlé
MILO IKEN WOKIM GUTPELA SAMTING LONG

Bears i holim strong pos long Mosbi

SOFBAL RIPO

Aisi-Bishman Bears i soim tru arapela tim olsem ol i laik difendim taitel taim ol i kam bihain na winim Norths 10-6 long bikpela gem bilong Pot Mosbi wimens sofbal kompetisen.

Norths i stat long skoa insait long stat bilong namba tu ining i kam long Freda Sam. Arapela rana

i kam hom em Veronica Ulavai na Robertha Kaul.

Julie Ria tu i kam hom taim Eastern Puipui i paitim wantaim gutpela bant. Kaul i kam hom taim Mechtill Raymond i paitim wanpela gutpeal bal long bringim em i kam hom.

Bears i stat long skorim ran tu long pinis bilong namba tu ining. Dianne Gideon i kam hom taim

Jennice Soweni i paitim wanpela gutpela bal na Mechtill i no holim gut na em i skorim poin.

Wendy Sogai husat i stap long namba tri bes i aut taim kepten Joyce Inguba i no paitim gut bal.

Insait long namba tri ining, ol tripela beta bilong Norths i no skorim wanpela ran. Ol beta em Sam, Ulavai na Ria. Ol tripela ya i no inap kisim namba wan bes bikos ol

Bears i lokim gut tru infil dipatmen ya.

Lapun Delin Bais na Wendy Katusela i skorim tupela ran long surikim skoa i go long 3-4 long sait bilong Norths.

Bears i skorim arapela ran long namba seven ining i kam long Rachel Yoke, Antonaia Tatai, Bais, Katusela, Maggie Joseph Gideon na Inguba. Olgeta ya i kam hom

bikos ol i no Norths pilaia i no holim gut bal.

Norths i skorim tupela ran long namba 5 ining i kam long Raymond Miyuki Kamei long bringim skoa i go long 6-10.

Insait long arapela gem, Mazda winim Chebu 9-1, Wantoks autim Gazelle 10-4 na All Stars nekim Admiralty 8-4.

Ipera i kisim seken sans

BOKSING RIPO

POT Mosbi Amata Boksing Asosiesen (PMABA) i givim sekens sans long sempion boksa Lynch Ipera taim ol i makim em long Arafura Gems tim long Darwin.

Ipera husat i no pait long nesenel sempionsip i autim long nesenel tim bihain long Interim komiti na olupela presiden Steven Tsivele wantaim ol nupela opisel i rausim em long skwat.

Taim Ipera i no go pait long Goroka, dispela i kamapim planti tok pait namel long ol boksing edministresen.

Ipera em wanpela boksa planti ol lain insait long Osenia rijen i save luksave long em. Em i lusim boksing bihain long em i no winim pait long 54kg divisen. Dispela divisen em PNG Amata Boksing Union i askim em long lus weit na pait.

Divisen bilong boksing tru em 57kg.

Teknikel opisal bilong PMABA Dick Larry i tokaut olsem ol i sapotim Lynch Ipera.

"Mipela i laik soim nesenel bodi olsem Ipera em i stap namba wan boksa yet.

"Em i joinim Defence kla na mipela i ting olsem em i tu gut long

stap bek, maskim em i no go pait long Goroka," Larry i tok.

"Ipera i mas kisim gutpela malolo bihain long em i no kamap gutpela pait. Bai yu mekim wanem sapos wanpela boksa i misim kain sans. Em bai wari stret na mas malolo liklik pastaim.

"Em i trening gut na redi tasol long bungim man husat i bin winim tupela taim long dispela divisen," Larry i tok.

Larry i tok dispela disisen bilong em long daunim hevi bilong em long 57kg i go long 54kg na pait long Osenia mipela i no save. Em i disisen bilong PNG Boksing Yunion o bilong em yet.

Olpela eksekutiv bilong PNGABU i givim mipela tok orait na mipela bai go yet long Darwin, Australia.

Nem bilong Pot Mosbi tim em: Jack Willie (48kg), Tony Waisa (51kg), Paul Lare (54kg), Lynch Ipera (57kg), Isacc Saliki (60kg), Stevan Elias (63.5kg), John Deklam (67kg), Kevin Ragu (71kg), James Miviri (81kg), Peter Raphael (91kg).

Ol opisel em Francis Deukari (kosa), Tobin Rowa (asisten kosa), Sam Paulus (menesa), Dick Larry na Manoa Petueli (teknikel opisa).

Biknem pitsa i kam bek gen long pilai sofbal

BIKNEM pitsa bilong Papua Niugini Isimal Marnapal i kambek gen long sofbal taim ol i makim em insait long skwat bilong Goroka long stap insait long nesenel sempionsip long neks mun.

Sempionsip ya bai kamap long Pot Mosbi long Ista wiken.

Presiden bilong Goroka Sofbal Asosiesen henry Pakpak Vainak i tokaut olsem nem bilong Mamapal i stap insait long 20-man skwat.

Fom bilong Mamapal i pinis taim em i lusim Manalos klab long Pot Mosbi long bihainim meri bilong em i go long Goroka.

Boi Matupit ya stap long Goroka na i givim strongpla salens na apim tru stendad bilong pitsing.

Ol selekta i makim 5-pela pitsa na tupela ketsa. Marnapal na

tupela ketsa i baim pinis K500 levi fi. Nem bilong ful skwat em: Apelis Mapua, Bobby Buburu (Malangan), Malcom Ravino (Brown Eagles, Gaulim Tag Kaminiel (Lopi Brothers) na Marnapal (Karanas).

Ol ketsa em Paul Vaitak (Gazelle) na Ferdinand Nongkas (Malangan)

Ol arapela pilaia em Francis Papat, Manu Titus (Brown Eagles), Mathew Tinei, Julius Kapinias, Allan Dito na Bonny Roidarina (Gazelle), Alois Ralai, Albert Ralai, Loi John na Kisa Sabumei (Malangan), Samson Sangin O'Grady (Karanas), Thomas Lawrence (Burma Hawks),

Ol tim opisel em Joe Lumaris (kosa), George Anisan (menesa) na John Supa (tour dairektar).

Mista Vainak i tok ol bai makim wimens skwat long dispela wiken. Na tu long dispela wiken, ol wimen klab bai resis long Mayors Cup.

Ol bai kisim tupela moa ampaia i kam long Lae long lukautim dispela gem long mekim em i ran gut.

Ol sampela bisnis haus i laik sapotim em Spirit Haus, Highlands Traffic Limited na Leroy Mapua Enterprise.

Insait long arapela stori, Goroka sofbal i tokaut pinis ol tim bai stap insait long fainel bilong man na meri. Long resis bilong ol man em Malangan, Brown Eagles, Lopi Brothers, Karanas, Gazelle na Burma Hawks. Na long resis bilong ol meri, United Sisters, Malangan, Burma Hawks na Degi Telikom Bullets.

Anda 20 i tok amamas long sapota

SOKA RIPO

TIM Menesa bilong Papua Niugini Anda 20 John Peka i mekim bikpela tok amamas long ol lain sapota husat i helpim tim long go pilai long Raratonga, Cook Ailans las mun.

Peka i asisten kosa tasol i-wok olsem tim menesa taim Moses Demas i no joinim tim long Pot Mosbi long go pilai long Cook Ailan. Em i tok amamas i go long Lae Futbal Asosiesen long larim ol pilaia bilong Lae long stap insait long dro bilong op-sisen na tu yusim LFA Pak long holim tren-

ing bilong ol.

Na tu em i salim wankaim tenk yu i go long PNG Spots Komisin long yusim oval long trening long Pot Mosbi. Semtaim tu em i salim amamas i go long Ivan Ravu bilong PNG Spots Federesen long liklik helpim bilong ol long siot. Peka i mekim tok amamas tu i go long Charles Lepani husat i wokim yunifom bilong PNG Anda 20 na Fred Bukoya long helpim long trenspot.

Bikpela tenk yu tru i go long Ambers Inn husat i lukautim ol pilaia gut long taim ol i stap long Pot Mosbi. Ambers Inn tu i givim

bas olsem trenspot long taim bilong trening long Sir John Guise stedium. Na long Cook Ailan, ol

Anda 20 i mekim bilong tok amamas i gi long ol menesmen bilong Haitutaki Hostel na Allan na Famili bilong em. Peka i tok em i gurua tru olsem wanpela boi Bukawa, Jonah Pisam, i marit long hap na em i helpim tru PNG tim. Pisam husat i marit long meri Cook Ailan na i gat tripela pikinini.

Tim menesa i tok Pisam na famili bilong em i sapotim gut tru tim long Raratonga. Arapela boi em Isaiah Heagi. Boi ros ya em Porebada ya.


PAINIM BAL RESIS NAMBA 2

JAKPOT K200 TRAIM NA WINIM



RUL BILONG PILAI:

1. Makim X long boks long poto yu ting bal i stap
2. Makim X long pen tasol
3. Katim poto long sisos na salim long: *PAINIM BAL RESIS NAMBA 2, Wantok Niuspepa, P.O. Box 1982, Boroko, NCD.*
4. Nambawan entri i makim stretpela hap bal i stap, em bai win.
5. Las de bilong kisim ol entri em Fraide Mas 30, 2001. Nem bilong wina long mun Mas bai kamaut long Wantok bilong Epril 5, 2001.
6. Long Wantok bilong Epril 5, 2001 bai gat nupela K100 prais mani resis bilong Mun Epril. Bai gat resis bilong olgeta mun i go inap mun Desemba, 2001.
7. Disisen bilong komiti i makim wanpela wina em i fainel.
8. Wina bai kisim sek mani, na i no long kes.
9. Raitim nem na adres bilong yu: **Nem.....Address.....**
.....Krismas.....
10. Yu ken salim moa long wanpela entri, tasol no ken yusim poto kopi.
11. Ol famili o pikinini bilong ol wokman meri bilong Wantok i no inap stap insait long dispela resis.



IKEN WOKIM GUTPELA SAMTING LONG YU



Boroko i rausim strongpela salens na win

RAGBI LIG RIPOT

BOROKO Swamps i stapim strongpela salens i kam long Freeway Knights bilong Ranuguri Setelmen na win 10-6 long Sir Mekere Morauta Kap ragbi lig resis long Sir Hubert Murray stadium.

Swamps i yusim gut dispela tupela penalti long winim Knights long bikpela A gret gem bilong apinun. Dispela ol penalti i kamap long las minit we ol Swamps i putim presa long Knights na ol i wokim asua na ol i putim trai.

Ol boi long Boroko i no westim taim taim huka bilong ol, Charlie Malore i putim trai. Orait koversen i no gutpela tasol ol i kisim wanpela penalti we Justin Tom i kikim na surikim skoa i go 6-0 long haptaim.

Na wining trai bilong Swamps i kamap long kona taim winga Nori Asoriufa i bihainim ol fowat na kisim na putim.

Swamps i winim 4-pela gem, na dro long tupela gem pinis.

Pilaia na kosa Simi Ago i tok win bilong ol i kamap bikos ol pilaia i kamap gut long trening.

"Dispela em wanpela strongpela gem tasol ol i putim gutpela pait. Mi tokim ol boi bipo long gem long traime strongim difens bilong mipela," Ago i tok.

I tru olsem ol i nogat ol biknem pilaia tasol Darby Joseph na Tony Wally i go pas long ol dispela yangpela pilaia.

Kosa bilong Knights Larry Saea i tokaut olsem dispela tupela penalti i bagarapim tru sans biong ol boi long win.

Em i tok dispela tupela penalti ya i no inap kamap. Referi i rong long givim nating dispela tupela penalti. Tasol em i amamas stret long ol boi bilong em i putim strongpela pilai.

Nau ol gem bai kamap long kamap long Sarere na i no moa long Sande. Ol ogenaia i muvim gem i kam long Sarere bikos ol Poreporena Ragbi Lig tonamen i pinis na ol bai i no inap pilai moa.

• **Straika bilong Tawala i hetim bal long golmaus egensim ol Babaka long Pot Mosbi soka resis. Babaka win 3-0.**

Ol liklik soka senta mas kisim tok orait

MADANG SOKA RIPOT

IGAT wanpela singaut i go long ol soka asosiesen insait long Madang long noken holim ol soka resis taim ol i no kisim orait long holim ol dispela soka resis.

Biknem papa bilong Kalibobo Blues Soka klab long Pot Mosbi Andrew Frank i mekim dispela toktok bihain long em i bin painimaut olsem ol i bin gat kain resis olsem i bin kamap long 2000 we Madang Soka Asosiesen i no bin save na tu i no bin givim tok orait.

"MSA tasol bai givim tok orait long ol kainkain soka kik resis long provins. Ol manmeri nating i

brukim lo long holim nating ol dispela kain resis. Ol i brukim lo bilong MSA taim dispela kain soka kik resis i kamap," Mista Frank i tok.

Wantok i painim aut olsem wanpela bisnis man long Karkar Ailan i bin stap baksait long kamapim dispela soka resis we ol klab long ailan yet na sampela long bikples i bin go kik resis. Nem bilong dispela resis em Saleng Kap na i kamap long pinis bilong las yia 2000.

Mista Frank i tok olsem sapos wanpela birua i kamap long ol dispela kain long ol pilai resis bilong MSA bai ino inap helpim bikos MSA i no givim tok orait long holim dispela kik resis.

"Mi no laikim dispela kainkain pilai resis long kamap nating. Husat lain i laik kamapim ol dispela kain resis i mas kisim tok orait bilong MSA pastaim. Olgeta lain soka klab long provins i mas save olsem MSA tasol i gat pawa aninit long long bilong FIFA na PNGFA long givim tok orait long holim dispela kain resis." Frank i tok.

Wanpela mausman bilong MSA husat i no givim nem i tok olsem em i harim dispela soka resis i kamap tasol ol lain i no kisim tok orait bilong MSA. Em i wari tru olsem ol lain Karkar i go pas long dispela i no kisim tok save ya.



Sempion tim holim Sentral Kap

AUSSIE RULES RIPOT

SEMPION tim bilong NCD Rules Futbol Asosiesen, University Bulldogs, bai go pas long holim Sentral Kap Rules Futbol tonamen long University ovals long dispela wiken.

Dispela tonamen bai stat long Fraide na pinis long Sande wantim fainel.

Em i namba wan taim dispela kain tonamen i kamap we wanpela lokel klab i go pas long holim tonamen long strongim aussie rules long Sentral provins.

University klab bai givim yunifom na ol arapela samting bilong pilai wantaim rul bilong kompetisen.

Samting olsem 8-pela tim insait long Sentral provins i givim nem pinis long dispela resis we ol bai putim tim long Anda 17 na sinia divisen. Ol tim i givim nem pinis em Pul A: Karawa, Alukuni, Hula 2 na Gereka. Na long Pul B em Keapara, Hula 1, Kalo na Maokele/Tubuseria.

Kodineta na kosa bilong University Bulldogs Scott Reid i tokaut olsem dispela em i sans tu long ol klab insait long NCD Rules Futbol Asosiesen long painim o kisim ol pilai bilong ol.

Ben Noel sapotim setelmen spots

SAPE METTA i raitim

WE i stap ol bisnis lain, politisen, ol kaunsila na ol lida manmeri bilong Goroka na Isten Hailans. Yupela i stap we nau? Yupela i luksave tu long lo na oda i go daun tru long Goroka taun tu o nogat. Sapos yupela i luksave long dispela, watpo na yupela i no laik i kam insait na sapotim ol setelmen spot na mekim ol yangpela (yut) man na meri i bisi long pilai spot na ol i ken lusim tingting long mekim ol bikhet pasim na bagarapim taun na setelmen komyuniti.

Dispela em sampela askim em yut lida na Goroka setelmen spots kodineta, Moses Degiis Peter i bin mekim long wik i go pinis taim em i bin kamap long kisim K400 kes mani em wanpela lokel bis-

nis man, Ben Noel i bin donetim long sapotim setelmen spot insait long Goroka taun.

Mista Noel i save ronim bisnis bilong Poka masin, PMV bisnis na tu em i papa long wanpela popula nait klab em Phantom's Hideaway.

Long taim em i presentim dispela K400.00, Mista Noel i tok, sapos ol politisen na ol arapela bisnis lain i no inap sapotim turangu ol yut bilong taun na setelmen, husat tru bai givim han na helpim ol long wanem ol gutpela samting em ol i wok long mekim.

Gutpela piksa em i dispela setelmen spot we ol yangpela manmeri na ol pikinini tu i wok long kam bung wantaim long psin bilong yuniti, sindaun wantaim bel isi, i stap longwe na abrusim trabel na bikhet

pasin, save long narapela narapela na pilai spot.

Mista Noel i tok, "long ronim bisnis em i no isipela wok, tasol mi gat bikpela wari long turangu ol yangpela man na meri husat i no wok na i stap rauri nating insait long taun na ol setelmen arere long taun.

I tru olsem ol yut lida i wok hat tru long kamapim kain setelmen spot progrem long wanem ol i gat bikpela wari long ol yangpela olsem na long dispela as ol i laik bungim ol yangpela long pilai spot na abrusim ol kainkain bikhet pasin.

Tasol yumi mas tingting gut na save olsem sapos yumi ol bisnis lain, politisen na ol lidaman na meri insait long taun na provins i no luksave na sapotim ol dispela yangpela lain, ol i ken givap isi tasol long dispela ol setelmen spot, tanim bek wantaim bel nogut o belhat

na bagarapim sindaun bilong taun na setelmen komyuniti wantaim ol bikhet pasin, na hevi bilong lo na oda bai i ken i go antap gen."

Mista Noel i donetim dispela K400 i go long ol setelmen spots menesmen long bain ol prais samting olsem sil, tropi na ol arapela prais long presentim i go long ol wina bilong ol setelmen tim bihain long gren fainel we bai kamap long neks wik.

Long ol arapela setelmen spot olsem op-sisen ragbi lig, Mista Noel i donetim wanpela bikpela sil we i kos moa long K5,000 na tu arapela K2,000 em i putim ap olsem prais mani we wan wan tim husat i tek pat long Goroka Eben Setelmen Op-sisen Lig (GUSOL) bai i ken skelim na kisim bihain long gren fainel long pinis bilong dispela mun.

Taim Wantok i askim Mista Noel long tingting bilong em long go het moa na helpim ol yut, em i tok, "mi i save wari tru long wokim bisnis, tasol sapos ol yangpela i nidim tru sapot, ol i gat spes long liklik profit baset bilong mi."

"Helpim o sapot bilong mi i no stap long hia. Bai mi i go het yet long givim sapot long ol yangpela bilong Goroka," Mista Noel i tok.

Goroka Setelmen Spots Kodineta, Moses 'Degiis' Peter i givim bikpela tok amamas na tenkyu i go long Mista Noel na i surikim tok-tok i go moa na i tok, sapos i nogat kain helpim, setelmen spots bai i no inap pinis gut.

Em i tok, "sapos yumi olgeta i wanbel na bungim het na wok bung wantaim long sapotim ol kain bikhet yangpela man na meri yumi i ken lukim planti gutpela

senis na gutpela sindaun tu bai i ken kamap insait long ol setelmen, taun na provins bilong yumi."

Mista Peter i tokim Wantok tu olsem em i no amamas na wanbel long ol Esien husat i wokim bisnis insait long Goroka, long wanem taim em i save kamap long ol na askim long donesen long sapotim setelmen spot, ol Esien ya i no save givim han na helpim.

Em i tok ol i save wokim bisnis na kisim mani wan-sait. Em ol i save amamas tru long mekim dispeal, tasol long helpim turangu ol arapela, em ol i no inap tru long givim han.

Mista Peter i tok, long holim pas strong ol yangpela long pilai spot, ol i mas kisim sampela gutpela sapot long wantaim pasin em Mista Noel i mekim.



IKEN WOKIM GUTPELA SAMTING LONG

WANTOK Classifieds

FAX: 325 2579 - PH: 325 2500

EMAIL: word@global.com.pg

LINEAGE ADVERTISEMENTS

Lineage: Advertisements are charged at K4.40 per line of 23 letters incl. space. Photo K10.00 each and appear 3.5cms. All advertisements inclusive of VAT. See Rate Card for conditions.

Office Hours:

8.30 to 4.00 Monday to Friday
Classified Advertising Available in the following formats

Lineage: Available in single line, minimum two lines deep

Display: Available per single, double or four column wide, minimum size 3 cms deep.

Single Column Display Advertisement are charged K4.42 per single column centimetre. Costing is dependent on Logo and Artwork which may appear in the advertisement. Minimum charge is for 3cm x 1col.

Display Classifieds are charged at K4.78 per single column cm. They maybe double column, four column or full page with or without borders. Costing is dependent on space, logos and artwork which maybe requested. Minimum size is 3cm x 4 columns.

Wantok is published on Thursdays. Deadline for camera ready work is 12 noon Wednesday; prior all other 12 noon Tuesday.

Classified Index

AUTOMOTIVE

- Boating
- Motorcycles
- New & Used Cars
- Parts & Auto Spares
- Trucks & Tractors

NOTICES

- Electoral Notices
- Government Notices
- Law Notices
- Public Notices
- Tender

EMPLOYMENT

- Position Vacant
- Position Wanted

SEASONAL NOTICES

- Easter Greetings
- Father's Day Greetings
- Mother's Day Greetings
- Christmas Greetings
- Season's Greetings

GENERAL

- Amusement
- Auctions
- Business for Sale
- For Hire
- For Sale
- Going Finish
- Lost & Found
- Machinery for Sale
- Pets

- Wanted to Buy
- Wanted to Sell

PERSONAL

- Bereavement
- Birthday Greetings
- Births
- Condolence
- Deaths
- Engagements
- Funerals
- In Memoriam
- Wedding

PROPERTY/REAL ESTATE

- Factories

- Warehouses
- For Rent
- Share
- Accommodation
- Holiday Resorts
- Houses for Sale
- Houses to Let
- Industrial Properties
- Properties for Sale
- Investment
- Properties
- Leave House Rooms
- Board Vacant
- Wanted to Rent
- Overseas Investments

**PORT MORESBY SCHOOL SOCCER ASSOCIATION
PUBLIC NOTICE**

**ANNUAL
GENERAL MEETING (AGM)**

For Parents, Teachers and Coaches of Schools
to attend the AGM

- **DATE :** SATURDAY 10th MARCH 2001.
- **TIME :** 1:00 - 4:00 PM
- **VENUE :** LAMANA HOTEL

AGENDA:

The business to be transacted at the annual general meeting are:

1. Acceptance of minutes of the previous AGM
2. Matters arising from such minutes
3. President's Report
4. Treasurer's Report
5. Election of Executive Officers
6. Election of a Patron
7. Registration Deadlines & Fees
8. Start of Season

M. Sanginumbuk
Hon. Secretary

**OL PESENEL AKAUN
FI BILONG RAUSIM MANI**

PNGBC i toksave nau long ol kastoma olsem long namel bilong mun Mas 2001, bai benk, i sasim fi long ol pesenel akaun taim yu rausim mani.

SPESEL KONDISEN

- Bai benk i sasim fi taim yu rausim mani moa long foa pela taim long wanpela mun.

SASIM OL FI

- Rausim mani long witdrol Fom c long Kes Sek - K2 long wan wan witdrol.
- Rausim mani long EFTPOS - K1 long wan wan witdrol.
- Rausim mani long ATM - 50 toea long wan wan witdrol.

I NOGAT FI

- Bai i no gat fi long ol passbook na ol narapela akaun.
- Ol akaun we i gat minimam balans i stap antap long K3,000 (tri tausen kina) long wan wan mun.

I no gat fi taim yu yusim Savecard long stua na long ol narapela bisnis. Yu ken kisim moa toksave long ol liklik toksave pepa long lokal brens bilong yu.



**FOR THE CHEAPEST RATES IN
TOWN...CALL OUR SALES TEAM ON**

TELEPHONE

325 2500

FAX

325 2579

for your Advertising requirements

**For your Classifieds adverts,
Call our Advertising Sales Team on
Telephone: 325 2500 or Fax: 325 2579**

Basketbal i kisim moa skul

BASKETBAL RIPOT

OSANIA Developmen opisa bilong basketbal, Stuart Manwaring i holim wanpela level 2 kosing, referi na edministresen kos long Nesenel Spots Institut long Goroka, Isten Hailens provins. Manwaring i kam long las wik Fraide na

go stret long holim dispela kos long Goroka.

Samting olsem 21 kosa, 18 referi na ol edministreta i kam long Sauten, Hailens na Momase rijen long sindaun long dispela kos.

Dispela em i namba wan level 2 kos i kamap long kantri.

Manwaring i bin

holim level kosin kos sampela taim i go pinis.

As bilong holim dispela klinik, Manwaring i tok long traim strongim level bilong basketbal we i bin go daun.

"Long strongim dispela level, kosa, edministreta na ol referi i mas gat ol save pastaim ya. Sapos nogat gutpela

kosa, referi na edministreta, basketbal bai i no inap ran gut ya," Manwaring i tok.

Las taim PNG winim medal em 1991, ol meri i winim gol na ol man i pinis namba faiv. Na long 1999 SP Gems long Guam, man i stap long namba 7 na ol meri i surik i go daun olgeta long namba nain.

Boksing i paul yet



•Tupela boksa i sutim nus long Goroka long nesenel sempionsip las wik.

Poreporena afiliet i go long nesenel bodi

NETBAL RIPOT

NUPELA Poreporena Netbal Asosiesen long Hanuabada i kamap ful memba bilong Papua Niugini Netbal Federesen.

Long makim dispela ful membasip bilong ol, ol opisel na pilaia bilong Poreporena i putim bikpela singsing na amamas long las wik Sarere.

Presiden bilong PNGNF Janet Sape i tokaut olsem dispela wok em Port Mosbi Netbal Asosiesen i go pas long traim pulim moa viles tim i kam insait long nesenel netbal federesen.

Poreporena em i namba wan asosiesen insait long Sentral provins long joinim nesenel bodi.

Sape i tok "Poreporena i

soim rot pinis, na i gut ol arapela viles asosiesen long Motu Koitabu na Sentral provins i ken kamap memba bilong nesenel netbal federesen so ol i ken gat sans long pilai long intanesenel tonamen."

"Olsem ol memba, nau ol i ken kisim wanem helpim em PNGNF i gat olsem long kosing klinik, amapaia na tu stap insait long nesenel sempionsip.

"Olgeta tenk yu mas go long Kori Navuru wantaim ol eksekutiv bilong em husat i mekim bikpela wok long helpim Poreporena i kamap memba bilong PNGNF," Misis Sape i tok.

Em i tok olsem PNGNF bai mekim dispela netbal i mas

kamap bikpela insait long kantri.

Dispela memba bilong Poreporena nau i mekim na ol i ken putim tim long nesenel sempionsip, junia sempionsip em long Epril (anda 13, anda 15, anda 17 na anda 21) na sinia sempionsip long Kimbe.

Bai i gat trening kem gutpela pilaia, na tu kos bilong ol ampaia na kosa we bai kamap long 2001 sisen.

Presiden Navuru i tok dispela em gutpela long helpim ol meri Hanuabada. Nau ol i lukluk long wok bung wantaim netbal federesen.

"Bikpela astingting em long traim kamapim ol ples pilai na lukim ol i ken salim tim loag nesenel sempionsip," Navuru i tok.

Mosbi statim sisen wantaim 9's tonamen

RAGBI LIG

POT MOSBI Ragbi Lig bai statim 2001 sisen bilong em wantaim 9's tonamen long dispela wiken. Dispela tonamen bai ran inap long tupela wiken na bihain sisen propa bai stat long Mas 24-25.

Dispela 9's ragbi lig tonamen i save kamap olgeta yia. Em i bin stat tripela yia i go pinis na Wikila Enterprise i save

sponsorim dispela resis.

Tonamen ya i save pulim tim i kam long Galp na tu long Sentral provins.

Solomon Ravu, edministresen opisa bilong Pot Mosbi Lig i singaut nau i go long ol tim insait long Galp na Sentral na ol memba klab bilong PRL long givim nem sapos ol i gat laik long resis.

Nominesen bilong 9's Salens em K200

long wanwan tim. De bilong givim dispela mani i pas aste, na Wantok i no save hamas tim i givim nem pinis long stap insait long dispela resis.

Wanem ol tim i laik givim nem i mas lukim Solomon Ravu long PRL opis na kisim nominesen fom. Ol bai i no inap oraitim ol tim i salim nominesen i kam bihain long de bilong

pasim nominesen.

Nau yet, i gat strongpela resis nau i kamap long ol tim long putim tim insait long Fes divisen bilong PRL.

University na Paga i givim pinis aplikesen bilong ol long stap insait long dispela resis ya. Ol arapela viles tim em Hisiu Knights, 7 Mile Jets na Eastern Roots bilong Frigano op-sisen ragbi lig.

PNG Ragbi Futbal Lig bai ino inap rausim presiden Nandoma

PAPUA Niugini Ragbi Futbal Lig bai i no inap rausim disisen bilong em long saspensidim presiden bilong Lae Ragbi Lig Daniel Nandoma long tripela yia.

Siaman bilong PNGRFL John Numapo i mekim dispela toktok long jenerel miting bilong PNGRFL long Goroka las wiken taim ol sapota bilong Nandoma i protes long Nesenel Spot Institut.

"Bot i wanbel olsem ol i no inap rausim disisen (long saspensidim Nandoma). Ol plis long Goroka i kam na rausim ol sapota bilong Nandoma bipo ol i laik givim sampela pepa notis long Numapo.

Nandoma i saspensidim las wiken bihain long em i mekim sampela toktok i no stret long wok bilong ragbi lig. Las wik Fraide, em i askim PNGRFL long rausim na givim liklik mekim save long em.

"Mi rait i go pinis na askim Bot bilong yu long senisim

tingting long saspensidim mi long tripela yia olsem presiden bilong Lae Ragbi Lig," dispela em toktok i stap long pas bilong Nandoma i go long Numapo.

Dispela ol toktok Nandoma i raitim long pas em bikos em i belhat, na mi bai rausim tok-tok bilong mi na mekim bikpela tok sore i go long Bot. "Nau yet mi bai lusim opis bilong president na tu presiden bilong Royals ragbi lig klab long bihainim disisen bilong Bot," Nandoma i tok.

Numapo i tok sapos ol i rausim disisen long Nandoma, em bai setim rot nogut, na bihain ol arapela presiden bai yusim dispela long toktok egensim PNGRFL na ol wok bilong em long kantri.

Presiden Numapo i askim olgeta presiden long noken mekim toktok i bagarapim PNGRFL na ragbi lig insait long kantri bikos nogat wan-

pela gutpela samting ol bai kisim sapos nius nogut i kamap.

"Nem na Wok bilong PNGRFL em i bikpela samting tru," Numapo i tok.

"PNGRFL i bikpela moa long Lae Ragbi Lig na sampela kain ripot olsem i no gutpela helpim ragbi lig long PNG"

"Mipela laik holim gutpela sapot i kam long ol kampani na askim olgeta presiden long bung wantaim."

"Yupela ol presiden em siaholda bilong PNGRFL, na bilong wanem bai yu mekim kain toktok long kampani bilong yu."

Numapo i tok toktok bilong Nandoma i kamapim planti bel hevi namel long ol spons na tu Intanesenel Ragbi Lig Bot. Na Nandoma i laik lukautim LBC Bombers, we Bombers em i no afiliet long Lae Ragbi Lig, Bombers em afiliet long PNGRFL.

BOKSING RIPOT

BIKPELA paul toktok i kamap nau long husat tru bai makim boksing long Arafura Gems long Darwin long Me 17-16 long dispela yia.

Nau yet, Pot Mosbi i tokaut olsem ol i kisim tokorait bilong Papua Niugini Boksing Yunion long makim kantri.

Sam Paulus, presiden bilong Pot Mosbi Boksing Asosiesen wantaim ol eksekutiv i tok olpela edministresen aninit long lukaut bilong Steven Tsivele i givim ol tok orait long makim kantri.

Pot Mosbi i makim pinis boksa bilong ol long stap insait long dispela tonamen wantaim nem bilong Lynch Ipera long pait insait long 57kg.

Nem bilong Ipera i pairap taim nesenel bodi, PNGABU i tokaut olsem em bai i no inap stap insait long nesenel tim bikos em i no pait long Goroka long difendim taitel bilong em.

Yangpela paitman bilong Lae i winim dispela pait.

Klab bilong Ipera Jong Pot Mosbi, Defence i tokaut strong olsem ol bai sapotim Ipera long stap insait long wanem nesenel tim bikos ol i ting em i tu gut long ol selekta i lusim nem bilong em.

Dick Larry, wanpela teknikel opisa bilong Defence klab na tu save go wantaim tim bilong PNG Boksing long ovasis i ting Lynch Ipera i strong moa yet. Em i save trening gut na bai stap yet long tim.

Presiden bilong PNGABU Lohial Naua i tokaut olsem boksa Ipera i no pait long tonamen na em bai i no inap stap long

tonamen.

"Em i bikpela samting long Lynch Ipera olsem olgeta arapela boksa long kamap long sempionsip long winim taitel long makim kantri

"Ol arapela boksa, i tren hat na painim mani long kamap long sempionsip na ol i tren hat long winim pait long divisen bilong ol

"Mipela i save olsem Ipera em i sempion boksa na dispela i no givim rait long em long nem bilong em i bai stap long nesenel tim wantu tru na ol arapela boksa bai pait hat long sempionsip.

Naua i tok nupela sempion long fetaweit divisen (57kg) em Joe Ameng bilong Lae, husat i soim olsem em i ken kisim wanem salens.

I gat tupela bikpela tonamen long boksing bai kamap long dispela yia na em Arafura Gems na Osenia Gems. Skwat bilong ol dispela tonamen em ol bai tokaut long dispela wik.

Sekretari bilong Lae Boksing Asosiesen Manoa Petueli i tok Lynch Ipera em wanpela elite boksa long kantri. Na ol i mas givim olgeta sapot long em long makim kantri.

"Em i wanpela kwaliti paitman. Na noken yusim dispela eskyus long em i no kamap long nesenel sempionsip na rausim em," Ratu Manoa i tok.

Presiden Naua i tokaut olsem PNGABU i no givim tok orait long Pot Mosbi long salim tim. PNGABU bai makim wanpela tim bilong em long go pait long Arafura Gems long Darwin.

Wiken Spot Dro

NCD PUBLIC SERVANTS SOCCER ASSOCIATION

Ladder at Round 12

Pool 1 - Mens

Team	Gp	W	D	L	Gf	Ga	Pts
NPF	11	8	3	0	21	9	27
NSO	11	8	1	2	25	14	25
Cellnet	11	7	2	2	23	12	23
Education	12	7	1	4	19	9	22
A/General	12	6	2	4	18	12	20
Harbours	12	6	2	4	18	14	20
IRC (+1)	10	4	3	3	16	14	15
Naqia	11	4	2	5	15	14	14
*Transport	10	4	1	5	13	11	13
Health (+1)	10	4	0	6	10	16	12
Fisheries (+3)	8	2	1	5	5	14	7
Elcom (+1)	8	2	1	5	3	12	7
Elcom*	10	1	2	7	4	17	5
Commerce (+2)	9	1	1	7	5	17	4
*Police (+1)	7	0	2	5	0	10	2

Pool 1 - Women

Team	Gp	W	D	L	Gf	Ga	Pts
A/General	12	8	2	2	25	5	26
Health (+1)	10	7	2	1	13	2	23
Education	11	7	1	3	16	6	22
NPF	11	6	2	3	17	7	20
IRC (+1)	10	5	2	3	11	6	17
Harbours (+3)	9	5	1	3	9	5	16
Naqia (+1)	10	5	0	5	9	13	15
NSO	11	5	0	6	9	22	15
Police (+4)	7	3	0	4	11	8	9

Transport	11	3	3	8	6	21	9
NBC (+3)	8	2	0	6	3	13	6
Elcom (+1)	9	2	0	7	4	16	6
Fisheries (+3)	8	1	0	7	2	14	3
Commerce (+3)	8	0	0	8	0	16	0

Pool 2 - Men

*1PIR - Taurama	10	8	2	0	18	3	26
Teachers	11	6	4	1	17	4	22
UPNG (+1)	11	6	3	2	12	13	21
Telikom	11	5	3	3	17	12	18
NCDC	12	4	5	3	14	11	17
*PostPNG	9	5	1	3	18	10	16
BPNG	11	4	2	5	11	13	14
N/Parliament (+2)	9	4	1	4	11	15	13
Works (+4)	8	3	2	3	8	10	11
Air Niugini (+3)	8	2	2	4	10	11	8
POSF (+4)	7	2	1	4	8	10	7
DCA (+3)	8	2	1	5	3	7	7
Pangtel (+3)	8	2	0	6	6	15	6
PNGBC (+5)	6	0	1	5	1	10	1
Defence (+6)	5	0	0	5	2	12	0

Pool 2 - Women

Telikom	11	10	0	1	47	3	30
BPNG	11	8	2	1	23	7	26
1PIR - Taurama	10	8	0	2	15	3	24
N/Parliament (+2)	9	7	0	2	12	4	21
*UPNG (+1)	10	5	3	2	14	8	18
*Works (+3)	8	4	2	2	8	4	14
*NCDC (+2)	8	4	0	4	9	12	12
Air Niugini (+3)	8	3	1	4	7	8	10
*DCA (+3)	7	3	1	3	10	15	10
*PostPNG (+3)	7	2	0	5	5	19	6
PNGBC (+5)	6	1	0	5	2	16	3
*Pangtel (+5)	6	0	1	5	1	14	1
POSF (+6)	5	0	0	5	0	10	0
Defence (+5)	6	0	0	6	1	15	0
Teachers (+3)	8	0	0	8	0	16	0

Note: Teams have been forfeited for non-payment or partial payment of Association fees.

* These teams have outstanding games to play.
(+n) These numbers beside the plus (+) sign represents the double-forfeits where no points are awarded.

RESULTS

Round 11 - PSSA
NBC drew Attorney 1-1
IRC drew Elcom 1-1

IRC defeated Elcom 2-0
Education lost NPF 0-1
Education lost NPF 1-2
Harbour defeated Fisheries (f/f) 2-0
NCDC drew DCA 2-2
PNGBC defeated 1-0
PNGBC defeated POSF 2-0
Works defeated PX 2-0
Works lost PX 0-2
Defence defeated Pangtel 1-0
Defence lost Pangtel 0-1

Health defeated Commerce 2-1
A/General drew Police 1-1
A/General defeated Police 3-1
Naqia drew NBC 2-2
Naqia lost NBC 0-2
Cellnet lost NSO 0-1
Cellnet defeated NSO 3-0

PostPNG lost Telstars 1-2
UPNG lost 1PIR 0-4
UPNG lost 1PIR 0-2
Telikom lost DCA 0-2
Telikom defeated DCA 7-0
BPNG defeated NCDC 2-1
NCDC drew BPNG 1-1

NCD PUBLIC SERVANTS OFF-SEASON SOCCER SIR JOHN GUISE STADIUM

Round 14

Saturday, March 10, 2001.

Main Stadium

08.00am	M1	NCDC vs Works
09.05am	W1	NCDC vs Works
10.10am	M1	PNGBC vs Teachers
11.15am	W2	DCA vs 1PIR
12.20pm	M2	DCA vs 1PIR
01.25pm	W1	Elcom vs Fisheries
02.30pm	M1	Elcom vs Fisheries

Ground 2

08.00am	M2	NCDC vs Works
09.05am	W2	NCDC vs Works
10.10am	M2	PNGBC vs Teachers
11.15am	W2	DCA vs 1PIR
12.20pm	M2	DCA vs 1PIR
01.25pm	W1	Elcom vs Fisheries
02.30pm	M1	Elcom vs Fisheries

Sunday, March 11, 2001.

Main Stadium

08.00am	M1	Naqia vs Transport vs Transport
09.05am	W1	POSF vs Air Niugini
10.10am	W2	POSF vs Air Niugini
11.15am	M2	Harbours vs A/General
12.20pm	W1	Harbours vs A/General
01.25pm	M1	Harbours vs A/General

Ground 2

08.00am	M1	IRC vs Cellnet
09.05am	W1	IRC vs Cellnet
10.10am	W2	DCA vs NCDC
11.15am	M2	Defence vs PostPNG
12.20pm	W2	Defence vs PostPNG
01.25pm	W2	Telikom vs N/Parliament
02.30pm	M2	Telikom vs N/Parliament

PORT MORESBY WOMENS SOFTBALL ASSOCIATION 2000/2001 SEASON

Round 2 - Week 22

Saturday, March 10, 2001.

Diamond 3

09.00	Chebu vs Tarangau	B
10.30	AB Bears vs Admiralty	A
12.00	Gazelle vs Chebu	A
13.30	Norths vs All Stars	A
15.00	Wantoks vs Mazda Carps	A

Diamond 2

10.30	Wantoks vs All Stars	B
12.00	NGI vs Mazda Carps	C
13.30	AB Bears vs Admiralty	C

Bye: Dolphins

PORT MORESBY SOCCER ASSOCIATION

Sunday, March 11, 2001

BISINI ONE (1)

09:00 P1 Ela United vs Tawala
10:45 WPOrogen vs ANZ University
12:30 P1 ANZ University vs PS Kandibang
14:00 P3 BFW PS United vs SP Brewery

BISINI TWO (2)

09:00 P4 Rapatona vs Buresong
10:45 WPTelikom vs BFW PS United
12:30 P4 Dobo Futz vs Momase

Bye: Cosmos (WP)

Note: All teams playing in the finals are to produce their team lists. Any players who have played in first game with a team can not move to another team.

RULES OF FINALS: Two top teams in men pools will go into the knockout. Women pool is four top teams.

POINTS LADDER

TEAM	P	W	D	L	F	A	PTS
Pool 1							
ANZ University	3	3	0	0	14	6	9
Babaka	4	2	1	1	14	10	7
PS Kandibang	3	1	2	0	4	2	5
Ela United	3	0	1	2	2	5	1
Tawala	3	0	0	3	3	11	0

Pool 2

Blue Kumuls	3	2	1	0	8	3	7
Cosmos	3	2	1	1	7	3	7
YM2	3	1	1	1	5	3	4
Mungkas	3	0	0	3	3	12	0

Pool 3

BFW PS United	3	2	0	0	33	0	9
SP Brewery	3	3	0	0	5	1	9
HLB Pom United	4	2	0	2	7	3	6
J. KE. Club	4	1	0	2	3	7	3
Gerehu Stg. 1 Utd	4	0	0	2	1	26	0

Pool 4

LBC Defence	4	3	0	0	9	4	10
Rapatona	3	2	0	1	12	6	6
Buresong	3	0	2	1	4	6	1
Momase	3	0	1	0	1	1	1
Dobo Futz	3	0	1	1	1	7	1

Women Pool

Cosmos	4	3	0	1	7	4	9
Telikom	3	2	1	0	14	7	7
ANZ University	3	1	1	1	3	2	4
BFW PS United	3	1	0	2	2	3	3
Orogen	3	0	0	3	1	16	0

CENTRAL CUP RULES FOOTBALL

Friday, March 9, 2001 - Pool match 1

9.00 - 9.30am	Karawa vs Alukuni	U17
9.30 - 10.00	Karawa vs Alukuni	Snr
10.00 - 10.30	Keapara vs Hula 1	U17
10.30 - 11.00	Keapara vs Hula1	Snr
11.00 - 11.30	Hula 2 vs Gereka	U17
11.30 - 12.00	Hula 2 vs Gereka	Snr
12.30 - 1.00	Kalo vs Maokele	U17
1.00 - 1.30	Kalo vs Maokele	Snr
1.30 - 2.00	Karawa vs Hula 2	U17
2.00 - 2.30	Karawa vs Hula 2	Snr
2.30 - 3.00	Keapara vs Kalo	U17
3.30 - 4.00	Keapara vs Kalo	Snr

Saturday, March 10, 2001 - Pool match 2

9.00 - 9.30am	Alukuni vs Gereka	U17
9.30 - 10.00	Alukuni vs Gereka	Snr
10.00 - 10.30	Maokele vs Hula 1	U17
10.30 - 11.00	Maokele vs Hula1	Snr
11.00 - 11.30	Karawa vs Gereka	U17



• Lukim ol Sentrel i soim stail bilong ol long pilai Aussie Ruls long dispela wiken long Boroko.

11.30 - 12.00	Karawa vs Gereka	Snr
12.30 - 1.00	Keapara vs Maokele	U17
1.00 - 1.30	Keapara vs Maokele	Snr
1.30 - 2.00	Alukuni vs Hula 2	U17
2.00 - 2.30	Alukuni vs Hula 2	Snr
2.30 - 3.00	Hula1 vs Kalo	U17
3.30 - 4.00	Hula1 vs Kalo	Snr

Under 17 - 2 X10 minutes

Seniors - 2 X15 minutes

Sunday, March 11, 2001 - Finals

9.00 - 10.00 Semi 1- winner Pool A vs runner up Pool B U17 (4X10 minutes)
10.00 - 11.00 Semi 2 - winner Pool B vs runner up Pool A U17

11.00 - 12.00 Semi 3 - winner Pool A vs runner up Pool B senior (4X15 minutes)
12.00 - 1.00 Semi 4- winner Pool B vs runner up Pool A senior

1.00 Grand final - winner semi 1 vs winner semi 2 U17 (4X12 minutes)

2.30 Grand final - winner semi 3 vs winner semi 4 senior (4X20 minutes)

4.30pm Central cup presentation & BBQ - University drill hall

Toksave

Saim dro, risalts na poin lada i kam long Wantok Niuspepa long Tunde olgeta wik.

Saim long Spots Editar: Fax: 325 2579 o ringim em long telepon no: 325 2500



WANTOK SPOT



Soal sempionsip bai kamap o nogat?

OL SOFBAL senta insait long kantri i paul yet long wanem Papua Niugini Sofbal Federesen (PNGSF) i no tokaut sapos dispela sempionsip ya bai go het o nogat.

Presiden bilong PNGSF Nelson Paulias husat i kam long Pot Mosbi long wanpela turism kos i no mekim wanpela toktok long dispela sempionsip.

Wantok i save olsem Francis Rangattin husat i sekretari bilong PNGSF i lusim Rabaul na wok wantaim Gavana bilong Nu Allan, Paul Tohian, tu i no save wanem samting tru i wok long kamap.

Tupela opisal bilong Goroka Sofbal Asosiesen Henry Vainak na Joe Lumaris i sutim tok long Mista Paulias na Rangattin long i no mekim gut wok bilong tupela. Nau yet planti asosiesen i no save sempionsip bai go het o nogat.

Tupela i tok nupela presiden i no ranim gut sofbal. Stendad bilong sofbal i go daun tru bikos nogat wanpela gutpela samting ol bai pilai long em.

Presiden Vainak i askim sapos Mista Paulias i mas holim wanpela miting long stretim dispela hevi. Em i sapatim tingting bilong Kokopo, Lae na Pot Mosbi long salensim Paulias long mekim gut wok.

Vainak husat em junia vais presiden i askim Paulias long kisim toktok bilong Mectil Tonga o em yet long we bilong lukautim sempionsip.

Em i tok taim bilong Jack Pidik na Henry Kila, olgeta samting i ran gut tru. Tasol nau nogat, olgeta samting i wok long surik i go bek.

Vainak na Lumaris i askim olgeta senta long surikim sempionsip i go long Lae bikos em i stap



• Ol meri Hagen i i gat kik. Ol susa bilong Coca Cola NGI i sanap redi long kisim poto bihain long pilai las wiken.

namel.

Tupela i sapatim tingting bilong vais presiden bilong Lae Sofbal Asosiesen Carol Yawing long surikim sempionsip i go long senta bilong en.

Wanpela eksekutiv bilong Pot Mosbi Mens

Sofbal Asosiesen Francis Dakenny i tokaut olsem tingting bilong rausim sempionsip i go long Lae i no gutpela bikos nogat wanpela asosiesen i affliet.

Mista Dakenny i tokaut olsem nau yet nesanel

sofbal federesen i gat bikpela hevi na i nogat wanpela senta i affliet. Wanem ol senta i laik resis long sempionsip i mas baim affliesen na PNGSF i no holim wanpela AGM yet.

Tingting long surikim

sempionsip i soim tru olsem ol senta i nogat plennig bilong ol. Ol i save pinis long Kokopo nesanel klab sempionsip olsem Pot Mosbi em bai holim na ol i mas redi long kamap wantaim mani.

PNGFA mas kirapim wok painimaut long Anda 20 soka tim

HENRY MORABANG i raitim

IGAT singaut nau long Papua Niugini Futbol Asosiesen long kirapim wok painimaut long wokabout bilong Anda 20 soka tim i go long Cook Ailans long las mun.

Tim bilong PNG i go stap resis long Osenia Futbol Konfederesen kwalifaia tonamen bilong Anda 20 na kamap las long tonamen.

Olpela presiden bilong NCD Pablik Sevan Soka Simon Koima i mekim singaut bihain long planti ripot i kamap long niuspepa olsem kosa na tim menesemen i no mekim gutpela wok long lukautim tim.

Wankain taim tu, Mista Koima i sapatim toktok bilong wanpela opisel bilong Osenia Futbol Konfederesen (OFC) olsem ol pilaia

inap pilai gut sapos kosa na menesemen i gat eksperiens na disiplin.

Em i toktok strong olsem PNGFA i noken poret na mekim wok painimaut watpo PNG Anda 20 i no pilai gut.

Planti ol pilaia bilong arapela kantri husat i kam lukim Anda 20 na Anda 17 tim i trening pilai wantaim ol tim lon Osenia klab sempionsip i guria stret long lukim stendad bilong soka.

Tasol Anda 17 tim tasol i kamapim gut nem bilong kantri na Anda 20 i bagarapim olgeta bikos ol i no pilai gut.

Kosa bilong Samoa Carlos Fernandez husat i stap kosa long yut soka long Australia bipo em i joinim Samoa Futbol Federesen i tok em i amamas tru long lukim ol pilaia long taim bilong Osenia klab resis.

Tasol long Cook Ailan, ol dispela pilaia i no bihain wankain stail i kamap long Pot Mosbi.

Mista Fernandez i tokaut olsem ol pilaia i gutpela tasol kosa na tim menesemen i no gutpela. I luk olsem kosa i nogat stating 11 pilaia na em i save kisim kankain man na putim long wokim tim.

Wanpela pilaia long Cook Ailan husat i kam long Osenia sempionsip long Pot Mosbi long bigin bilong yia, Batola Niupulusu i tokaut long wanpela pas olsem i gat planti ol nupela pilaia long tim na dispela i givim hat taim.

Em i tok ol pilaia long Anda 20 bilong Pot Mosbi i no stap na dispela em wanpela as PNG i lus nogut tru.

Mista Niupulusu i tok sapos i gat soka politikis orait, em i narapela samting. Na em i askim watpo Kisakiu Posman, wanpela tok kosa

insait long Saut Pasifik rijen i no lukautim tim.

Em i tok olsem ol i no wanbel bikos ol i westim bikpela mani tru long lukim PNG i lus bikos ol gem bilong PNG i no wankain bikos planti ol nupela pes long tim ya. Em i ting Pot Mosbi i gat gutpela pilaia moa long arapela senta.

Koima i sapatim toktok bilong Niupulusu olsem sapos ripot bilong ol kosa na tim menesa i spak na kamap leit long pilai, PNGFA i mas rausim tupela na tupela i noken holim moa wanpela wok long soka insait long kantri.

"Kain pasin bilong spak na timlimbur nating i no gutpela na i bringim nem bilong soka i go daun olgeta long narapela kantri," Koima i tok.

Wantok Niuspepa i gat wanpela ripot i kam long sampela pilaia i tokaut olsem kosa na menesa i no

save stap wantaim tim bihain long pilai long stretim hevi long bungim nupela tim.


Ripot ya i tokaut tu olsem Seth Daniel, vais presiden husat i save olsem biknem ges bilong PNGFA i lusim hotel na kam stap wantaim ol pilaia bikos planti taim kosa na menesa i no save stap wantaim tim.

Koima i ting sapos dispela ol toktok i tru, kosa na tim menesa i mas raus long holim wok long lukautim soka.

Wantok i save tu olsem PNGFA i bin askim kosa Richard Nagai long holim wanpela kem long Nesanel Spot Institut long Goroka tasol em i les. Olsem na ol i holim tupela kem olgeta.

Namba tu kosa na menesa John Peka i tokim Wantok olsem em bai i no inap mekim wanpela toktok inap miting long Epril.

Gutpela Pis tru bilong PNG... Em DIANA!



- Tuna kam long solwara bilong Papua Niugini Stret.
- 100% tuna mit stret, nogat bun na nogat skin.
- Planti mit istap long olgeta tin.
- Nambawan tru long kisim protein bilong buildim masol. Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.
- Prais inap tru long yu baim.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.